

眼中犀角真吾子，身後牛衣愧老妻。百歲神游定何處，桐鄉知葬浙江西。

十二月二十八日蒙恩責授檢校水部員外郎黃州團練副使復用前韻

二首

百日歸期恰及春，餘年樂事最關身。出門便旋風吹面，走馬聯翩鵲啣人。竊祿從來豈有因，

【二】

平生文字爲吾累，此法聲名不厭低。塞上縱歸他日馬，城東不鬪少年雞。爲余投檄向江西，

蘇東坡詩集卷二十

古今體詩 六十

陳州與文郎逸民飲別攜手河堤上作此詩

白酒無聲滑瀉油，醉行堤上散吾愁。春風料峭羊角轉，河水渺緜瓜蔓流。

君已思歸夢巴峽，我能未到說黃州。此身聚散何窮已，未忍悲歌學楚囚。

子由自南都來陳三日而別

夫子自逐客，尙能哀楚囚。奔馳三百里，徑來寬我憂。相逢知有得，道眼清不流。別來未一年，落盡驕氣浮。嗟我晚聞道，款啓如孫休。至言難久服，放心不自收。悟彼善知識，妙藥應所投。納之憂患場，磨以百日愁。冥頑雖難化，鑄發亦已周。平時種種心，次第去莫留。但餘無所還，永與夫子游。此別何足道，大江東西州。畏蛇不下榻，睡足吾無求。便爲齊安民，何必歸故邱。

正月十八日蔡州道上遇雪次子由韻二首

蘭菊有生意，微陽回寸根。方憂集暮雪，復喜迎朝暎。憶我故居室，浮光動南軒。松竹半傾瀉，未數葵與萱。三徑瑤草合，一瓶井花溫。至今行吟處，尙餘履鳥痕。一朝出從仕，永愧李仲元。晚歲益可羞，犯雪方南奔。山城買廢圃，槁葉手自掀。長使齊安人，指說故侯園。

【三】

鉛膏染髭須，旋露霜雪根。不如閉目坐，丹府夜自暎。誰知憂患中，方寸寓羲軒。

大雪從壓屋。我非兒女黨。平生學踵息。坐覺兩鞵溫。下馬作雪詩。滿地鞭箠痕。佇立望原野。悲歌爲黎元。道逢射獵子。遙指狐兔奔。蹤跡尙可原。窟穴何足掀。寄謝李丞相。吾將反邱園。

過新息畱示鄉人任師中

昔年嘗羨任夫子。卜居新息臨淮水。怪君便爾忘故鄉。稻熟魚肥信清美。竹陂雁起天爲黑。桐柏煙橫山半紫。知君坐受兒女困。悔不先歸弄清泚。塵埃我亦失收身。此行踴躍尤可鄙。寄食方將依白足。附書未免煩黃耳。往雖不及來有年。詔恩尙許歸田里。卻下關山入蔡州。爲買烏犍三百尾。

過淮

朝離新息縣。初亂一水碧。暮宿淮南邨。已度千山赤。驢駝號古戍。霧雨暗破驛。回頭梁楚郊。永與中原隔。黃州在何許。想像雲夢澤。吾生如寄耳。初不擇所適。但有魚與稻。生理已自畢。獨喜小兒子。少小事安佚。相從艱難中。肝肺如鐵石。便應與晤語。何止寄衰疾。

書馨公詩後并引

過加祿鎮南二十五里大許店。休馬於逆旅。祁宗祥家。見壁上有幅紙。題詩云。滿院秋光濃欲滴。老僧倚杖青松側。只怪高聲問不響。嗔余踏破蒼苔色。其後題云。溢水僧寶馨。宗祥謂余。此光黃閒狂僧也。年百三十。死於熙寧十年。既死。人有見之者。宗祥言其異事甚多。作是詩以識之。馨公本名清戒。俗謂之戒和尚云。

馨公昔未化。來往淮山曲。壽逾兩甲子。氣壓諸尊宿。但嗟濁惡世。不受龍象職。我來不及見。恨望空遺躅。霜顛隱白毫。鎖骨埋青玉。皆云似達磨。隻履還西竺。壁閒餘清詩。字勢頗拔俗。爲吟五字偈。一洗凡眼肉。

游淨居寺并敘

淨居寺在光山縣南四十里。大蘇山之南。小蘇山之北。寺僧居仁爲余言。齊天保中。僧惠思過此。見父老。問其姓。曰蘇氏。又得二山名。乃嘆曰。吾師告我。遇三蘇則住。遂畱結菴。而父老竟無有。蓋山神也。其後僧智凱見思於此山。而得法焉。則世所謂思大和尚。智者大師是也。唐神龍中。道岸禪師始建寺於其地。廣明庚子之亂。寺廢於兵火。至乾興中。乃復而賜名曰梵天云。

十載遊名山。自製山中衣。願言畢婚嫁。攜手老翠微。不悟俗緣在。失身陷危機。刑名非宿學。陷穽損積威。遂恐生死隔。永與雲山違。今日復何日。芒屨自輕飛。

稽首兩足尊。舉頭雙涕揮。靈山會未散。八部猶光輝。願從二聖往。一洗千劫非。徘徊竹溪月。空翠搖煙霏。鐘聲自送客。出谷猶依依。回首吾家山。歲晚將焉歸。

梅花二首

春來幽谷水潺潺。的皪梅花草棘閒。一夜東風吹石裂。半隨飛雪度關山。

【二】

何人把酒慰深幽。閒白無聊落更愁。幸有青溪三百曲。不辭相送到黃州。

戲作種松

我昔少年日。種松滿東岡。初移一寸根。瑣細如插秧。二年黃茅下。一一攢麥芒。三年出蓬艾。滿山散牛羊。不見十餘年。想作龍蛇長。夜風波浪碎。朝露珠璣香。我欲食其膏。已伐百本桑。人事多乖迕。神藥竟渺茫。竭來齊安野。夾路須髯蒼。會開龜蛇窟。不惜斤斧瘡。縱未得茯苓。且當拾流肪。釜盎百出入。皎然散飛霜。槁死三彭仇。澡換五穀腸。青骨凝綠髓。丹田發幽光。白髮何足道。要使雙瞳方。卻後五百年。騎鶴還故鄉。

萬松亭并敘

麻城縣令張毅植萬松於道周。以芘行者。且以名其亭。去未十年。而松之存者十不及三。

四傷來者之不嗣其意也故作是詩

十年栽種百年規。好德無人助我儀。縣令若同倉庾氏。亭松應長子孫枝。天公不救斧斤厄。野火解憐冰雪姿。為問幾株能合抱。殷勤記取角弓詩。

張先生并敘

先生不知其名。黃州故縣人。本姓盧。為張氏所養。陽狂垢污。寒暑不能侵。常獨行市中。夜或不知其所止。往來者欲見之。多不能致。余試使人召之。欣然而來。既至。立而不言。與之言不應。使之座不可。但俯仰熟視。傳舍堂中。久之而去。夫孰非傳舍者。是中竟何有乎。然余以有思。維心追躡其意。蓋未得也。

熟視空堂竟不言。故應知我未天全。肯來傳舍人皆說。能致先生子亦賢。脫屣不妨眠糞屋。流澌爭見浴冰川。士廉豈識桃椎妙。妄意稱量未必然。

初到黃州

自笑平生為口忙。老來事業轉荒唐。長江繞郭知魚美。好竹連山覺筍香。逐室不妨員外置。詩人例作水曹郎。只慙無補絲毫事。尚費官家壓酒囊。

陳季常所畜朱陳村嫁娶圖二首

何年願陸丹青手。

畫作朱陳嫁娶圖。

聞道一村惟兩姓。

不將門戶買崔盧。

【二】

我是朱陳舊使君。

勸農曾入杏花村。

而今風物那堪畫。

縣吏催錢夜打門。

少年時嘗過一村院。見壁上有詩云。夜涼疑有雨。院靜似無僧。不知何人

詩也。宿黃州禪智寺。寺僧皆不在。夜半雨作。偶記此詩。故作一絕。

佛燈漸暗飢鼠出。

山雨忽來修竹鳴。

知是何人舊詩句。

已應知我此時情。

定惠院寓居。月夜偶出。

幽人無事不出門。

偶逐東風轉良夜。

參差玉宇飛木末。

繚繞香煙來月下。

江雲有態清自媚。

竹露無聲浩如瀉。

已驚弱柳萬絲垂。

尚有殘梅一枝亞。

清詩獨吟還自和。

白酒已盡誰能借。

不惜青春忽忽過。

但恐歡意年年謝。

自知醉耳愛松風。

會揀霜林結茅舍。

浮浮大甑長炊玉。

漚漚小槽如壓蔗。

飲中真味老更濃。

醉裏狂言醒可怕。

閉門謝客對妻子。

倒冠落佩從嘲罵。

次韻前篇

去年花落在徐州。

對月酣歌美清夜。

今年黃州見花發。

小院閉門風露下。

萬事如花不可期。

餘年似酒那禁瀉。

憶昔扁舟泝巴峽。

落帆樊口高桅亞。

長江袞袞空自流。

白髮紛紛寧少借。

竟無五畝繼沮溺。

空有千篇凌鮑謝。

至今歸計負雲山。

未免孤衾眠客舍。

少年辛苦真食蓼。

老境安閒如啖蔗。

飢寒未至且安居。

憂患已空猶夢怕。

穿花踏月飲村酒。

免醉歸遭官長罵。

安國寺浴

老來百事懶。

身垢猶念浴。

尚煩月一沐。

山城足薪炭。

塵垢能幾何。

俯然脫羈梏。

披衣坐小閣。

散髮臨修竹。

豈惟忘淨穢。

兼以洗榮辱。

默歸毋多談。

此理觀要熟。

安國寺尋春

臥聞百舌呼春風。

起尋花柳村村同。

城南古寺修竹合。

小房曲檻鼓深紅。

看花歎老憶年少。

對酒思家愁老翁。

病眼不羞雲母亂。

鬢絲強理茶煙中。

遙知二月王城外。

玉仙洪福花如海。

薄羅勻霧蓋新妝。

快馬爭風鳴雜珮。

玉川先生真可憐。

一生耽酒終無錢。

病過春風九十日。

獨抱添丁看花發。

寓居定惠院之東。雜花滿山。有海棠一株。士人不知貴也。

江城地瘴蕃草木。

只有名花苦幽獨。

嫣然一笑竹籬間。

桃李漫山細麤俗。

也知造物有深意，故遣佳人在空谷。自然富貴出天姿，不待金盤薦華屋。
 朱唇得酒暈生臉，翠袖卷紗紅映肉。林深霧暗曉光遲，日暖風輕春睡足。
 雨中有淚亦悽愴，月下無人更清淑。先生食飽無一事，散步逍遙自捫腹。
 不問人家與僧舍，拄杖敲門看修竹。忽逢絕艷照衰朽，歎息無言揩病目。
 陋邦何處得此花，無乃好事移西蜀。寸根千里不易致，銜子飛來定鴻鴻。
 天涯流落俱可念，爲飲一樽歌此曲。明朝酒醒醒獨來，雪落紛紛那忍觸。

次韻樂著作野步

老來幾不辨西東，秋後霜林且強紅。眼暈見花真是病，耳虛聞蟻定非聰。
 酒醒不覺春強半，睡起常驚日過中。植杖偶逢爲黍客，披衣閒咏舞雩風。
 仰看落葉收松粉，俯見新芽摘杞叢。楚雨還昏雲夢澤，吳潮不到武昌宮。
 廢興古郡詩無數，寂寞閒窗易粗通。解組歸來成二老，風流他日與君同。

二月二十六日雨中熟睡至晚強起出門還作此詩意思殊昏昏也

卯酒困三杯，午餐便一肉。雨聲來不斷，睡味清且熟。昏昏覺還臥，展轉無由足。
 強起出門行，孤夢猶可續。泥深竹雞語，村暗鳩婦哭。明朝看此詩，睡語應難讀。
 雨晴後步至四望亭下魚池上遂自乾明寺前東岡上歸二首

雨過浮萍合，蛙聲滿四鄰。海棠真一夢，梅子欲嘗新。拄杖閒挑菜，鞦韆不見人。
 殷勤木芍藥，獨自殿餘春。

【二】

高亭廢已久，下有種魚塘。暮色千山入，春風百草香。市橋人寂寂，古寺竹蒼蒼。
 鶴鶴來何處，號鳴滿夕陽。

雨中看牡丹三首

霧雨不成點，映空疑有無。時於花上見，的皪走明珠。秀色洗紅粉，暗香生雪膚。
 黃昏更蕭瑟，頭重欲相扶。

【二】

明日雨當止，晨光在松枝。清寒入花骨，肅肅初自持。午景發濃豔，一笑當及時。
 依然暮還斂，亦自惜幽姿。

【三】

幽姿不可惜，後日東風起。酒醒何所見，金粉抱青子。千花與百草，共盡無妍鄙。
 未忍汚泥沙，牛酥煎落藥。

次韻樂著作送酒

少年多病怯杯觴。老去方知此味長。萬斛羈愁都似雪。一壺春酒若爲湯。

次韻樂著作天慶觀醮

濁世紛紛肯下臨。夢尋飛步五雲深。無因上到通明殿。只許微聞玉佩音。

王齊萬秀才寓居武昌縣劉郎洑。正與伍洲相對。伍子胥奔吳所從渡江也。

君家稻田冠西蜀。搗玉揚珠三萬斛。塞江流梯起書樓。碧瓦朱欄照山谷。

傾家取樂不論命。散盡黃金如轉燭。唯餘舊書一百車。方舟載入荆江曲。

江上青山亦何有。伍洲遙望劉郎數。明朝寒食當過君。請殺耕牛壓私酒。

與君飲酒細論文。酒酣訪古江之濱。仲謀公瑾不須弔。一醉波神英烈君。

杜沂游武昌以醖醢花菩薩泉見餉二首

醖醢不爭春。寂寞開最晚。青蛟走玉骨。羽蓋蒙珠幘。不妝豔已絕。無風香自遠。

淒涼吳宮闕。紅粉埋故苑。至今微月夜。笙簫來翠幘。餘妍入此花。千載尙清婉。

怪君呼不歸。定爲花所挽。昨宵雷雨惡。花盡君應返。

【二】

君言西山頂。自古流白泉。上爲千牛乳。下有萬石鉛。不愧惠山味。但無陸子賢。

願君揚其名。庶託文字傳。寒泉比吉士。清濁在其源。不食我心惻。於泉非所患。

嗟我本何用。虛名空自纏。不見子柳子。餘愚污谿山。

陳季常自岐亭見訪郡中及舊州諸豪爭欲邀致之戲作陳孟公詩一首

孟公好飲寧論斗。醉後關門防客走。不妨閒過左阿君。百譎終爲賢太守。

老居閭里自浮沈。笑問伯松何苦心。忽然載酒從陋巷。爲愛揚雄作酒箴。

長安富兒求一過。千金壽君君笑唾。汝家安得客孟公。從來只識陳驚坐。

遊武昌寒溪西山寺

連山蟠武昌。翠木蔚樊口。我來已百日。欲濟空搔首。坐看鷗鳥沒。夢逐麝麝走。

今朝橫江來。一葦寄衰朽。高談破巨浪。飛屨輕重阜。去人曾幾何。絕壁寒溪吼。

風泉兩部樂。松竹三益友。徐行欣有得。芝朮在蓬莠。西上九曲亭。衆山皆培塿。

卻看江北路。雲水渺何有。離離見吳宮。莽莽真楚數。空傳孫郎石。無復陶公柳。

爾來風流人。唯有漫浪叟。買田吾已決。乳水況宜酒。所須修竹林。深處安井臼。

相將踏勝絕。更裏三日糗。

西山戲題武昌王居士并引

子往在武昌西山九曲亭上有題一句云元鴻橫號黃櫨峴九曲亭即吳王峴山一山皆櫨葉其旁即元結陂湖也荷花極盛因爲對云皓鶴下浴紅荷湖座客皆笑同請賦此詩

江干高居堅關局。 黠耕躬稼角挂經。 篙竿繫舸菰菱隔。 笳鼓過軍雞狗驚。
解襟顧景各箕踞。 擊劍庶歌幾舉觥。 荆筭供贍愧擾聒。 乾鍋更夏甘瓜羹。

武昌銅劍歌并引

供奉官鄒文嘗官於武昌。江岸裂出古銅劍。文得之以遺余。冶鑄精巧非鍛冶所成者。
雨餘江清風卷沙。 雷公躡雲捕黃蛇。 蛇行空中如枉矢。 電光煜煜燒蛇尾。
或投以塊鏗有聲。 雷飛上天蛇入水。 水上青山如削鐵。 神物欲出山自裂。
細看兩脊生碧花。 猶是西江老蛟血。 蘇子得之何所爲。 副緘彈缺咏新詩。
君不見凌煙功臣長九尺。 腰閒玉具高挂頤。

定惠院顯師爲余竹下開嘯軒

啼鳩催天明。 喧喧相詆讒。 暗蛩泣夜永。 唧唧自相弔。 飲風蟬至潔。 長吟不改調。
食土蚓無腸。 亦自終夕叫。 鶯貪聲最鄙。 鵲喜意可料。 皆緣不平鳴。 慟哭等嬉笑。
阮生已蠶率。 孫子亦未妙。 道人開此軒。 清坐默自照。 衝風振河海。 不能號無竅。
累盡吾何言。 風來竹自嘯。

石芝并引

元豐三年五月十一日癸酉夜夢遊何人家。開堂西門有小園古井。井上皆蒼石。石上生
紫藤如龍蛇。枝葉如赤箭。主人言此石芝也。余率爾折食一枝。衆皆驚笑。其味如雞蘇而
甘。明日作此詩。

空堂明月清且新。 幽人睡息來初勻。 了然非夢亦非覺。 有人夜呼祁孔賓。
披衣相從到何許。 朱欄碧井開瓊戶。 忽驚石上堆龍蛇。 玉芝紫筍生無數。
鏘然敲折青珊瑚。 味如蜜藕和雞蘇。 主人相顧一撫掌。 滿堂坐客皆盧胡。
亦知洞府嘲輕脫。 終勝嵇康羨王烈。 神山一合五百年。 風吹石髓堅如鐵。
今年正月十四日與子由別於陳州。五月子由復至齊安。以詩迎之。
驚塵急雪滿貂裘。 淚灑東風別苑邱。 又向邯鄲枕中見。 卻來雲夢澤南州。
睽離動作三年計。 牽挽當爲十日留。 早晚青山映黃髮。 相看萬事一時休。

遷居臨臯亭

我生天地閒。 一蟻寄大磨。 區區欲右行。 不揀風輪左。 雖云走仁義。 未免違寒餓。
劔米有危炊。 鍼氈無穩坐。 豈無佳山水。 借眼風雨過。 歸田不待老。 勇決凡幾箇。

幸茲廢棄餘。疲馬解鞍歇。全家占江驛。絕境天為破。飢貧相乘除。未見可弔賀。澹然無憂樂。苦語不成些。

曉至巴河口迎子由

去年御史府。舉動觸四壁。幽幽百尺井。仰天無一席。隔牆聞歌呼。自恨計之失。爾詩不忍寫。苦淚漬紙筆。餘生復何幸。樂事有今日。江流鏡面淨。煙雨輕霧。孤舟如鳧鷖。點破千頃碧。聞君在磁湖。欲見隔咫尺。朝來好風色。旗脚西北擲。行當中流見。笑眼清光溢。此邦疑可老。修竹帶泉石。欲買柯氏林。茲謀待君必。

與子由同游寒溪西山

散人出入無町畦。朝游湖北暮淮西。高安酒官雖未上。兩脚垂欲穿塵泥。與君聚散若雲雨。共惜此日相提攜。千搖萬兀到樊口。一箭放溜先鳧鷖。層層草木暗西嶺。瀏瀏霜雪鳴寒溪。空山古寺亦何有。歸路萬頃青玻璃。我今漂泊等鴻雁。江南江北無常棲。幅巾不擬過城市。欲踏徑路開新蹊。卻憂別後不忍到。見子行迹空餘悽。吾儕流落豈天意。自坐迂闊非人擠。行逢山水輒羞歎。此去未免勤鹽齏。何當一遇李八百。相哀白髮分刀圭。

次韻答子由

平生弱羽寄衝風。此去歸飛誠所從。好語似珠穿一一。妄心如膜退重重。山僧有味寧知子。澆吏無言只笑儂。尚有讀書清淨業。未容春睡敵千鍾。

武昌酌菩薩泉送王子立

送行無酒亦無錢。勸爾一杯菩薩泉。何處低頭不見我。四方同此水中天。

和何長官六言次韻五首

作邑君真伯厚。去官我豈曼容。一塵願託仁政。六字難磨廢變風。

【一】

五噫已出東洛。三復願比南容。學道未逢潘蓋。草書猶似楊風。

【二】

石渠何須反顧。水驛幸足相容。長江大欲見底。探支八月涼風。

【四】

清風初號地籟。明月自寫天容。貧家何以娛客。但知抹月批風。

【五】

青山自是絕色。無人誰與爲容。說向市朝公子。何殊馬耳東風。

觀張師正所蓄辰砂

將軍結髮戰蠻溪，篋有殊珍勝象犀。漫說玉牀收箭鏃，何曾金鼎識刀圭。
近聞猛士收丹穴，欲助君王鑄裏蹏。多少空巖人不見，自隨初日吐虹蜺。

五禽言五首并敘

梅聖俞嘗作四禽言，余謫黃州，寓居定惠院，遠舍皆茂林修竹，荒池蒲葦，春夏之交，鳴鳥百族，土人多以其聲之似者，名之，遂用聖俞體作五禽言。

使君向蘄州，更唱蘄州鬼。我不識使君，寧知使君死。人生作鬼會不免，使君已老知何晚。

【二】

昨夜南山雨，西溪不可渡。溪邊布穀兒，勸我脫破袴。不辭脫袴溪水寒，水中照見催租瘢。

【三】

去年麥不熟，挾彈規我肉。今年麥上場，處處有殘粟。豐年無象何處尋，聽取林間快活吟。

【四】

力作力作，蠶絲一百箔。塢上麥頭昂，林間桑子落。願儂一箔千兩絲，繅絲得蛹飼爾雛。

【五】

姑惡姑惡，姑不惡，妾命薄。君不見東海孝婦死，作三年乾。不如廣漢龐姑去，卻還。

次韻子由病酒肺疾發

憶子少年時，肺病疲坐臥。嗚呼或終日，勢若風雨過。虛陽作浮漲，客冷仍下墮。妻孥恐悵望，膾炙不登坐。終年禁晚食，半夜發清餓。胃強高苦滿，肺斂腹輒破。三彭恣啖嚼，二豎肯逋播。寸田可治生，誰勸耕黃稷。探懷得真藥，不待君臣佐。初如雪花積，漸作櫻珠大。隔牆聞三嘔，隱隱如轉磨。自茲失故疾，陽唱陰輒和。神仙多歷試，中路或坎坷。平生不盡器，痛飲知無那。舊人眼看盡，老伴餘幾箇。殘年一斗粟，待子同春籩。云何不自珍，醉病又一挫。真源結梨棗，世味等糠莩。耕耘當待穫，願子勤自課。相將賦遠游，仙語不用些。

鐵拄杖并敘

柳真齡字安期，閩人也。家資一鐵拄杖，如柳栗木，牙節宛轉天成，中空有簧，行輒微響，柳

云得之浙中相傳王審知以遺錢鏐以賜一僧柳偶得之以遺余作此詩謝之

柳公手中黑蛇滑 千年老根生乳節 忽聞鏐然爪甲聲 四坐驚顧知是鐵
含簧腹中細泉語 迸火石上飛星裂 公言此物老有神 自昔閩王餉吳越
不知流落幾人手 坐看變滅如春雪 忽然贈我意安在 兩脚未許甘衰歇
便尋轍迹訪崆峒 徑渡洞庭探禹穴 披榛覓藥採芝苗 刺虎鏃蛟擗蛇蝎
會教化作兩錢錐 歸來見公未華髮 問我鐵君無恙否 取出摩挲向公說

與潘三失解後飲酒

千金敵帶人誰買 半額蛾眉世所妍 顧我自爲都眊曠 憐君欲鬪小嬋娟
青雲豈易量他日 黃菊猶應似去年 醉裏未知誰得喪 滿江風月不論錢

蘇東坡詩集卷二十一

古今體詩 二十九首

正月二十日往岐亭郡人潘古郭三人送余於女王城東禪莊院
十日春寒不出門 不知江柳已搖村 稍聞泱泱流冰谷 盡放青青沒燒痕

數畝荒園留我住 半瓶濁酒待君溫 去年今日關山路 細雨梅花正斷魂

東坡八首并敘

余在黃州二年日以困匱故人馬正卿哀余乏食爲於郡中請故營地數十畝使得躬耕
其中地既久荒爲茨棘瓦礫之場而歲又大旱墾闢之勞筋力殆盡釋耒而嘆乃作是詩
自愍其勤庶幾來歲之入以忘其勞焉

廢壘無人顧 頽垣滿蓬蒿 誰能捐筋力 歲晚不償勞 獨有孤旅人 天窮無所逃
端來拾瓦礫 歲旱土不膏 崎嶇草棘中 欲刮一寸毛 喟然釋耒嘆 我廩何時高

【二】

荒田雖浪莽 高庫各有適 下隰種秔稌 東原蒔棗栗 江南有蜀士 桑果已許乞
好竹不難栽 但恐鞭橫逸 仍須卜佳處 規以安我室 家童燒枯草 走報暗井出
一飽未敢期 瓢飲已可必

【三】

自昔有微泉 來從遠嶺背 穿城過聚落 流惡壯蓬艾 去爲柯氏陂 十畝魚蝦會
歲旱泉亦竭 枯萍黏破塊 昨夜南山雲 雨到一犁外 泫然尋故瀆 知我理荒蕪
泥芹有宿根 一寸嗟猶在 雪芽何時動 春鳩行可賒

【四】

種稻清明前。樂事我能數。毛空暗春澤。鹹水開好語。分秧及初夏。漸喜風葉舉。月明看露上。一一珠垂縷。秋來霜穗重。顛倒相撐拄。但聞畦隴閒。蚱蜢如風雨。新春便入飯。玉粒照筐筥。我久食官倉。紅腐等泥土。行當知此味。口腹吾已許。

【五】

良農惜地力。幸此十年荒。桑柘未及成。一麥庶可望。投種未逾月。覆塊已蒼蒼。農父告我言。勿使苗葉昌。若欲富餅餌。要須縱牛羊。再拜謝苦言。得飽不敢忘。

【六】

種棗期可剝。種松期可斲。事在十年外。吾計亦已懸。十年何足道。千載如風電。舊聞李衡奴。此策疑可學。我有同舍郎。官居在瀟岳。遣我三寸甘。照座光卓犖。百栽倘可致。當及春冰渥。想見竹籬閒。青黃垂屋角。

【七】

潘子久不調。沽酒江南村。郭生本將種。賣藥西市垣。古生亦好事。恐是押牙孫。家有十畝竹。無時客叩門。我窮交舊絕。三子獨見存。從我於東坡。勞餉同一飧。

【八】

可憐杜拾遺。事與朱阮論。吾師卜子夏。四海皆弟昆。

馬生本窮士。從我二十年。日夜望我貴。求分買山錢。我今反累君。借耕輟茲田。刮毛龜背上。何時得成甍。可憐馬生癡。至今夸我賢。衆笑終不悔。施一當獲千。

次韻回文三首

春機滿織回文錦。紛淚揮殘露井桐。人遠寄情書字小。柳絲低日晚庭空。

【一】

紅牋短寫空深恨。錦句新翻欲斷腸。風葉落殘驚夢蝶。戍邊回雁寄情郎。

【二】

羞雲斂慘傷春暮。細縷詩成織意深。頭畔枕屏山掩恨。日昏塵暗玉窗琴。

附江南本織錦圖上回文原作三首

春晚落花餘碧草。夜涼低月半枯桐。人隨遠雁邊城暮。雨映疎簾繡閣空。

【一】

紅手素絲千字錦。故人新曲九迴腸。風吹絮雪愁繁骨。淚灑縑書恨見郎。

【三】

羞看一首回文錦。錦似文君別恨深。頭白自吟悲賦客。斷腸愁是斷絃琴。
數日前夢一僧出。二鏡求詩僧以鏡置日中。其影甚異。其一如芭蕉。其一
如蓮花。夢中作此詩。

君家有二鏡。光景如湛盧。或長如芭蕉。或圓如芙蓉。飛電著子壁。明月入我廬。
月下合三璧。日月跳明珠。問子是非我。我是非文殊。

岐亭道上見梅花。戲贈季常。

蕙死蘭枯菊亦摧。返魂香入嶺頭梅。數枝殘綠風吹盡。一點芳心雀啅開。
野店初嘗竹葉酒。江雲欲落豆稽灰。行當更向釵頭見。病起烏雲正作堆。

樂泉先生生日。以鐵拄杖為壽。二首

先生真是地行仙。住世因循五百年。每向銅人話疇昔。故教鐵杖闢清堅。
入懷冰雪生秋思。倚壁蛟龍護晝眠。遙想人天會。方丈。衆中驚倒野狐禪。

【二】

二年相伴影隨身。路徧江湖草木春。擗石舊痕猶在眼。閉門高節欲生鱗。
畏塗自衛真無敵。捷徑爭先卻累人。遠寄知公不嫌重。筆端猶自斡千鈞。

杭州故人信至齊安

昨夜風月清。夢到西湖上。朝來聞好語。扣戶得吳餉。輕圓白曬荔。脆醲紅螺醬。
更將西菴茶。勸我洗江瘴。故人情義重。說我必西向。一年兩僕夫。千里問無恙。
相期結書社。未怕供詩帳。還將夢魂去。一夜到江漲。

送牛尾狸與徐使君

時大雪

風捲飛花自入帷。一尊遙想破秋眉。泥深厭聽雞頭鶻。酒淺欣嘗牛尾狸。
通印子魚猶帶骨。披蘇黃雀漫多脂。殷勤送去煩纖手。爲我磨刀削玉肌。

四時詞四首

春雲陰陰雪欲落。東風和冷驚簾幙。漸看遠水綠生漪。未放小桃紅入夢。
佳人瘦盡雪膚肌。眉斂春愁知爲誰。深院無人剪刀響。應將白紵作春衣。

【二】

垂柳陰陰日初永。蔗漿酪粉金盤冷。簾額低垂紫燕忙。蜜脾已滿黃蜂靜。
高樓睡起翠眉頰。枕畔斜紅未肯勻。玉腕半揜雲碧袖。樓前知有斷腸人。

【三】

新愁舊恨眉生綠。粉汗餘香在斬竹。象牀素手脫寒衣。爍爍風燈動華屋。

夜香燒罷掩重局。香霧空濛月滿庭。抱琴轉軸無人見。門外空聞裂帛聲。

【四】

霜葉蕭蕭鳴屋角。黃昏陡覺羅衾薄。夜風搖動鎮帷尾。酒醒夢回聞雪落。起來呵手畫雙鴉。醉臉輕勻襯眼霞。真態生香誰畫得。玉如纖手嗅梅花。

太守徐君猷通守孟亨之皆不飲酒以詩戲之

孟嘉嗜酒桓溫笑。徐邈狂言孟德疑。公獨未知其趣爾。臣今時復一中之。風流自有高人識。通介寧隨薄俗移。二子有靈應撫掌。吾孫還有獨醒時。

姪安節遠來夜坐三首

南來不覺歲崢嶸。夜撥寒灰聽雨聲。遮眼文書原不讀。伴人燈火亦多情。嗟予潦倒無歸日。令汝蹉跎已半生。免使韓公悲世事。白頭還對短燈檠。

【二】

心衰面改瘦崢嶸。相見惟應識舊聲。永夜思家在何處。殘年知汝遠來情。畏人默坐成癡鈍。問舊驚呼半死生。夢斷酒醒山雨絕。笑看飢鼠上燈檠。

【三】

落第汝爲中酒味。吟詩我作忍飢聲。便思絕粒真無策。苦說歸田似不情。

腰下牛閒方解佩。洲中奴長足爲生。大弨一弛何緣設。已覺翻翻不受檠。

冬至日贈安節

我生幾冬至。少小如昨日。當時事父兄。上壽拜脫膝。十年閱彫謝。白髮催衰疾。瞻前惟兄三。顧後子由一。近者隔濤江。遠者天一壁。今朝復何幸。見此萬里姪。憶汝總角時。啼哭爲梨栗。今來能慷慨。志氣堅鐵石。諸孫行復爾。世事何時畢。詩成卻超然。老淚不成滴。

雪後到乾明寺遂宿

門外山光馬亦驚。階前屐齒我先行。風花誤入長春苑。雲月長臨不夜城。

未許牛羊傷至潔。且看鴉鵲弄新晴。更須攜被畱僧榻。待聽摧簷鴻竹聲。

伯父送先人下第歸蜀詩云人稀野店休安枕。路入靈關穩跨驢。安節將去。

爲誦此句因以爲韻作小詩十四首送之

索漠齊安郡。從來著放臣。如何風雪裏。更送獨歸人。

【二】

瘦骨寒將斷。衰髯摘更稀。未甘爲死別。猶恐得生歸。

【三】

日上氣瞰江，雪晴光眩野。記取到家時，鋤耒吾正把。

【四】

月明穿破裘，霜氣澀孤劔。歸來閉戶坐，默數來時店。

【五】

諸兄無可寄，一語會須酬。晚歲俱黃髮，相看萬事休。

【六】

故人如念我，爲說瘦癯癯。尙有身爲患，已無心可安。

【七】

吾兄喜酒人，今汝亦能飲。一杯歸誦此，萬事邯鄲枕。

【八】

東阡在何許，寒食江頭路。哀哉魏城君，宿草荒新墓。

【九】

臨分亦泫然，不爲窮途泣。東阡時一到，莫遣牛羊入。

【十】

我夢隨汝去，東阡松柏青。卻入西州門，永媿北山靈。

【十一】

乞糶何足羨，負米可忘艱。莫爲無車馬，含羞入劔關。

【十二】

我坐名過實，謹譁自招損。汝幸無人知，莫厭家山穩。

【十三】

竹筒與練裙，隨時畢婚嫁。無事若相思，征鞍還一跨。

【十四】

萬里卻來日，一卷仍獨居。應笑謀生拙，團團如磨臚。

次韻和王鞏六首

君談陽朔山，不作一錢直。巖藏兩頭蛇，瘴落千仞翼。雅宜驩兜放，頗訝虞舜陟。

暫來已可畏，覽鏡憂面黑。況子三年囚，苦霧變飲食。吉人終不死，仰荷天地德。

我來黃岡下，鼓枕江流碧。江南武昌山，向我如咫尺。春蔬黃土軟，凍筍蒼崖坼。

茲行我累君，乃反得安宅。遙知丹穴近，爲斲勾漏石。他年分刀圭，名字挂仙籍。

【一】

少年帶刀劔。但識從軍樂。老大服犂鋤。解佩付鎔鑠。雖無獻捷功。會賜力田爵。敲冰春搗紙。刈葦秋織箔。櫟林斬冬炭。竹塢收夏籜。四時俯有取。一飽天所酢。君生執綺閒。欲學非其脚。左右玉纖織。東薪誰爲縛。勿令聞此語。翠黛頰將惡。笑我一閒茅。婦姑紛六鑿。

【三】

欲結千年實。先摧二月花。故教窮到骨。要使壽無涯。久已逃天網。何須服日華。賓州在何處。爲子上栖霞。

【四】

鄰里有異趣。何妨傾蓋新。殊方君莫厭。數面自成親。默坐無餘事。回光照此身。他年赤墀下。玉立看垂紳。

【五】

平生我亦輕餘子。晚歲人誰念此翁。巧語屢曾遭惹惹。度詞聊復託芻蕘。子還可責同元亮。妻卻差賢勝敬通。僕文章雖不逮馮衍。而慷慨大節。乃不愧此翁。衍逢世祖英容好。士而獨不遇。流離播遷。與僕相似。而街妻如悍甚。僕少此一事故有勝敬通之句。若問我貧天所賦。不因遷謫始囊空。

【六】

君家玉臂貫銅青。下客何時見目成。勤把鉛黃記空樣。莫教竝管作蠻聲。熏衣漸嘆衙香少。擁髻遙憐夜語清。記取北歸攜過我。南江風浪雪山傾。

元豐四年十月二十二日。謁王文父齊萬于江南。坐上得陳季常書。報是月四日。神諤領兵深入破殺西夏六萬餘人。獲馬五千匹。衆喜忭唱樂。各飲一巨觥。

聞說官軍取乞聞。將軍旗鼓捷如神。故知無定河邊柳。得共中原雪絮春。

聞洮西捷報

漢家將軍一丈佛。詔賜天池八尺龍。露布朝馳玉關塞。捷書夜到甘泉宮。似聞指揮築上郡。已覺談笑無西戎。放臣不見天顏喜。但驚草木回春容。

記夢回文二首 并敘

十二月二十五日。大雪始晴。夢人以雪水烹小團茶。使美人歌以飲。余夢中爲作回文詩。覺而記其一句云。亂點餘花睡碧衫。意用飛燕故事也。乃續之爲二絕句云。

【一】

酡顏玉盃捧纖纖。亂點餘花睡碧衫。歌咽水雲凝靜院。夢驚松雪落空巖。

空花落盡酒傾缸。日上山融雪漲江。

蘇東坡詩集卷二十一

紅焙淺甌新火活。

龍團小碾鬪晴窗。

三朵花 并敘

房州通判許安世以書遺予言吾州有異人常戴三朵花莫知其姓名郡人因以三朵花名之能作詩皆神仙意又能自寫真人有得之者許欲以一本見惠乃爲作此詩

學道無成鬢已華 不勞千劫漫烝砂 歸來且看一宿覺 未暇遠尋三朵花
兩手欲遮瓶裏雀 四條深怕井中蛇 畫圖要識先生面 試問房陵好事家

次韻陳四雪中賞梅

臘酒詩催熟 寒梅雪鬪新 杜陵休嘆老 韋曲已先春 獨秀驚凡目 遺英臥逸民
高歌對三白 遲暮慰安仁

正月二十日與潘郭二生出郊尋春忽記去年是日同至女王城作詩乃

和前韻

東風未肯入東門 走馬還尋去歲村 人似秋鴻來有信 事如春夢了無痕
江城白酒三杯醞 野老蒼顏一笑溫 已約年年爲此會 故人不用賦招魂

是日偶至野人汪氏之居有神降于其室自稱天人李全字德通善篆字
用筆奇妙而字不可識云天篆也與予言有所會者復作一篇仍用前韻

酒渴思茶漫扣門 那知竹裏是仙村 已聞龜策通神語 更看龍蛇落筆痕

色瘁形枯應笑屈

道存日擊豈非溫

歸來獨掃空齋臥

猶恐微言入夢魂

浚井

古井沒荒萊 不食誰爲惻 瓶罌下兩綆 蛙蚓飛百尺 腥風被泥滓 空響聞點滴
上除青青芹 下洗鑿鑿石 沾濡愧童僕 杯酒暖寒栗 白水漸泓渟 青天落寒碧
云何失舊穢 底處來新潔 井在有無中 無來亦無失

紅梅三首

怕愁貪睡獨開遲 自恐冰容不入時 故作小紅桃杏色 尙餘孤瘦雪霜姿
寒心未肯隨春態 酒暈無端上玉肌 詩老不知梅格在 更看綠葉與青枝

【二】

雪裏開花卻是遲 何如獨占上春時 也知造物含深意 故與施朱發妙姿
細雨衰殘千顆淚 輕寒瘦損一分肌 不應便作天桃杏 數點微酸已著枝

【三】

幽人自恨探春遲 不見檀心未吐時 丹鼎奪胎那是寶 玉人頰頰更多姿
抱叢暗藥初含子 落盡穠香已透肌 乞與徐熙畫新樣 竹間璀璨出斜枝

次韻子由寄題孔平仲草菴

逢人欲覓安心法。到處先爲問道卷。盧子不須從若士。蓋公當自過曹參。
羨君美玉經三火。笑我枯桑困八蠶。猶喜大江同一味。故應千里共清甘。

二 蟲

君不見水馬兒。步步逆流水。大江東流日千里。此蟲趨趨長在此。君不見鷄濫堆。
決起隨衝風。隨風一去宿何許。逆風還落蓬蒿中。二蟲愚智俱莫測。江邊一笑無人識。

陳季常見過三首

仕宦常畏人。退居還喜客。君來輒館我。未覺難黍窄。東坡有奇事。已種十畝麥。
但得君眼青。不辭奴飯白。

【一】

送君四十里。只使一帆風。江邊千樹柳。落我酒杯中。此行非遠別。此樂固無窮。
但願長如此。來往一生同。

【三】

聞君開龜軒。東檻俯喬木。人言君畏事。欲作龜頭縮。我知君不然。朝飯仰陽谷。
餘光幸分我。不死安可獨。

謝人惠雲巾方寫二首

燕尾稱呼理未便。剪裁雲葉卻天然。無心只是青山物。覆頂宜歸紫府仙。
轉覺周家新樣俗。未容陶令舊名傳。鹿門佳士勤相贈。黑霧元霜合比肩。

【二】

胡鞞短勒格蟲疎。古雅無如此樣殊。妙手不勞盤作鳳。輕身只欲化爲鳧。
魏風褊儉堪羞葛。楚客豪華可笑珠。擬學梁家名解脫。便於禪坐作跏趺。

寒食雨二首

自我來黃州。已過三寒食。年年欲惜春。春去不容惜。今年又苦雨。兩月秋蕭瑟。
臥聞海棠花。泥汗燕脂雪。暗中偷負去。夜半真有力。何殊病少年。病起頭已白。

【一】

春江欲入戶。雨勢來不已。小屋如漁舟。濛濛水雲裏。空庖煮寒菜。破竈燒溼葦。
那知是寒食。但感烏銜紙。君門深九重。墳墓在萬里。也擬哭途窮。死灰吹不起。

徐使君分新火

臨臯亭中一危坐。三見清明改新火。溝中枯木應笑人。鑽斫不然誰似我。
黃州使君憐久病。分我五更紅一朵。從來破釜躍江魚。只有清詩嘲飯顆。

起攜蠟炬透空室。

欲事烹煎無一可。

為公分作無盡燈。

照破十方昏暗鎖。

次韻答元素并引

余舊有贈元素詞云。天涯同是傷流落。元素以為今日之先兆。且悲當時六客之存亡。六客蓋張子野。劉孝叔。陳令舉。李公擇。及元素與余也。

不愁春盡絮隨風。但喜丹砂入頰紅。流落天涯先有識。摩挲金狄會當同。已將地獄等天宮。

蜜酒歌并敘

西蜀道士楊世昌善作蜜酒。絕醇醲。余既得其方。作此歌以遺之。

眞珠爲漿玉爲醴。六月田夫汗流泚。不如春甕自生香。蜂爲耕耘花作米。

一日小沸魚吐沫。二日眩轉清光活。三日開甕香滿城。快鴻銀瓶不須撥。

百錢一斗濃無聲。甘露微濁醍醐清。君不見南園采花蜂似雨。天教釀酒醉先生。

先生年來窮到骨。問人乞米何曾得。世閒萬事真悠悠。蜜蜂大勝監河侯。

又一首答二猶子與王郎見和

脯青苔。炙青蒲。爛蒸鵝鴨乃瓠壺。煮豆作乳脂爲酥。高燒油燭斟蜜酒。

貧家百物初何有。古來百巧出窮人。搜羅假合亂天真。詩書與我爲麴糵。

醞釀老夫成搢紳。質非文是終難久。脫冠還作扶犁叟。不如蜜酒無煖寒。

冬不加甜夏不酸。老夫作詩殊少味。愛此三篇如酒美。封胡羯末已可憐。

不知更有王郎子。

謝陳季常惠一搢巾

夫子曾中萬斛寬。此巾何事小團團。半升僅漉淵明酒。二寸纔容子夏冠。

好戴黃金雙得勝。休教白苧一生酸。臂弓腰箭何時去。直上陰山取可汗。

贈黃山人

面頰照人元自赤。眉毛覆眼見來烏。倦游不擬談元化。示病何訪出白鬚。

絕學已生真定慧。說禪長笑老浮屠。東坡若肯三年住。親與先生看藥爐。

贈人

別後休論信息疎。仙凡自古亦殊途。蓬山路遠人難到。霜柏威高道轉孤。

舊賞未應忘楚國。新詩聞已滿皇都。誰憐澤畔行吟者。目斷長安貌欲枯。

問大冶長老乞桃花茶栽東坡

周詩記茶苦。茗飲出近世。初緣厭梁肉。假此雪昏滯。嗟我五畝園。桑麥苦蒙翳。

不令寸地閒。更乞茶子栽。飢寒未知免。已作太飽計。庶將通有無。農末不相戾。

春來凍地裂，紫筍森已銳。牛羊煩呵叱，筐筥未敢睨。江南老道人，齒髮日夜逝。他年雪堂品，空記桃花裔。

寄子由

厭暑多應一向慵，銀鈎秀句益疎通。城頭高柳漫搖風，也知堆案文書滿。未暇開軒硯墨中，誰把前言語化工。

次韻孔毅父久旱已而甚雨三首

飢人忽夢飯飯溢，夢中一飽百憂失。只知夢飽本來空，未悟真飢定何物。我生無田食破硯，爾來硯枯磨不出。去年太歲空在酉，旁舍壺漿不容乞。今年旱勢復如此，歲晚何以黔吾突。陰陽有時雨有數，況欲稽首號泥佛。民是天民天自卹，未肯聃耳爭投骨。我雖窮苦不如人，要亦自是民之一。獨與蚊雷共圭華，君視我門誰肯屈。可憐明月如潑水，夜半清光翻我室。風從南來非雨候，且爲疲人洗蒸鬱。寒裳一和快哉謔，未暇飢寒念明日。

【二】

去年東坡拾瓦礫，自種黃桑三百尺。今年刈草蓋雪堂，日炙風吹面如墨。

平生懶惰今始悔，老大勸農天所直。沛然例賜三尺雨，造物無心悅難測。四方上下同一雲，甘霖不爲龍所隔。蓬蒿下濕迎曉未，燈火新涼催夜織。老夫作罷得甘寢，臥聽牆東人響屐。奔流未已坑谷平，折葦枯荷恣漂溺。腐儒蠹糲支百年，力耕不受衆目憐。破陂漏水不耐旱，人力未至求天全。會當作塘徑千步，橫斷西北遮山泉。四鄰相率助舉杵，人人知我囊無錢。明年共看決渠雨，飢飽在我寧關天。誰能伴我田閒飲，醉倒惟有支頭甌。

【二】

天公號令不再出，十日愁霖併爲一。君家有田水冒田，我家無田憂入室。不如西州楊道士，萬里隨身惟兩膝。沿流不惡泝亦佳，一葉扁舟任飄突。山芎麥麴都不用，泥行露宿終無疾。夜來飢腸如轉雷，旅愁非酒不可開。楊生自言識音律，洞簫入手清且哀。不須更待秋井塌，見人白骨方銜杯。

魚蠻子

江淮水爲田，舟楫爲室居。魚蝦以爲糧，不耕自有餘。異哉魚蠻子，本非左衽徒。連排入江住，竹瓦三尺廬。於焉長子孫，戚施且侏儒。擘水取魴鯉，易如拾諸塗。破釜不著鹽，雪鱗芼青蔬。一飽便甘寢，何異獮與狙。人閒行路難，踏地出賦租。

不如魚鬢子，駕浪浮空虛。空虛未可知，會當算舟車。鬢子叩頭泣，勿語桑大夫。

夜坐與邁聯句

清風來無邊，明月翳復吐。白松聲滿虛空，竹影侵半戶。白暗枝有驚鵲，壞壁鳴飢鼠。白露葉耿高梧，風螢落空廡。白微涼感團扇，古意歌白紵。白樂哉今夕游，獲此陪杖屨。白傳家詩律細，已自過宗武。短詩膝上成，聊以感懷祖。

弔李臺卿并敘

李臺卿字明仲，廬州人。貌陋甚，性介不羣，而博學強記，罕見其比。好左氏，有史學，考正同異，多所發明。知天文，律歷千歲之日，可坐敷也。賦謫居黃州，臺卿為麻城主簿，始識之。既罷居於廬，而曹光州演甫以書報其亡。臺卿光州之妻黨也。

我初未識君，人以君為笑。垂頭老鶴雀，煙雨靈七竅。敝衣來過我，危坐若持釣。楮衰半面新，礙蔑一語妙。徐徐涉其澗，極望不可徼。卻觀元嫵媚，士固難輕料。看書眼如月，罅隙靡不照。我老多遺忘，得君如再少。從橫通雜藝，甚博且知要。所恨言無文，至老幽不耀。其生世莫識，已死誰復弔。作詩遺故人，庶解俗子譏。

曹既見和復次韻

造物本兒嬉，風噫雷電笑。誰令妄驚怪，失匕號萬竅。人人走江湖，一一操網釣。

偶然連六鰲，便謂此手妙。空令任公子，三歲跨海徼。長貧固不辭，一死實未料。難將著草算，除用佛眼照。何人嗣家學，恨子兒尙少。嗟我與曹君，衰老世不要。空言今無救，奇志後必耀。吟君五字詩，義重千金弔。收藏慎勿出，免使羣兒譏。

弔徐德占并引

余初不識德占，但聞其初為呂惠卿所薦，以處士用。元豐五年三月，偶以事至薪水。德占聞余在傳舍，惠然見訪，與之語，有過人者。是歲十月，聞其遇禍，作詩弔之。
美人種松柏，欲使低映門。栽培雖易長，流惡病其根。哀哉歲寒姿，愜懣誰與論。竟為明所誤，不免刀斧痕。一遭兒女污，始覺山林尊。從來覓棟梁，未省傍籬藩。南山隔秦嶺，千樹龍蛇奔。大厦若畏傾，萬牛何足言。不然老巖壑，含抱枝生孫。死者不可悔，吾將遺後昆。

武昌主簿吳亮君采攜其友人沈君十二琴之說與高齋先生空同子之文。太平之頌以示予，予不識沈君而讀其書如見其人。如聞十二琴之聲。予昔從高齋先生游，嘗見其實一琴，無銘無識，不知其何代物也。請以告。

二子使從先生求觀之，此十二琴者，待其琴而後和。元豐五年閏六月。若言琴上有琴聲，放在匣中何不鳴。若言聲在指頭上，何不於君指上聽。

李委吹笛并引

元豐五年十二月十九日東坡生日置酒赤壁磯下踞高峰俯鵲巢酒酣笛聲起於江上客有郭古二生頗知音謂坡曰笛聲有新意非俗工也使入問之則進士李委聞坡生日作新曲曰鶴南飛以獻呼之使前則青巾紫裘腰笛而已既奏新曲又快作數弄嘹然有穿雲裂石之聲坐客皆引滿醉倒委袖出嘉紙一幅曰吾無求於公得一絕句足矣坡笑而從之

山頭孤鶴向南飛

載我南游到九疑

下界何人也吹笛

可憐時復犯龜茲

蜀僧明操思歸書龍邱子壁

久厭勞生能幾日

莫將歸思擾衰年

片雲會得無心否

南北東西只一天

蘇東坡詩集卷二十一

古今體詩四首十

次韻孔毅父集古人句見贈五首

羨君戲集他人詩

指呼市人如使兒

天邊鴻鵠不易得

便令作對隨家雞

退之驚笑子美泣

問君久假何時歸

世閒好句世人共

明月自滿千家墀

【二】

紫駝之峰人莫識

雜以雞豚真可惜

今君坐致五侯鯖

盡是猩唇與熊白

路旁拾得半段槍

何必開爐鑄矛戟

用之如何在我耳

入手當令君喪魄

【三】

天下幾人學杜甫

誰得其皮與其骨

劃如太華當我前

跋特欲上驚巒嵒

名章俊語紛交衡

無人巧會當時情

前生子美只君是

信手拈得俱天成

【四】

詩人雕刻閒草木

搜抉肝腎神應哭

不如默誦千萬首

左抽右取談笑足

夜吟石鼎聲悲秋

可憐好事劉與侯

何當一醉百不問

我欲眠矣君歸休

【五】

膏明蘭臭俱自焚

象牙翠羽戕其身

多言自古為數窮

微中有時堪解紛

癡人但數羊羔兒

不知何者是左慈

千章萬句卒非我

急走捉君應已遲

六年正月二十日復出東門仍用前韻

亂山環合水侵門

身在淮南盡處村

五畝漸成終老計

九重新埽舊巢痕

豈惟見慣沙鷗熟。已覺來多釣石溫。長與東風約今日。暗香先返玉梅魂。

食甘

一雙羅帕未分珍。林下先嘗愧逐臣。露葉霜枝翦寒碧。金釵玉指破芳辛。清泉蕞蕮先流齒。香霧霏霏欲噀人。坐客殷勤爲收子。千奴一掬奈吾貧。

大寒步至東坡贈巢三

春雨如暗塵。春風吹倒人。東坡數間屋。巢子誰與鄰。空牀斂敗絮。破竈鬱生薪。相對不言寒。哀哉知我貧。我有一瓢酒。獨飲良不仁。未能積我頰。聊復濡子唇。故人千鍾祿。馭吏醉吐茵。那知我與子。坐作寒蟄呻。努力莫怨天。我爾皆天民。行看花柳動。共享無邊春。

元修菜并敘

菜之美者有吾鄉之巢故人巢元修嗜之。余亦嗜之。元修云。使孔北海見。當復云。吾家菜耶。因謂之元修菜。余去鄉十有五年。思而不可得。元修適自蜀來。見余於黃。乃作是詩。使歸致其子。而種之東坡之下云。

彼美君家菜。鋪田綠茸茸。豆莢圓且小。槐芽細而豐。種之秋雨餘。擢秀繁霜中。欲花而未萼。一一如青蟲。是時青裙女。採擷何怱怱。烝之復湘之。香色蔚其儔。

點酒下鹽豉。縷橙芼薑葱。那知雞與豚。但恐放箸空。春盡苗葉老。耕翻煙雨叢。潤隨甘澤化。暖作青泥融。始終不我負。力與糞壤同。我老忘家舍。楚音變兒童。此物獨嫵媚。終年繫余胸。君歸致其子。囊盛勿函封。張鷟移苜蓿。適用如葵菘。馬援載薤苡。羅生等蒿蓬。懸知東坡下。培鹵化千鍾。長使齊安民。指此說兩翁。

三月三日點燈會客

江上東風浪接天。苦寒無賴破春妍。試開雲夢羔兒酒。快瀉錢塘藥玉船。蠶市光陰非故國。馬行燈水記當年。冷煙濕雪梅花在。畱得新春作上元。

日日出東門

日日出東門。步尋東城游。城門抱關卒。笑我此何求。我亦無所求。駕言寫我憂。意適忽忘返。路窮乃歸休。懸知百歲後。父老說故侯。古來賢達人。此路誰不由。百年寓華屋。千載歸山邱。何事羊公子。不肯過西州。

南堂五首

江上西山半隱堤。此邦臺館一時西。南堂獨有西南向。臥看千帆落淺溪。

【11】

暮年眼力嗟猶在。多病頭毛卻未華。故作明窗書小字。更開幽室養丹砂。

【三】

他時夜雨困移床。坐厭愁聲點客腸。一聽南堂新瓦響。似聞東塢小荷香。

【四】

山家爲割千房蜜。稚子新畦五畝蔬。更有南堂堪著客。不憂門外故人車。

【五】

掃地焚香閉閣眠。簾紋如水帳如煙。客來夢覺知何處。挂起西窗浪接天。

次韻子由種杉竹

吏散庭空雀噪簷。閉門獨宿夜厭厭。似聞梨棗同時種。應與杉篁刻日添。

糟麴有神熏不醉。雪霜誇健巧相沾。先生坐侍清陰滿。空使人人嘆滯淹。

孔毅父妻挽詞

結襦記初歡。同穴期晚歲。擇夫得溫嶠。生子勝王濟。高風相賓友。古義仍兄弟。

從君吏隱中。窮達初不計。云何抱沈疾。俯仰便一世。幽陰凄房櫺。芳澤在巾袂。

百年縱得滿。此路行亦逝。那將有限身。長鴻無益涕。君文照今古。不比山石脆。

當觀千字誄。寧用百金瘞。

初秋寄子由

百川日夜逝。物我相隨去。惟有宿昔心。依然守故處。憶在懷遠驛。閉門秋暑中。

藜藿對書史。揮汗與子同。西風忽淒厲。落葉穿戶牖。子起尋袂衣。感歎執我手。

朱顏不可恃。此語君莫疑。別離恐不免。功名定難期。當時已悽斷。況此兩衰老。

失途既難追。學道恨不早。買田秋已議。築室春當成。雪堂風雨夜。已作對牀聲。

和黃魯直食筍次韻

飽食有殘肉。飢食無餘菜。紛然生喜怒。似被狙公賣。爾來誰獨覺。凜凜白下宰。

一飯在家僧。至樂甘不壞。多生味蠶簡。食筍乃餘債。蕭然映樽俎。未肯雜菘芥。

君看霜雪姿。童稚已耿介。胡爲遭暴橫。三嗅不忍噉。朝來忽解籜。勢迫風雷噫。

尙可餉三閭。飯筒纏五采。

聞子由爲郡僚所摺恐當去官

少學不爲身。宿志固有在。雖然敢自必。用舍置度外。天初若相我。發跡造宏大。

豈敢負所付。捐軀欲投會。寧知事大纒。舉步得狼狽。我已無可言。墮甌難追悔。

子雖僅自免。雞肋安足賴。低回畏罪罟。黽勉敢言退。若人疑或使。爲子得微罪。

時哉歸去來。共抱東坡耒。

次韻王鞏南還初歸二首

蘇東坡詩集卷二十二

問君謫南賓。野葛食幾尺。逢人瘴髮黃。入市胡眼碧。三年不易過。坐睨倚天壁。歸來貌如故。妙語仍破鎗。那能廢詩酒。亦未妨禪寂。願爲尙書郎。還賜上方息。

【二】

江家舊池臺。修竹圍一尺。歸來萬事非。惟見秦淮碧。平生痛飲處。遺墨鴉棲壁。西來故父客。金印雜鳴鏑。三槐老更茂。花絮春寂寂。中微未可料。家廟藏赤舄。孔毅父以詩戒飲酒問買田且乞墨竹次其韻

酒中真復有何好。孟生雖賢未聞道。醉時萬慮一掃空。醒後紛紛如宿草。十年措洗見真妄。石女無兒焦穀稿。此身何異貯酒瓶。滿輒予人空自倒。武昌痛飲豈吾意。性不違人遭客惱。君家長松十畝陰。借我一菴聊洗心。我田方寸耕不盡。何用百頃糜千金。枕書睡熟呼不起。好學憐君工雜擬。且將墨竹換新詩。潤色何須待東里。

任師中挽詞

大任剛烈世無有。疾惡如風朱伯厚。小任溫毅老更文。聰明慈愛小馮君。兩任才行不須說。疇昔竝友吾先人。相看半作晨星沒。可憐太白配殘月。大任先去冢未乾。小任相繼呼不還。強寄一樽生死別。樽中有淚酒應酸。

貴賤賢愚同盡耳。君今不盡緣賢子。人閒得喪了無憑。只有天公終可倚。

子由作二頌頌石臺長老問公手寫蓮經字如黑蟻且誦萬遍脇不至席二十餘年予亦作二首

【一】

眼前擾擾黑蚍蜉。口角霏霏白唾珠。要識吾師無礙處。試將燒卻看曠無。眼睛心地兩虛圓。脇不沾牀二十年。誰信吾師非不睡。睡蛇已死得安眠。

鄧忠臣母周氏挽詞

微生真草木。無處謝天力。慈顏如春風。不見桃李實。古今抱此恨。有志俯仰失。公子豈先知。戰戰常惜日。吾君日月照。委曲到肝膈。哀哉人子心。吾何愛一邑。家庭拜前後。粲然發笑色。豈比黃壤下。焚瘞千金璧。若人道德人。視此亦戲劇。聊償曾閔意。遽與仙佛寂。孤纒臥江渚。永望墳墓隔。作詩相楚挽。感動淚再滴。

徐君猷挽詞

一舸南游遂不歸。清江赤壁照人悲。請看行路無從涕。盡是當年不忍欺。雪後獨來栽柳處。竹閒行復采茶時。山城散盡尊前客。舊恨新愁只自知。

洗兒戲作

人皆養子望聰明。我被聰明誤一生。

惟願孩兒愚且魯。

無災無難到公卿。

和蔡景繁海州石室

| | | | |
|----------|----------|----------|----------|
| 芙蓉仙人舊游處。 | 蒼藤翠壁初無路。 | 戲將桃核裹黃泥。 | 石閒散擲如風雨。 |
| 坐令空山作錦繡。 | 倚天照海花無數。 | 花閒石室可容車。 | 流蘇寶蓋窺靈宇。 |
| 何年霹靂起神物。 | 玉棺飛出王喬墓。 | 當時醉臥動千日。 | 至今石縫餘糟粕。 |
| 仙人一去五十年。 | 花老室空誰作主。 | 手植數松今偃蓋。 | 蒼髯白甲低瓊戶。 |
| 我來取酒酌先生。 | 後車仍載胡琴女。 | 一聲冰鐵散巖谷。 | 海爲瀾翻松爲舞。 |
| 爾來心賞復何人。 | 持節中郎醉無伍。 | 獨臨斷岸呼日出。 | 紅波碧嶼相吞吐。 |
| 徑尋我語覓餘聲。 | 拄杖彭鏗叩銅鼓。 | 長篇小字遠相寄。 | 一唱三歎神懷楚。 |
| 江風海雨入牙頰。 | 似聽石室胡琴語。 | 我今老病不出門。 | 海山巖洞知何許。 |
| 門外桃花自開落。 | 牀頭酒甕生塵土。 | 前年開閣放柳枝。 | 今年洗心歸佛祖。 |
| 夢中舊事時一笑。 | 坐覺俯仰成今古。 | 願君不用刻此詩。 | 東海桑田真且暮。 |

橄欖

紛紛青子落紅鹽。

正味森森苦且嚴。

待得微甘回齒頰。

已輸崖蜜十分甜。

東坡

雨洗東坡月色清。

市人行盡野人行。

莫嫌荖确坡頭路。

自愛鏗然曳杖聲。

生日王郎以詩見慶次其韻并寄茶二十一片

| | | | |
|----------|----------|----------|----------|
| 折楊新曲萬人趨。 | 獨和先生于菟子。 | 但信積藏終自售。 | 豈知盤脫本無樵。 |
| 塌從冰叟來游宦。 | 肯伴臞仙亦號儒。 | 棠棣竝爲天下士。 | 芙蓉曾到海邊郭。 |
| 不嫌霧谷蠶松柏。 | 終恐虹梁荷棟桴。 | 高論無窮如鋸屑。 | 小詩有味似連珠。 |
| 感君生日遙稱壽。 | 祝我餘年老不枯。 | 未辦報君青玉案。 | 建溪新餅截雲腴。 |

柏石圖詩 并敘

陳公弼家藏柏石圖。其子慥季常傳寶之。東坡居士作詩以爲之銘。

柏生兩石閒。天命本如此。雖云生之艱。與石相終始。韓子俯仰人。但愛平地美。士膏難糞壤。成壞幾何耳。君看此槎牙。豈有可移理。蒼龍轉玉骨。黑虎抱金柅。畫師亦可人。使我毛髮起。當年落筆意。正欲護韓子。

和秦太虛梅花

| | | | |
|----------|----------|----------|----------|
| 西湖處士骨應槁。 | 只有此詩君壓倒。 | 東坡先生心已灰。 | 爲愛君詩被花惱。 |
| 多情立馬待黃昏。 | 殘雪消遲月出早。 | 江頭千樹春欲闌。 | 竹外一枝斜更好。 |
| 孤山山下醉眠處。 | 點綴裙腰紛不掃。 | 萬里春隨逐客來。 | 十年花送佳人老。 |

去年花開我已病

今年對花還草草

不知風雨捲春歸

收拾餘香還界吳

再和潛師

化工未議蘇羣稿
風清月落無人見
吳山道人心似水
東坡習氣除未盡

先向寒梅一傾倒
洗妝自趁霜鐘早
眼淨塵空無可掃
時復長篇書小草

江南無雪春瘴生
惟有飛來雙白鷺
故將妙語寄多情
且撼長條餐落英

為散冰花除熱惱
玉羽瓊枝鬪清好
橫機欲試東坡老
忍飢未擬窮呼吳

海棠

東風渺渺泛崇光

香霧空濛月轉廊

只恐夜深花睡去

故燒高燭照紅妝

次韻曹九章見贈

蓬瑗知非我所師

流年已似手中著

正平獨肯從文學

中散何曾斬孝尼

賣劍買牛真欲老

得錢沽酒更無疑

雞豚異日為同社

應有千篇唱和詩

上巳日與二三子攜酒出遊隨所見輒作數句明日集之為詩故辭無倫次

薄雲霏霏不成雨
三杯卯酒人徑醉
出簷叢枳十圍大

杖藜曉入千花塢
一枕春眠日亭午
寫真素壁千蛟舞

柯邱海棠吾有詩
竹間老人不讀書
東坡作塘今幾尺

獨笑深林誰敢侮
畱我閉門誰教汝
攜酒一勞農工苦

卻尋流水出東門

坡垣古塹花無主

臥開桃李為誰妍

對立鸚鵡相媚嫵

閒尊藉草勸行路

不惜春衫汚泥土

寒裳共過春草亭

扣門卻入韓家園

轆轤繩斷井深碧

秋千挂索人何所

映籬空復小桃枝

乞漿不見嚙門女

南上古臺臨斷岸

雪陣翻空迷仰俯

故人餽我玉葉羹

火冷煙消誰為煮

崎嶇東纒下荒徑

姪姪隔花聞好語

更隨落影盡餘尊

卻傍孤城得僧宇

主人勸我洗足眠

倒牀不必聞鐘鼓

明朝門外泥一尺

始悟三更雨如許

平生所向無一遂

茲游何事天不阻

固知我友不終窮

豈弟君子神所予

劉監倉家煎米粉作餅子余云為甚酥潘邠老家造邊巡酒余飲之云莫作

醋錯著水來否後數日攜家飲郊外因作小詩戲劉公求之

野飲花開百物無

杖頭惟挂一葫蘆

已傾潘子錯著水

更覓君家為甚酥

芥舟只合在坳堂

紙帳心期老孟光

不道山人今忽去

曉猿啼處月茫茫

和參寥

蘇東坡詩集卷二十三

古今體詩四首十

別黃州

病瘡老馬不任機，猶向君王得敝韓。
桑下豈無三宿戀，尊前聊與一身歸。
長腰尚載撐腸米，闊領先裁蓋瘵衣。
投老江湖終不失，來時莫遣故人非。

過江夜行武昌山聞黃州鼓角

清風弄水月銜山，幽人夜度吳王峴。
黃州鼓角亦多情，送我南來不辭遠。

江南又聞出塞曲，半雜江聲作悲健。
誰言萬方聲一槩，鼙憤龍愁爲余變。

我記江邊枯柳樹，未死相逢真識面。
他年一葉泝江來，還吹此曲相迎餞。

岐亭五首并敘

元豐三年正月，余始謫黃州，至岐亭北二十五里，山上有白馬青蓋來迎者，則余故人陳慥季常也。爲畱五日，賦詩一篇而去。明年正月，復往見之。季常使人勞余於中途，余久不殺，恐季常之爲余殺也，則以前韻作詩，爲殺戒，以遺季常，自爾不復殺。而岐亭之人，多化

之，有不食肉者。其後數往見之，往必作詩，詩必以前韻。凡余在黃四年，三往見季常。季常七來見余，蓋相從百餘日也。七年四月，余量移汝州，自江淮徂洛，送者皆止慈湖，而季常獨至九江，乃復用前韻，通爲五首以贈之。

昨日雲陰重，東風融雪汁。
遠林草木暗，近舍煙火溼。
下有隱君子，嘯歌方自得。
知我犯寒來，呼酒意頗急。
撫掌動鄰里，遠村捉鶯鳴。
房櫓鏘器聲，蔬果照巾幘。
久聞菡萏美，初見新芽赤。
洗盞酌鶯黃，磨刀削熊白。
須臾我徑醉，坐睡落巾幘。
醒時夜向闌，唧唧銅餅泣。
黃州豈云遠，但恐朋友缺。
我當守所主，君亦無此客。
朝來靜菴中，惟見蜂蠶集。

【二】

我哀籃中蛤，閉口護殘汁。
又哀網中魚，開口吐微濕。
列腸彼交病，過分我何得。
相逢未寒溫，相勸此最急。
不見盧懷慎，炆壺似蒸鴨。
坐客皆忍笑，髡然發其鬣。
不見王武子，每食刀几赤。
琉璃載烝豚，中有入乳白。
盧公信寒陋，衰髮得滿幘。
武子雖豪華，未死神已泣。
先生萬金璧，護此一蟻缺。
一年如一夢，百歲真過客。
君無廢此篇，嚴詩編杜集。

【三】

君家蜂作窠。歲歲添漆汁。我身牛穿鼻。卷舌聊自濕。二年三過君。此行真得得。愛君似劇孟。扣門知緩急。家有紅頰兒。能唱綠頭鴨。行當隔簾見。花霧輕罽罽。爲我取黃封。親拆官泥赤。仍須煩素手。自點葉家白。樂哉無一事。十年不蓄積。閉門弄添丁。哇笑雜呱泣。西方正苦戰。誰補將帥缺。披圖見八陣。合散更主客。不須親戎行。坐論教君集。

【四】

酸酒如蠶湯。甜酒如蜜汁。三年黃州城。飲酒但飲濕。我如更揀擇。一醉豈易得。幾思壓苜蓿。禁網日夜急。西鄰椎髻盡。醉倒猪與鴨。君家大如掌。破屋無遮罽。何從得此酒。冷面妬君赤。定應好事人。千石供李白。爲君三日醉。蓬髮不暇幘。夜深欲踰垣。臥想春甕泣。君奴亦笑我。鬢齒行禿缺。三年已四至。歲歲遭惡客。人生幾兩屐。莫厭頻來集。

【五】

枯松強鑽膏。槁竹欲瀝汁。兩窮相值遇。相哀莫相濕。不知我與君。交游竟何得。心法幸相語。頭然未爲急。願爲穿雲鶴。莫作將雛鴨。我行及初夏。煮酒映疏罽。故鄉在何許。西望千山赤。茲游定安歸。東泛萬頃白。一歡寧復再。起舞花墮幘。

將行出苦語。不用兒女泣。吾非固多矣。君豈無一缺。各念別時言。閉戶謝衆客。空堂淨掃地。虛白道所集。

初入廬山三首

青山若無素。偃蹇不相親。要識廬山面。他年是故人。

【二】

自昔懷清賞。神遊杳靄閒。如今不是夢。真個是廬山。

【三】

芒屨青竹杖。自挂百錢游。可怪深山裏。人人識故侯。

贈東林總長老

溪聲便是廣長舌。山色豈非清淨身。夜來八萬四千偈。他日如何舉似人。

題西林壁

橫看成嶺側成峯。遠近高低各不同。不識廬山真面目。只緣身在此山中。

圓通禪院先君舊游也。四月二十四日晚至宿焉。明日先君忌日也。乃手寫寶積獻蓋頌佛一偈。以贈長老。偈公撫掌笑曰。昨夜夢寶蓋飛下。著處輒出火。豈此祥乎。乃作是詩。院有蜀僧宣逮。事訥長老。識先君云。

石耳峯頭路接天。梵音堂上月臨泉。此生初飲廬山水。他日徒參雪竇禪。
袖裏寶書猶未出。夢中飛蓋已先傳。何人更識嵇中散。野鶴昂藏未是僊。

子由在筠作東軒記。或戲之為東軒長老。其婿曹煥往筠。余作一絕句送。
曹以戲子由。曹過廬山。以示圓通。慎長老。慎欣然亦作一絕。送客出門。歸
入室。跌坐化去。子由聞之。仍作二絕。一以答余。一以答慎。明年余過圓通。
始得其詳。乃追次慎韻。

君到高安幾日回。一時斗擻舊塵埃。贈君一籠牢收取。盛取東軒長老來。

【二】

大士何曾有生死。小儒底處覓窮通。偶畱一映千山上。散作人閒萬竅風。

余過溫泉壁上有詩云。直待衆生總無垢。我方清冷混常流。問人云。長老
可遵作。遵已退居圓通。亦作一絕。

石龍有口口無根。自在流泉誰吐吞。若信衆生本無垢。此泉何處覓寒溫。

世傳徐凝瀑布詩云。一條界破青山色。至為塵陋。又偽作樂天詩。稱羨此
句。有賽不得之語。樂天雖涉淺易。然豈至是哉。乃戲作一絕。

帝遣銀河一派垂。古來惟有謫仙詞。飛流濺沫知多少。不與徐凝洗惡詩。
書李公擇白石山房。

偶尋流水上崔嵬。五老蒼顏一笑開。若見謫仙煩寄語。康山頭白早歸來。

廬山二勝并敘

余游廬山。南北得十五六奇勝。殆不可勝紀。而懶不作詩。獨擇其尤佳者。作二首。

開先漱玉亭

高巖下赤日。深谷來悲風。擘開青玉峽。飛出兩白龍。亂沫散霜雪。古潭搖清空。
餘流滑無聲。快瀉雙石硯。我來不忍去。月出飛橋東。蕩蕩白銀闕。沈沈水精宮。
願隨琴高生。脚踏赤鯁公。手持白芙蓉。跳下清冷中。

棲賢三峽橋

吾聞太山石。積日穿綫瀑。況此百雷霆。萬世與石鬪。深行九地底。險出三峽右。
長輕不盡溪。欲滿無底竇。跳波翻潛魚。震響落飛狖。清寒入山骨。草木盡堅瘦。
空濛煙靄閉。瀕洞金石奏。彎彎飛橋出。激激半月發。玉淵神龍近。雨雹亂晴晝。
垂緋得清甘。可嚙不可漱。

自興國往筠。宿石田驛。南廿五里野人舍。

谿上青山三百疊。快馬輕衫來一抹。倚山修竹有人家。橫道清泉知我渴。
芒屨竹枝自輕軟。蒲薦松牀亦香滑。夜深風露滿中庭。唯有孤螢自開闔。

過建昌李野夫公擇故居

彭蠡東北源，廬阜西南麓。何人修水上，種此一雙玉。思之不可見，破宅餘修竹。四鄰戒莫犯，十畝森似束。我來仲夏初，解籜呈新綠。幽鳥向我鳴，野人留我宿。裏徇不忍去，微月挂喬木。遙想他年歸，解組巾一幅。對牀老兄弟，夜雨鳴竹屋。臥聽鄰寺鐘，書窗有殘燭。

將至筠先寄遲適遠三猶子

露宿風餐六百里，明朝飲馬南江水。未見豐盈犀角兒，先逢玉雪王郎子。對牀欲作連夜語，念汝還須載星起。猶是髭髭垂兩耳，憶過濟南春未動。三子出迎殘雪裏，我時移守古河東。酒肉淋漓渾舍喜，而今憔悴一羸馬。逆旅擔夫相汝爾，出城見我定驚嗟。身健窮愁不須恥，我爲乃翁留十日。掣電一歡何足恃，惟當火急作新詩。一醉兩翁勝酒美。

端午游真如遲適遠從子由在酒局

一與子由別，卻數七端午。身隨綵絲繁，心與昌歎苦。今年匹馬來，佳節日夜數。兒童喜我至，典衣具雞黍。水餅既懷鄉，飯筒仍感楚。謂言必一醉，快作西川語。寧知是官身，糟麴困重煮。獨攜三子出，古剎訪禪祖。高談付梁羅，詩律到阿虎。

歸來一調笑，慰此長齟齬。

別子由三首兼別遲

知君念我欲別難，我今此別非他日。風裏楊花雖未定，雨中荷葉終不濕。三年磨我費百書，一見何止得雙璧。願君亦莫嗟雷滯，六十小劫風雨疾。

【二】

先君昔愛洛陽居，我今亦過嵩山麓。水南卜築吾豈敢，試向伊川買修竹。又聞緱山好泉眼，傍市穿林瀉冰玉。遙想茅軒照水開，兩翁相對清如鶴。

【三】

兩翁歸隱非難事，惟要傳家好兒子。憶昔汝翁如汝長，筆頭一落三千字。世人聞此皆大笑，慎勿生兒兩翁似。不知楞櫟薦明堂，何似鹽車壓千里。

初別子由至奉新作

雙鵲先我來，飛上東軒背。書隨好夢到，人與佳節會。一歡難把玩，回首了無在。卻波來時溪，斷橋號淺瀨。茫茫著天濶，靄靄孤城背。青山眊矂中，落日淒涼外。盛衰豈我意，離合非所礙。何以解我憂，粗了一事大。

白塔鋪歇馬

甘山廬阜鬱相望。林隙熒微漏日光。吳國晚蠶初斷葉。占城蚤稻欲移秧。迢迢澗水隨人急。冉冉巖花撲馬香。望眼儘從飛鳥遠。白雲深處是吾鄉。

同年程筠德林求先墳二詩

思成堂

宰樹連山谷。祠堂照路隅。養松無觸鹿。助祭有馴烏。歸夢先寒食。兒啼到白須。遙知鄰里化。醉叟道爭扶。

歸真亭

舊笑桓司馬。今師鄭大夫。不知徂歲月。空覺老楸梧。祭禮傳家法。阡名載版圖。會看千字誄。木杪見龜趺。

陶驥子駿佚老堂二首

文學與元禮。尙得稱世舊。淵明吾所師。夫子乃其後。挂冠不待年。亦豈爲五斗。我歌歸來引。千載信尙友。相逢黃卷中。何似一杯酒。君醉我且歸。明朝許來否。

【二】

我從廬山來。目送孤飛雲。路逢陸道士。知是千載人。試問當時友。虎溪已埃塵。似聞佚老堂。知是幾世孫。能爲五字詩。仍戴漉酒巾。人呼小靖節。自號葛天民。

和李太白并敘

李太白有潯陽紫極宮感秋詩。紫極宮今天慶觀也。道士胡洞微以石本示余。蓋其師卓玘所刻。玘有道術。節義過人。今亡矣。太白詩云。四十九年非。一往不可復。予亦四十九。感之次其韻。玉芝一名瓊田草。洞微種之七八年矣。云。更數年可食。許以遺余。故并記之。

寄臥虛寂堂。月明浸疏竹。泠然洗我心。欲飲不可掬。流光發永歎。自昔非余獨。行年四十九。還此北窗宿。緬懷卓道人。白首寓醫卜。謫仙固遠矣。此士亦難復。世道如奕棋。變化不容覆。惟應玉芝老。待得蟠桃熟。

次韻道潛留別

爲聞廬岳多真隱。故就高人斷宿攀。已喜禪心無別語。尙嫌剃髮有詩斑。異同更莫疑三語。物我終當付八還。到後與君開北戶。舉頭三十六青山。

贈江州景德長老

白足高僧解達觀。安排春事滿幽欄。不須天女來相試。總把空花眼裏看。郭祥正家醉畫竹石壁上。郭作詩爲謝。且遺二古銅劍。

空腸得酒芒角出。肝肺槎牙生竹石。森然欲作不可回。吐向君家雪色壁。平生好詩仍好畫。書牆滄壁長遭罵。不瞋不罵喜有餘。世閒誰復如君者。

一雙銅劍秋水光

兩首新詩爭劍鋒

劍在牀頭詩在手

不知誰作蛟龍吼

龍尾硯歌并引

余舊作鳳味石硯銘其略云蘇子一見名鳳味坐令龍尾羞牛後已而求硯於歙歙人云子自有鳳味何以此為蓋不能平也奉議郎方君彥德有龍尾大硯奇甚謂余若能作詩少解前語者當奉餉乃作此詩

黃琮白琥天不惜

願恐貪夫死懷璧

君看龍尾豈石材

玉德金聲寓於石

與天作石來幾時

與人作硯初不辭

詩成鮑謝石何與

筆落鍾王硯不知

錦茵玉匣俱塵垢

掃練支牀亦何有

況賦蘇子鳳味銘

戲語相嘲作牛後

碧天照水風吹雲

明窗大几清無塵

我生天地一閒物

蘇子亦是支離人

盡言細語都不擇

春蚓秋蛇隨意畫

願從蘇子老東坡

仁者不用生分別

張近幾仲有龍尾子石硯以銅劍易之

我家銅劍如赤蛇

君家石硯蒼壁櫛而窪

君持我劍向何許

大明宮裏玉佩鳴衝牙

我得君硯亦安用

雪堂窗下爾雅箋蟲蝦

二物與人初不異

飄落高下隨風花

緘玉具皆外物

視草草玄無等差

君不見秦趙城易璧

指圖睨柱相矜誇

二生妾換馬

驕鳴啜泣思其家

不如無情兩相與

永以為好譬之桃李與瓊華

張作詩送硯反劍乃和其詩卒以劍歸之

贈君長缺君當歌

每食無魚歎委蛇

一朝得見暴公子

櫛具欲與冠爭峩

豈比杜陵貧病叟

終日長饑隨短篋

斬蛟刺虎老無力

帶牛佩犢吏所訶

故將換硯豈無意

恐君雕琢傷天和

作詩反劍亦何謂

知君故以詩相磨

報章苦恨無好語

試向君硯求餘波

詩成劍往硯應恨

那將屋漏供懸河

去歲九月二十七日在黃州生子遜小名幹兒頤然穎異至今年七月二

十八日病亡於金陵作二詩哭之

吾年四十九

羈旅失幼子

幼子真吾兒

眉角生已似

搖頭卻梨栗

似識非分恥

吾老常鮮歡

賴此一笑喜

衣薪那免俗

變滅須臾耳

歸來懷抱空

老淚如瀉水

【二】

我淚猶可拭

日遠當日忘

母哭不可聞

欲與汝俱亡

感此欲忘生

一臥終日僵

中年忝聞道

夢幻講已詳

仍將恩愛刃

割此衰老腸

知迷欲自反

一慟送餘傷

葉濤致遠見和二詩復次其韻

平生無一女。誰復歎耳耳。滯留生此兒。足慰周南史。那知非真實。造化聊戲爾。煩惱初無根。恩愛為種子。煩公為假說。反覆相指似。欲除苦海浪。先乾愛河水。棄置一寸鱗。悠然笑侯喜。為公寫餘習。餅鼻一時恥。

【二】

聞公少已悟。拄杖久倚牀。笑我老而癡。負鼓欲求亡。庶幾東門子。柱史安敢望。嗜毒戲猛獸。慮患先不詳。囊破蛇已走。尙未省齧傷。妙哉兩篇詩。洗我千結腸。點蠶不作繭。未老輒自僵。永謝湯火厄。冷然迢無方。

蘇東坡詩集卷二十四

古今體詩 五十首

次荆公韻四絕

青李扶疏禽自來。

清真逸少手親栽。

深紅淺紫從爭發。

雪白鶯黃也鬪開。

【一】

斫竹穿花破綠苔。

小詩端為覓橙栽。

細看造物初無物。

春到江南花自開。

【三】

騎驢渺渺入荒陂。

想見先生未病時。

勸我試求三畝宅。

從公已覺十年遲。

【四】

甲第非真有。閒花亦偶栽。

聊為清淨供。卻對道人開。

半山亭

登嶺勢巍巍。蓮峰太華齊。凭欄紅日蚤。回首白雲低。松柏月中老。猿猴物外啼。禪師吟絕後。千古指人迷。

張庖民挽詞

東晉巾車令。西京執戟郎。甘心向山水。結髮事文章。故自輕千戶。何曾羨一囊。天高鬼神惡。骨朽姓名芳。庚嶺銘旌暗。秦淮舊宅荒。吾詩不用刻。妙語有黃香。次韻葉致遠見贈

欲求五畝寄樵蘇。

所至遲留似賈胡。

信命不須歌去汝。

逢人未免歎猶吾。

人皆勸我杯中物。

我獨憐君屋上烏。

一伎文章何足道。

要知摩詰是文殊。

次韻致遠

長笑右軍稱草聖。

不如東野以詩鳴。

樂天自愛吟淮月。

懷祖無勞聽角聲。

次韻杭人裴維市

餘杭門外葉飛秋。尙記居人挽去舟。一別臨平山上塔。五年雲夢澤南州。 淒涼楚些緣吾發。邂逅秦淮爲子留。寄謝西湖舊風月。故應時許夢中游。

次韻段縫見贈

季子東周負郭田。須知力穡是家傳。細思種蕪五十本。大勝取禾三百廩。 若得與君連北巷。故應終老忘西川。短衣匹馬非吾事。只擬關門不問天。

題孫思邈真

先生一去五百載。猶在峨眉西崦中。自爲天仙足官府。不應尸解坐螽蟄。

戲作鮟魚一絕

粉紅石首仍無骨。雪白河豚不藥人。寄語天公與河伯。何妨乞與水精鱗。

同王勝之游蔣山

到郡席不暖。居民空惘然。好山無十里。遺恨恐他年。欲款南朝寺。同登北郭船。 朱門收畫戟。紺宇出青蓮。夾路蒼髯古。迎人翠麓偏。龍腰蟠故國。鳥爪寄層巔。 竹杪飛華屋。松根汲細泉。峰多巧障日。江遠欲浮天。略約橫秋水。浮圖插暮煙。 歸來踏人影。雲細月娟娟。

至真州再和二首

老手王摩詰。窮交孟浩然。論詩曾作直。話舊已忘年。北上難陪驥。東行且趁船。 離亭花映肉。醉眼鷺窺蓮。棹轉三山沒。風回五兩偏。荒祠過瓜步。古甃墮松嶺。 聞道清香閣。新筍白玉泉。莫教門掩夜。坐待月流天。小院檀槽闌。空庭樺燭煙。 公詩便堪唱。爲付小嬋娟。

【二】

公顏如雪柏。千載故依然。笑我無根柳。空中不待年。肯畱歸闕旆。坐待逆風船。 特許門傳籥。那知箭起蓮。相逢月上後。小語坐西偏。流落千帆側。追思百尺巔。 躬耕懷谷口。水石羨平泉。茅屋歸元亮。霓裳醉樂天。行聞宣室召。歸近御爐煙。 未用歌池上。隨宜教李娟。

次韻答寶覺

芒屨竹杖布行纏。遮莫千山與萬山。從來無脚不解滑。誰信石頭行路難。

眉子石硯歌贈胡閻

君不見見成都畫手開十眉。橫雲卻月爭新奇。游人指點小鬟處。中有漁陽胡馬嘶。 又不見王孫青瑣橫雙碧。腸斷浮雲遠山色。書生性命何足論。坐費千金買消渴。

爾來喪亂愁天公。

謫向君家書硯中。

小窗虛幌相嫵媚。

令君曉夢生春紅。

毘耶居士談空處。

結習已空花不住。

試教天女爲磨鉛。

千偈瀾翻無一語。

以玉帶施元長老。元以衲裙相報。次韻二首。

病骨難堪玉帶圍。

鈍根仍落箭鋒機。

欲教乞食歌姬院。

故與雲山舊衲衣。

【二】

此帶閩人如傳舍。

流傳到我亦悠哉。

錦袍錯落差相稱。

乞與伴狂老萬回。

次韻滕元發許仲塗秦少游

二公詩格老彌新。

醉後狂吟許野人。

坐看青邱吞澤芥。

自慙黃潦薦溪蘋。

兩邦旌纛光相照。

十畝鋤犁手自親。

何似秦郎妙天下。

明年獻頌請東巡。

送金山鄉僧歸蜀開堂

撞鐘浮玉山。迎我三千指。

衆中聞警歎。

未語知鄉里。

我非箇中人。何以默識子。

振衣忽歸去。隻影千山裏。

涪江與中冷。

共此一味水。

冰盤薦琥珀。何似糖霜美。

送沈達赴廣南

嗟我與君皆丙子。

四十九年窮不死。

君隨幕府戰西羌。

夜渡冰河斫雲壘。

飛塵漲天箭灑甲。

歸對妻孥真夢耳。

我謫黃岡四五年。

孤舟出沒煙波裏。

故人不復通問訊。

疾病飢寒疑死矣。

相逢握手一大笑。

白髮蒼顏略相似。

我方北渡脫重江。

君復南行輕萬里。

功名如幻何足計。

學道有涯真可喜。

勾漏丹砂已付君。

汝陽甕盎吾何恥。

君歸赴我雞黍約。

買田築室從今始。

豆粥

君不見見淖沱流澌車折軸。

公孫倉皇奉豆粥。

濕薪破竈自煑衣。

飢寒頓解劉文叔。

又不見金谷散冰草木春。

帳下烹煎皆美人。

萍蠶豆粥不傳法。

咄嗟而辦石季倫。

干戈未解身如寄。

聲色相纏心已醉。

身心顛倒不自知。

更識人閒有真味。

豈如江

頭千頃雪色蘆。

茅簷出沒晨煙孤。

地確春秔光似玉。

沙餅煮豆軟如酥。

我老此身

無著處。

賣書來問東家住。

臥聽雞鳴粥熟時。

蓬頭曳履君家去。

秦少游游夢發殯而葬之者云。是劉發之柩。是歲發首薦秦。以詩賀之。劉涇

亦作。因次其韻

君看三代士取雉。

本以殺身爲小補。

居官死職戰死綏。

夢尸得官真古語。

五行勝己斯爲官。

官如草木吾如土。

仕而未祿猶賓客。

待以純臣蓋非古。

餽焉曰獻稱寡君。

豈比公卿相爾汝。

世衰道微士失己。

得喪悲歡反其故。

草袍蘆箬相嫵媚。

飲酒嬉游事羣聚。

曲江船舫月燈毬。

是謂舞殯而歌慕。

看花走馬到東野。餘子紛紛何足數。二生年少兩豪逸。詩酒不知軒冕苦。
故令將士夢發棺。勸子勿爲官所腐。塗車芻靈皆假設。著眼細看君勿誤。
時來聊復一飛鳴。進隱不須煩伍舉。

金山夢中作

會散金山月滿樓。夜半潮來風又熟。臥吹簫管到揚州。

次韻周穉惠石銚

銅腥鐵澀不宜泉。愛此蒼然深且寬。蟹頭翻波湯已作。龍頭拒火柄猶寒。
薑新鹽少茶初熟。水漬雲蒸藓未乾。自古函牛多折足。要知無脚是輕安。

次韻蔣穎叔

月明驚鵲未安枝。一棹飄然影自隨。江上秋風無限浪。枕中春夢不多時。
瓊林花草聞前語。罷畫溪山指後期。豈敢便爲雞黍約。玉堂金殿要論思。

龜山辯才師

此生念念浮雲改。寄語長淮今好在。故人宴坐虹梁南。新河巧出龜山背。
木魚呼客振林莽。鐵鳳橫空飛綵綉。忽驚堂宇變雄深。坐覺風雷生警歎。
羨師游戲浮漚閒。笑我榮枯彈指內。嘗茶看畫亦不惡。問法求詩了無礙。

千里孤帆又獨來。五年一夢誰相對。何當來世結香火。永與名山供井甃。

贈潘谷

潘郎曉踏河陽春。明珠白璧驚市人。那知望拜馬蹄下。胸中一斛泥與塵。
何似墨潘穿破褐。琅琅翠餅敲玄笏。布衫漆黑手如鵝。未害冰壺貯秋月。
世人重耳輕目前。區區張李爭媿妍。一朝入海尋李白。空看人閒畫墨仙。

徐大正開軒

冰蠶不知寒。火鼠不知暑。知閒見閒地。已覺非閒侶。君看東坡翁。懶散誰比數。
形骸墮醉夢。生事委塵土。蚤眠不見燈。晚食或欺午。臥看盜取甕。坐視麥漂雨。
語希舌頰強。行少腰脚僕。五年黃州城。不蹋黃州鼓。人言我閒客。置此閒處所。
問閒作何味。如眼不自睹。頗訝徐孝廉。得閒能幾許。介子願奉使。翁歸備文武。
應緣不耐閒。名字挂庭宇。我詩爲閒作。更得不閒語。君如汗血駒。轉盼略燕楚。
莫嫌轡轡重。終勝鹽車苦。

蒜山松林中可卜居余欲僦其地地屬金山故作此詩與金山元長老

魏王大瓠無人識。種成何翅實五石。不辭破作兩大尊。只憂水淺江湖窄。
我材漫落本無用。虛名驚世終何益。東方先生好自譽。孟賁子路并爲一。

杜陵布衣老且愚。信口自比契與稷。暮年欲學柳下惠。嗜好酸鹹不相入。金山也是不羈人。孟歲聞名晚相得。我醉而嬉欲僊去。旁人笑倒山謂實。問我此身何所歸。笑指浮休百年宅。蒜山幸有閒田地。招此無家一房客。

王中甫哀辭 并敘

仁宗朝以制策登科者十五人。軾忝冒時。尚有富彥國。張安道。錢子飛。吳長文。夏公酉。陳令舉。錢醇老。王中父。并軾與家弟轍。九人存焉。其後十有五年。哭中父於密州。作詩弔之。則子飛。長文。令舉。歿矣。又八年。軾自黃州。量移汝海。與中父之子沈之。相遇於京口。相持而泣。則十五人者。獨三人存耳。蓋安道及軾與家弟而已。嗚呼。悲夫。乃復次前韻。以遺沈之。時沈之亦以舉謫家於錢塘云。

生芻不獨比前人。東萊端能廢謝鯤。子達想無身後念。吾衰不復夢中論。已知毅豹為均死。未識荆凡定孰存。堪笑東坡癡鈍老。區區猶記刻舟痕。

蔡景繁官舍小閣

使君不獨東南美。典型尙記先君子。戲嘲王叟短轅車。肯爲徐郎書紙尾。三年弭節江湖上。千首放懷風月裏。手開西閣坐虛明。目淨東溪照清泚。素琴濁酒容一榻。落霞孤鶩供千里。大舫何時繫門柳。小詩屢欲書窗紙。

文昌新構滿鷓鴣。都邑正喧收杞梓。相逢一醉豈有命。南來寂寞君歸矣。

十一月十三日。與幾先自竹西來。訪慶老不見。獨與君卿供奉蟾知客。東閣道話久之。

卷卷長廊走黃葉。席簾垂地香煙歇。主人待來終不來。火紅銷盡灰如雪。

邵伯梵行寺山茶

山茶相對阿誰栽。細雨無人我獨來。說似與君君不會。爛紅如火雪中開。

高郵陳直躬處士畫雁二首

野雁見人時。未起意先改。君從何處看。得此無人態。無乃槁木形。人禽兩自在。北風振枯葦。微雪落瓏璣。慘澹雲水昏。品焚沙礫碎。弋人恨何慕。一舉渺江海。

【一】

衆禽事紛爭。野雁獨閒潔。徐行意自得。俯仰若有節。我衰寄江湖。老伴雜鶩鴨。作書問陳子。曉景畫蒼鶩。依依聚圓沙。稍稍動斜月。先鳴獨鼓翅。吹亂蘆花雪。

和王旂二首

異時長怪謫仙人。舌有風雷筆有神。聞道騎鯨游汗漫。憶嘗捫蝨話悲辛。氣吞餘子無全目。詩到諸郎尙絕倫。白髮故交空掩卷。淚河東注問蒼旻。

【二】

嫋嫋春風送度關
未厭冰灘吼新洛

娟娟霜月照生還
且看松雪媚南山

遲留歲暮江淮上
野梅官柳何時動

來往君家伯仲閒
飛蓋長橋待子閒

次韻張琬

新落霜餘兩岸隆
半日偷閒歌嘯裏

塵埃學袂識西風
百年暗盡往來中

臨淮自古多名士
知君不向窮愁老

樽酒相從樂寓公
尚有清詩氣吐虹

次韻王定國南遷回見寄

土暈銅花蝕秋水
歸來詩思轉清激

要須悍石相礪砥
百丈空潭數魴鯉

十年冰槩戰膏粱
逝將桂浦擷蘭蓀

萬里煙波濯紈綺
不記槐堂收劍履

卻思庾嶺今何在
安心不復九迴腸

更說彭城真夢耳
至道終當三洗髓

君知先竭是甘井
廣陵陽羨何足較

我願得全如苦李
只有無何真我里

樂全老子今禪伯
相逢爲我話留滯

聖電機鋒不容擬
桃花春漲孤舟起

贈梁道人

采藥壺公處處過

笑看金狄手摩挲

老人大父識君久

造物小兒如子何

寒盡山中無歷日
雨斜江上一漁蓑

神仙護短多官府

未厭人閒醉踏歌

雍秀才畫草蟲八物

促織

月叢號耿耿
露葉泣溥溥
長夜不自暖
那憂公子寒

蟬

蛻形濁污中
羽翼便翾好
秋來閒何闊
已抱寒莖槁

蝦蟇

睥目知誰瞋
蟠腹空自脹
慎勿困蜈蚣
飢蛇不汝放

蜩螗

洪鐘起暗室
飄瓦落空庭
誰言轉丸手
能作股牀聲

天水牛

兩角徒自長
空飛不服箱
爲牛竟何事
利吻穴枯桑

蝸

跂跂有足蛇
脈脈無角龍
爲虎君勿笑
食盡蠶尾蟲

蝸牛

腥涎不滿殼。聊足以自濡。升高不知回。竟作黏壁枯。

鬼蝶

雙眉卷鐵絲。兩翅量金碧。初來花爭妍。忽去鬼無跡。

泗州南山監倉蕭淵東軒二首

偶隨漁父探都梁。竹屋松扉試乞漿。但見東軒堪隱几。

溪中亂石牆垣古。山下寒蔬七箸香。我是江南舊游客。

【二】

北望飛塵苦畫靈。洗心聊復寄東齋。珍禽聲好猶思越。

有信徵泉來遠嶺。無心明月轉空階。一官倉庾真堪老。

泗州除夜雪中黃師是送酥酒二首

暮雪紛紛投碎米。春流咽咽走黃沙。舊游似夢徒能說。

冷硯欲書先自凍。孤燈何事獨生花。使君夜半分酥酒。

【二】

關右土酥黃似酒。揚州雲液卻如酥。欲從元放覓拄杖。

對雪不堪令飽暖。隔船應已厭歌呼。明朝積玉深三尺。

忽有麴生來坐隅。高枕牀頭尚一壺。

章錢二君見和復次韻答之二首

黃昏已作風翻絮。半夜猶驚月在沙。照汗玉峰明佛剎。

來牟有信迎三白。蒼菊無香散六花。欲喚阿咸來守歲。

【二】

分無纖手裁春勝。況有新詩點蜀酥。醉裏冰髭失纓絡。

君應旅隴寒生暈。我亦飢腸夜自呼。明日南山春色動。

不知誰佩紫微壺。

蘇東坡詩集卷二十五

古今體詩

五十六首

正月一日雪中過淮謁客回作二首

十里清淮上。長堤轉雪龍。冰崖落屐齒。風葉亂裘茸。萬頃穿銀海。千尋度玉峰。

從來修月手。合在廣寒宮。

【二】

攢眉有底恨。得句不妨清。霧霧開寒谷。飢鴉舞雪城。橋聲春市散。塔影暮淮平。

不用殘燈火。船窗夜自明。

書劉君射堂

蘭玉當年刺史家。雙鞬馳射笑穿花。

寂寂小軒蛛網徧。陰陰垂柳雁行斜。

孫莘老寄墨四首

而今白首閉驄馬。只有清尊照畫蛇。
手柔弓燥春風後。置酒看君中戟牙。

徂徠無老松。易水無良工。

珍材取樂浪。妙手惟潘翁。

墨成不敢用。進入蓬萊宮。

蓬萊春晝永。玉殿明房櫺。

遙憐醉常侍。一笑開天容。

金牋灑飛白。瑞霧縈長虹。

【二】

谿石琢馬肝。刻藤開玉版。

噓噓雲霧出。奕奕龍蛇縮。

故人歸天祿。古漆窺蠹簡。

此中有何好。秀色紛滿眼。

【三】

我貧如飢鼠。長夜空敲齧。

瓦池研竈煤。葦管書柿葉。

先生又繼之。圭壁爛箱篋。

近者唐夫子。遠致烏玉玦。

【四】

晴窗洗硯坐。蛇蚓稍蟠結。

便有好事人。敲門求醉帖。

吾窮本坐詩。久服朋友戒。五年江湖上。閉口洗殘債。今來復稍稍。快瘥如爬疥。

先生不識訶。又復寄詩械。幽光發奇思。點墨出荒怪。詩成自一笑。故疾逢蝦蟹。

留題蘭阜亭

雪後東風未肯和。扣門遷客夜經過。不知舊竹生新筍。但見清伊換濁河。

無復往來乘下澤。聊同語笑說東坡。明年我亦開三徑。寂寂兼無雀可羅。

和人見贈

只寫東坡不著名。此身已是一長亭。壯心無復春流起。衰鬢從教病葉零。

知有雪兒供筆硯。應嗤竈婦洗盆餅。回來索酒公應厭。京口新傳作客經。

和田仲宣見贈

頭白江南醉司馬。寬心時復喚股兄。寒潮不應淮無信。客路相隨月有情。

未許低頭拜東野。徒言飲酒勝公榮。好詩惡韻那容和。刻燭應須便置觥。

和王勝之三首

城上湖光暖欲波。美人唱我踏春歌。魯公賓客皆詩酒。誰是神仙張志和。

【二】

齊釀如漚漲綠波。公詩句句可絃歌。流觴曲水無多日。更作新詩繼永和。

【三】

要知太守憐孤客。不惜陽春和俚歌。坐睡尊前呼不應。為公雕琢損天和。
南都妙峰亭

千尋挂雲闕。十頃含風灣。開門弄清泚。照見雙銅鑲。池臺半禾黍。桃李餘榛蕒。
無人肯回首。日暮車班班。使君非世人。心與古佛閒。時要聲利客。來洗塵埃顏。
新亭在東臯。飛宇臨通闌。古甃磨翠壁。霜林散煙鬢。孤雲抱商邱。芳草連杏山。
俯仰盡法界。逍遙寄人寰。亭亭妙高峰。了了蓬艾閒。五老壓彭蠡。三峰照潼關。
均為拳石小。配此一掬慳。煩公為標指。免使動躋攀。

記夢并敘

樂全先生夢人以詩三篇示之。字皆旁行而不可識。旁有人道衣古貌。為讀其中一篇云。
人事且常在。雷質悟圓閒。凡四句。覺而忘其二。以告其客蘇軾。軾以私意廣之云。

圓閒有物物閒空。豈有圓空入井中。不信天形真箇樣。故應眼力自先窮。
連環已解如神手。萬竅猶號未濟風。稽首問公公大笑。本來誰礙更求通。

寄薪簞與蒲傳正

蘭溪美箭不成笛。離離玉筍排霜脊。千溝萬縷自生風。入手未開先慘慄。

公家列屋閉蛾眉。珠簾不動花陰移。霧帳銀牀初破睡。牙籤玉局坐彈碁。

東坡病叟長羈旅。凍臥飢吟似飢鼠。倚賴春風洗破衾。一夜雪寒披故絮。

火冷燈青誰復知。孤舟兒女自嗷嗷。皇天何時反炎燠。媿此八尺黃琉璃。

願君淨掃清香閣。臥聽風漪聲滿榻。習習還從兩腋生。請公乘此朝闕闕。

寄怪石石斛與魯元翰

山骨裁方斛。江珍拾淺灘。清池上几案。碎月落杯盤。老去懷三友。平生因一簞。

堅姿聊自傲。秀色亦堪餐。好去尋聊舍。憑將道眼看。東坡最後供。霜雪照人寒。

漁父四首

漁父飲。誰家去。魚蟹一時分付。酒無多少醉為期。彼此不論錢數。

【二】

漁父醉。蓑衣舞。醉裏卻尋歸路。輕舟短棹任橫斜。醒後不知何處。

【三】

漁父醒。春江午。夢斷落花飛絮。酒醒還醉醉還醒。一笑人閒今古。

【四】

漁父笑。輕鷗舉。漠漠一江風雨。江邊騎馬是官人。借我孤舟南渡。

李憲仲哀詞并敘

同年友李君諱惇字憲仲賢而有文不幸早世賦不及與之遊也而識其子鴈有年矣鴈自陽翟見余於南京泣曰吾祖母邊母馬前母張與君之喪皆未葬貧不敢以飢寒為戚顧四喪未舉死不瞑目矣適會故人梁先吉老聞余當歸陽羨以絹十匹絲百兩為贖辭之不可乃以遺鴈曰此亦仁人之餽也既又作詩以告知君與鴈者庶幾皆有以助之鴈年二十五其文曄然氣節不凡此豈終窮者哉

大夢行當覺百年特未滿
 遺哀已逝人長眠寄孤館
 念我同年生意長日月短
 鹽車困騏驥烈火廢圭瓊
 後生有奇骨出語已精悍
 蕭然野鶴姿誰復識中散
 有生寓大塊死者誰不窳
 嗟君獨久客不識黃土爨
 推衣助孝子一溉滋湯旱
 誰能脫左驂大事不可緩

贈眼醫王彥若

鍼頭如麥芒氣出如車軸
 閉關脈絡中性命寄毛粟
 而況清淨眼內景含天燭
 琉璃貯沈澹輕脆不任觸
 而子於其閒來往施鋒鏃
 笑談紛自若觀者頭為縮
 運鍼如運斤去翳如拆屋
 常疑子善幻他技雜符祝
 子言吾有道此理君未囑
 形骸一座垢貴賤兩草木
 世人方重外妄見瓦與玉
 而我初不知刺眼如刺肉

君看目與翳是翳要非目
 目翳苟二物易分如麥菽
 寧聞老農夫去草更傷穀
 鼻端有餘地肝膽分楚蜀
 吾於五輪閒蕩蕩見空曲
 如行九軌道竝驅無擊轂
 空花誰開落明月自臍臍
 請問樂全堂忘言老尊宿

與歐育等六人飲酒

忽驚春色二分空且看樽前半丈紅
 苦戰知君便白羽倦游憐我憶黃封
 年來齒髮老未老此去江淮東復東
 記取六人相會處引杯看劍坐生風

觀杭州鈴轄歐育刀劍戰袍

青綾衲衫暖襯甲紅線勒帛光遠脇
 禿襟小袖雕鶴盤大刀長劍龍蛇押
 兩軍鼓譟屋瓦墜紅塵白羽紛相雜
 將軍恩重此身輕笑履鋒鏑如一插
 書生只肯坐帷幄談笑毫端弄生殺
 叫呼擊鼓催上竿猛士應憐小兒黠
 試問黃河夜偷渡掠面驚沙寒霎霎
 何如大艦日高眠一枕清風夢茗雪

王伯敷所藏趙昌花四首

梅花

南行度關山沙水清練練行人已愁絕
 日暮集微霰殷勤小梅花髣髴吳姬面
 暗香隨我去回首驚千片至今閒畫圖
 老眼凄欲泣幽懷不可寫歸夢若家倩

黃葵

弱質困夏永。奇姿蘇曉涼。低昂黃金杯。照耀初日光。檀心紫成暈。翠葉森有芒。古來寫生人。妙絕誰似昌。晨妝與午醉。真態含陰陽。君看此花枝。中有風露香。

芙蓉

清颺已拂林。積水漸收潦。溪邊野芙蓉。花水相媚好。坐看池蓮盡。獨伴霜菊稿。幽姿強一笑。暮景迫摧倒。淒涼似貧女。嫁晚驚衰蚤。誰寫少年容。樵人劔南老。

山茶

蕭蕭南山松。黃葉隕勁風。誰憐兒女花。散火冰雪中。能傳歲寒姿。古來惟邱翁。趙叟得其妙。一洗膠紛空。掌中調丹砂。染此鶴頂紅。何須誇落墨。獨賞江南工。

寄吳德仁兼簡陳季常

東坡先生無一錢。十年家火燒凡鉛。黃金可成河可塞。只有霜鬢無由元。龍邱居士亦可憐。談空說有夜不眠。忽聞河東師子吼。挂杖落手心茫然。誰似濮陽公子賢。飲酒食肉自得仙。平生寓物不留物。在家學得忘家禪。門前罷亞十頃田。清溪繞屋花連天。落花如雪春風顛。我游蘭溪訪清泉。已辦布襪青行纏。稽山不是無賀老。我自興盡回酒船。

恨君不識顏平原

恨我不識元魯山

銅駝陌上會相見

握手一笑三千年

題王逸少帖

顧張醉秦兩禿翁。追逐世好稱書工。何曾夢見王與鍾。妄自粉飾欺盲聾。有如市娼抹青紅。妖歌嫵舞眩兒童。謝家夫人澹丰容。蕭然自有林下風。天門蕩蕩驚跳龍。出林飛鳥一掃空。爲君草書續其終。待我他日不忿忿。

書林逋詩後

吳儂生長湖山曲。呼吸湖光飲山綠。不論世外隱君子。傭奴販婦皆冰玉。先生可是絕俗人。神清骨冷無由俗。我不識君曾夢見。瞳子瞭爲光可燭。遺篇妙字處處有。步遠西湖看不足。詩如東野不言寒。書似西臺差少肉。平生高節已難繼。將死微言猶可錄。自言不作封禪書。更肯悲吟白頭曲。我笑吳人不好事。好作祠堂傍修竹。不然配食水仙王。一盞寒泉薦秋菊。

和仲伯達

歸山歲月苦無多。尙有丹砂奈老何。繡谷只應花自染。鏡潭長與月相磨。君方傍海看初日。我已橫江擊素波。人不我知斯我貴。不須雷雨起龍梭。

春日

鳴鳩乳燕寂無聲。日射西窗潑眼明。午醉醒來無一事。只將春睡賞春晴。

是身如虛空。萬物皆我儲。胡為強分別。百金買田廬。不見袁夫子。神馬載尻輿。游乎無何有。一飯不願餘。官湖為我池。學舍為我居。何以遺子孫。此身自蘊條。薰風暗楊柳。秋水靜芙蕖。應觀我知子。不怪子知魚。

蘇子容母陳夫人挽詞

蘇陳甥舅真冰玉。正始風流起頽俗。夫人高節稱其家。凜凜寒松映修竹。

雞鳴為善日日新。八十三年如一晨。豈惟家室宜壽母。實與朝廷生異人。

忘軀殉國乃吾子。三仕何曾知慍喜。不須擁笏強垂魚。我視去來皆夢爾。

誦詩相挽真區區。墓碑千字多遺餘。他年太史取家傳。知有班昭續漢書。

神宗皇帝挽詞三首

文武固天縱。欽明又日新。化民何止聖。妙物獨稱神。政已三王上。言皆六籍醇。

巍巍本無象。刻畫媿孤臣。

【二】

未易名堯德。何須數舜功。小心仍致孝。餘事及平戎。典禮從周舊。官儀與漢隆。誰知本無作。千古自承風。

【三】

接統真千歲。膺期止一章。周南稍畱滯。宣室遂淒涼。病馬空嘶櫪。枯葵已泣霜。餘生臥江海。歸夢泣嵩邙。

過文覺顯公房

爛斑碎玉養菖蒲。一刁清泉滿石盂。淨几明窗書小楷。便同爾雅注蠹魚。

歸宜興畱題竹西寺三首

十年歸夢寄西風。此去真為田舍翁。剩覓蜀岡新井水。要擲鄉味過江東。

【二】

道人勸飲雞蘇水。童子能煎鴛粟湯。暫借藥牀與瓦枕。莫教辜負竹風涼。

【三】

此身已覺都無事。今歲仍逢大有年。山寺歸來聞好語。野花啼鳥亦欣然。

廣陵後園題申公扇子

露葉風枝曉自勻。綠陰青子淨無塵。閒吟逸屋扶疎句。須信淵明是可人。

與孟震同遊常州僧舍三首

年來轉覺此生浮。又作三吳浪漫遊。忽見東平孟君子。夢中相對說黃州。

【二】

湛湛清溪五月寒。

小山無數碧巒岿。

稚杉戢戢三千本。

且作凌雲合抱看。

【三】

知君此去便歸耕。

笑指孤舟一葉輕。

待向三茅乞靈雨。

半篙流水送君行。

常州太平寺法華院蒼菊亭醉題

六花蒼菊林閒佛。

九節菖蒲石上仙。

何似東坡鐵拄杖。

一時驚起野狐禪。

贈常州報恩長老二首

碧玉盤盛紅瑪瑙。

井華水養石菖蒲。

也知法供無窮盡。

試問禪師得飽無。

【二】

薦福老懷真巧便。

淨慈兩本更尖新。

憑師爲作鐵門限。

準備人閒請話人。

次韻答賈耘老

五年一夢南司州。

飢寒疾病爲子憂。

東來六月井無水。

仰看古堰橫奔牛。

平生管鮑子知我。

今日陳蔡誰從邱。

夜航爭渡泥水澗。

牽挽直欲來瓜洲。

自言嗜酒得風痺。

故鄉不敢居溫柔。

定將泛愛救溝壑。

衰病不復從前樂。

今年太守真臥龍。

笑語炎天出冰雹。

時低九尺蒼須髯。

過我三閒小池閣。

故人改觀爭來賀。

小兒不信猶疑錯。

爲君置酒飲且哦。

草閒秋蟲亦能歌。

可憐老驥真老矣。

無心更秣天山禾。

墨花

世多以墨畫山水竹石人物者。未有以畫花者也。汴人尹白能之。爲賦一首。

造物本無物。忽然非所難。花心起墨暈。春色散毫端。縹緲形纒具。扶疎態自完。

蓮風盡顛倒。杏雨半摧殘。獨有狂居士。求爲黑牡丹。兼書平子賦。歸向雪堂看。

送竹几與謝秀才

平生長物擾天真。老去歸田只此身。

謂我同行木上坐。贈君無語竹夫人。

但隨秋扇。年年在。

莫圖瓊枝夜夜新。堪笑荒唐玉川子。暮年家口若爲親。

溪陰堂

白水滿時雙鷺下。

綠槐高處一蟬吟。

酒醒門外三竿日。

臥看溪南十畝陰。

次韻許遵

蒜山渡口晚歸艖。

朱雀橋邊看道裝。

供帳已應煩百兩。

擊鮮毋久潤諸郎。

問禪時到長干寺。

戴酒閒過綠野堂。

此味只憂兒輩覺。

逢人休道北窗涼。

贈章默

章默居士。字志明。生公侯家。才性高爽。棄家求道。不蓄妻子。與世無累。而父母與兄之

喪。貧不能舉。以是眷眷世閒。不能無求於人。余深哀其志。既有以少助之。又取其言爲

詩。以贈其行。庶幾有哀之者。

章子親未葬。餘生抱羸疾。朝吟嗟鄰里。夜淚腐茵席。前年黑花生。今歲白髮出。身隨日月逝。恨與天地畢。願求不毛田。親築長夜室。難從王孫裸。未忍夏后望。五陵多豪士。百萬付一擲。心知義財難。甘就貧友乞。不辭毛髮施。行自邱山積。此志苟朝遂。夕死真不戚。誓求無生理。不踐有爲迹。棄身尸陀林。烏鴛任狼藉。

蘇東坡詩集卷二十六

古今體詩 一五十一

送穆越州

江海相望十五年。羨公松柏蔚蒼顏。四朝耆舊冰霜後。兩郡風流水石閒。舊政猶傳蜀父老。先聲已振越溪山。尊前俱是蓬萊守。莫放高樓雪月閒。

小飲公瑾舟中

青泥赤日午相烘。走訪船窗柳影中。轂我東坡無限睡。賞君南浦不費風。坐觀邸報談迂叟。閒說滁山憶醉翁。此去澄江三萬頃。試應明月照還空。

金山妙高臺

我欲乘飛車。東訪赤城子。蓬萊不可到。弱水三萬里。不如金山去。清風半帆耳。中有妙高臺。雲峰自孤起。仰觀初無路。誰信平如砥。臺中老比丘。碧眼照窗几。巉巖玉爲骨。凜凜霜入齒。機鋒不可觸。千偈如翻水。何須尋德雲。卽此比丘是。長生未可學。請學長不死。

贈杜介并敘

元豐八年七月二十五日。杜幾先自浙東還。與余相遇於金山。話天台之異。以詩贈之。我夢遊天台。橫空石橋小。秋風吹菌露。翠濕香嫋嫋。應真飛錫過。絕磴度雲鳥。舉意欲從之。簡然已松杪。微言祭珠玉。未說意先了。覺來如墜空。耿耿窗戶曉。羣生陷迷網。獨達從古少。杜叟子何人。長嘯萬物表。妻孥空四壁。振策念輕矯。遂爲赤城遊。飛步凌縹緲。問禪不歸舍。屢爲瓠壺繞。何人識此志。佛眼自照瞭。我夢君見之。卓爾非魔嬈。僊葩發茗椀。翦刻分葵蓼。從今更不出。閉戶閒腰褭。時從佛頂巖。馳下雙蓮沼。

余將赴文登。過廣陵。而擇老移住石塔。相送竹西亭下。畱詩爲別。姓名莫遺世人知。竹西失卻上方老。石塔還逢惠照師。我亦化身東海去。

別公擇

黍離不復閱宗周。

何暇雷塘弔一邱。

若問西來祖師意。

竹西歌吹是揚州。

贈葛革

竹椽茅屋半摧傾。

肯向蜂巢寄此生。

長恐波頭卷室去。

欲將船尾載君行。

小詩試擬孟東野。

大草閒臨張伯英。

消遣百年須底物。

故應憐我不歸耕。

贈王寂

與君暫別不須嗟。

俯仰歸來鬢未華。

記取江南煙雨裏。

青山斷處是君家。

次韻孫莘老斗野亭寄子由在邵伯堰

落帆謝公渚。

日脚東西平。

孤亭得小憩。

暮景含餘清。

老僧如夙昔。

一笑意已傾。

新詩出故人。

舊事疑前生。

逢人輒自哂。

得魚不忍烹。

似聞續溪老。

復作東都行。

過此感我言。

長篇發春榮。

小詩如秋菊。

黜黜霜中明。

送楊傑

無爲子嘗奉使登太山絕頂雞一鳴見日出又嘗以事過華山重九日飲酒蓮華峰上今

乃奉詔與高麗僧統游錢塘皆以王事而從方外之樂善哉未曾有也作是詩以送之

天門夜上賓出口。

萬里紅波半天赤。

歸來平地看跳丸。

一點黃金鑄秋橘。

太華峰頭作重九。

天風吹豔黃花酒。

浩歌馳下腰帶鞬。

醉舞崩崖一揮手。

神遊八極萬緣虛。

下視蚊雷隱汗渠。

大千一息八十返。

笑厲東海騎鯨魚。

三韓王子西求法。

鑿齒彌天兩勍敵。

過江風急浪如山。

寄語舟人好看客。

次韻送徐大正

別時酒醞照燈花。

知我歸期漸有涯。

去歲渡江萍似斗。

今年竝海棗如瓜。

多情明月邀君共。

無價青山爲我賒。

千首新詩一竿竹。

不應空釣漢江槎。

楊康功有石狀如醉道士爲賦此詩

楚山固多猿。

青者黠而壽。

化爲狂道士。

山谷恣騰蹂。

君命囚巖間。

巖石爲械杻。

松根絡其足。

藤蔓縛其肘。

三年化爲石。

堅瘦敵瓊玖。

無復號雲聲。

空餘舞杯手。

楊公海中仙。

世俗那得友。

海邊逢姑射。

樵夫見之笑。

求詩紀其異。

本末得細剖。

吾言豈妄云。

一笑微俛首。

迨作淮口遇風詩戲用其韻

我詩如病驥。

悲鳴向衰草。

有兒真驥子。

一噴羣馬倒。

風濤借筆力。

勢逐孤雲掃。

何如陶家兒。

遠舍覓梨棗。

過泗上喜見張嘉父二首

眉閒冰雪照淮明。筆下波瀾老欲平。直得全生如許妙。不知形蹟已多名。

【二】

空翠娛人意自還。明窗一榻共秋閒。會知名利不到處。定把清觴屬此山。

次韻徐積

殺雞未肯邀季路。裹飯先須問子來。但見中年隱槐市。豈知平日賦蘭臺。

海山入夢方東去。風雨留人得暫陪。若說義眉眼前是。故鄉何處不堪回。

元豐七年有詔京東淮南築高麗亭館密海二州騷然有逃亡者明年賦

過之嘆其壯麗留一絕云

簷楹飛舞垣牆外。桑柘蕭條斤斧餘。盡賜昆邪作奴婢。不知償得此人無。

懷仁令陳德任新作占山亭二絕

尙父提封海岱閒。南征惟到穆陵關。誰知海上詩狂客。占得膠西一半山。

【三】

我是膠西舊使君。此山仍合與君分。故應竊比山中相。時作新詩寄白雲。

過密州次韻趙明叔喬禹功

先生依舊廣文貧。老守時遭醉尉嗔。汝輩何曾堪一笑。吾儕相對復三人。

黃雞唱曉淒涼曲。白髮驚秋見在身。一別膠西舊朋友。扁舟歸釣五湖春。

再過常山和昔年留別詩

僂僂山前叟。迎我如迎新。那知夢幻軀。念念非昔人。江湖久放浪。朝市誰相親。

卻尋泉源去。桃花應避秦。

再過超然臺贈太守霍翔

昔飲零泉別常山。天寒歲在龍蛇閒。山中兒童拍手笑。問我西去何當還。

十年不赴竹馬約。扁舟獨與漁蓑閒。重來父老喜我在。扶犁老幼相遮攀。

當時襤褸皆七尺。而我安得留朱顏。問今太守爲誰歟。護羌充國鬢未斑。

躬持牛酒勞行役。無復杞菊嘲寒慳。超然置酒尋舊迹。尙有詩賦錢堅頑。

孤雲落日在馬耳。照耀金碧開煙鬢。却洪自古北流水。跳波下瀨鳴玦環。

願君談笑作石埭。坐使城郭生溪灣。

常山贈劉錕

劉侯年少日。駿馬拊便面。援弓雁自落。不待白羽貫。

登州海市并敘

蘇東坡詩集卷二十六

予聞登州海市舊矣。父老云：嘗出於春夏，今歲晚不復見矣。予到官五日而去，以不見爲恨。禱於海神廣德王之廟，明日見焉，乃作此詩。

東方雲海空復空，羣僊出沒空明中。
蕩搖浮世生萬象，豈有貝闕藏珠宮。
心知所見皆幻影，敢以耳目煩神功。
歲寒水冷天地閉，爲我起蜃鞭魚龍。
重樓翠阜出霜曉，異事驚倒百歲翁。
人間所得容力取，世外無物誰爲雄。
率然有請不我拒，信我人厄非天窮。
潮陽太守南遷歸，喜見石廩堆祝融。
自言正直動山鬼，豈知造物哀龍鍾。
但見碧海磨青銅，新詩綺語亦安用。
神之報汝亦已豐，相與變滅隨東風。

奉和陳賢良

不學孫吳與六韜

敢將駑馬竝英豪

望窮海表天還遠

傾盡葵心日愈高

身外浮名休瑣瑣

夢中歸思已滔滔

三山舊是神僊地

引手東來一釣鼈

登州孫氏萬松堂

萬松誰種已摧攢

半嶺蒼雲映此邦

露重珠瓔蒙翠蓋

風來石齒碎寒江

浮空兩竹橫南閣

倒影扶桑射北窗

坐待夕烽傳海嶠

重城歸去踏蓬蓬

過萊州雪後望三山

東海如碧環，西北卷登萊。雲光與天色，直到三山回。我行適冬仲，薄雪收浮埃。黃昏風絮定，半夜扶桑開。參差太華頂，出沒雲濤堆。安期與羨門，乘龍安在哉。茂陵秋風客，勸爾磨一杯。帝鄉不可期，楚些招歸來。

遺直坊并敘

富公之客李君諱常，登人也。故太守李公諱師中，榜其閭曰遺直。而其子大方求詩於軾，爲賦一首。

使君不浪出，羔雁親扣門。先生但清坐，薤水已多言。當時邦人化，市無晨飲豚。歲月曾幾何，客主皆九原。魯經有遺嘆，楚些無歸魂。我作遺直詩，過者式其藩。

鮫魚行

漸臺人散長弓射，初噉鮫魚人未識。
西陵衰老總帳空，肯向北河親饋食。
兩雄一律盜漢家，嗜好亦若肩相差。
食每對之先太息，不因噎嘔緣瘡痂。
中間霸據關梁隔，一枚何啻千金直。
百年南北鮭菜通，往往殘餘飽滅獲。
東隨海舶號倭螺，異方珍寶來更多。
磨沙淪滲成大猷，剖蚌作脯分餘波。
君不聞蓬萊閣下駝碁島，八月邊風備胡獠。
舶船跋浪隨雷震，長鏡鏗處崖谷倒。
膳夫善治薦華堂，坐令雕俎生輝光。
肉芝石耳不足數，醋芼魚皮真倚膾。

中都貴人珍此味。糟泥油藏能遠致。割肥方厭萬錢廚。決皆可醒千日醉。
 三韓使者金鼎來。方奩饋送煩輿臺。遼東太守遠自獻。臨淄掾吏誰爲材。
 吾生東歸收一斛。苞直未肯鑽華屋。分送羹材作眼明。卻取細書防老讀。

留別登州舉人

身世相忘久自知。此行閒看古黃塵。自非北海孔文學。誰識東萊太史慈。
 落筆已吞雲夢客。抱琴欲訪水仙師。莫嫌五日匆匆守。歸去先傳樂職詩。

次韻趙令鑠

東坡已報六年穰。惆悵紅塵白首郎。枕上谿山猶可見。門前冠蓋已相望。
 故人年少真瓊樹。落筆風生戰堵墻。端向甕閒尋吏部。老來專以醉爲鄉。

次韻王定國得穎倅二首

仙風入骨已凌雲。秋水爲文不受塵。一噫固應號地籟。餘波猶足挂天神。
 買牛但自捐三尺。射鼠何勞挽六鈞。莫向百花潭上去。醉翁不見與誰親。

【二】

滔滔四海我知津。每愧先生植杖芸。自少多言晚問道。從今閉口不論文。
 澆翻白獸尊中酒。歸煮青泥坊底芹。要識老僧無盡處。牀頭牛蟻不曾聞。

次韻趙令鑠惠酒

神山無石髓。生世悲暫寓。坐待玉膏流。千載真且暮。青州老從事。高上非所部。
 惠然肯見從。知我憎市醕。開瓶自洗盞。肴核誰與具。門前聽剝啄。烹魚得尺素。

送范純粹守慶州

才大古難用。論高常近迂。君看趙魏老。乃爲滕大夫。浮雲無根蒂。黃潦能須臾。
 知經幾成敗。得見真賢愚。羽旄照城闕。談笑安邊隅。當年老使君。赤手降於菟。
 諸郎更何事。折箠鞭其雛。吾知鄧平叔。不圖月支胡。

送范德孺

漸覺東風料峭寒。青蒿黃韭試春盤。遙想慶州千嶂裏。暮雲衰草雪漫漫。

次韻王震

攜文過我治平閒。霧豹當時始一斑。閒道吹噓借餘論。故教流落得生還。
 清篇帶月來霜夜。妙語先春發病顏。詩酒暮年猶足用。竹林高會許時攀。

喜王定國北歸第五橋

白露淒風洗瘴煙。夢回相對兩淒然。雀羅廷尉非當日。鳩杖先生愈少年。
 世事飽諳思縮手。主恩未報恥歸田。誰憐第五橋邊水。獨照台州老鄭虔。

次韻王定國謝韓子華過飲

楚有孫叔敖。長城隱千里。哀哉練帶子。負薪蹶破履。豈無故交親。逝去如覆水。
 不如老優孟。談笑託諧美。世家不可恃。如倚折足几。祥符有賢相。手握天下砥。
 懿敏亦名公。三貴德爵齒。蓋棺今幾日。公子誰料理。誰要卿料理。欲說且止止。
 宅相開府公。久為蒼生起。如何垂老別。冰盤餽蒼耳。親嫌妨鵝薦。相對發微訛。
 新詩如彈丸。脫手不移晷。我亦老賓客。苦語落紈綺。莫辭三上章。有道貧賤恥。

次韻馬元賓

流落江湖萬里歸。相逢自慰已差池。初聞好句驚人倒。悔過東庭識面遲。
 握手寧知無賀監。結交誰復許袁絲。塞鴻正欲摩天去。垂老追攀豈可期。

惠崇春江晚景二首

竹外桃花三兩枝。春江水暖鴨先知。蒹葭滿地蘆芽短。正是河豚欲上時。

【一】

兩兩歸鴻欲破羣。依依還似北歸人。遙知朔漠多風雪。更待江南半月春。

次韻周邠

南遷欲舉力田科。三徑初成樂事多。豈意殘年踏朝市。有如疲馬畏陵坡。

羨君同甲心方壯。笑我無聊鬢已皤。何日西湖尋舊賞。淡煙疎雨暗漁簑。

次韻胡完夫

青衫別淚尚爛斑。十載江湖困抱關。老去上書還北闕。朝來拄笏看西山。
 相從杯酒形骸外。笑說平生醉夢閒。萬事會須咨伯始。白頭容我占清閒。

次韻錢穆父

老入明光踏舊班。染須那復唱陽關。故人飛上金鑾殿。遷客來從飯顆山。
 大筆推君西漢手。一言置我二劉閒。硬須置酒呼同舍。看賜飛龍出帝閑。

次韻完夫再贈之什。某已卜居毘陵與完夫有廬里之約云

柳絮飛時筍籜斑。風流二老對開關。雪芽我為求陽羨。乳水君應餉惠山。
 竹簾涼風眠晝永。玉堂制草落人閒。應容緩急煩聞里。桑柘聊同十畝閑。

次韻穆父舍人再贈之什

詔語春溫昨夜班。屋頭鳴鳩便關關。游仙夢覺月臨幌。賀雨詩成雲滿山。
 憐我白頭來仗下。看君黃氣發眉閒。鳳池故事同機務。火急開尊及尚閑。

次韻答李端叔

若人如馬亦如班。笑展壺頭出玉關。已入西羌度沙磧。又從東海看濤山。

識君小異千人裏，慰我長思十載閒。

西省鄰居時邂逅，

相逢有味是偷閒。

次韻答完夫穆父

接垣老吏識郎君，竝轡天街兩絕塵。

汗血固應生有種，

夜光那復困無因。

次韻答滿思復

自甘茅屋老三閒，豈意彤庭綴兩班。

紙落雲煙供醉後，

詩成珠玉看朝還。

送戴蒙赴成都玉局觀將老焉

拾遺被酒行歌處，野梅官柳西郊路。

閒道華陽版籍中，

至今尙有城南杜。

我欲歸尋萬里橋，水花風葉暮蕭蕭。

芋魁徑尺誰能盡，

禮木三年已足燒。

百歲風狂定何有，羨君今作峨眉叟。

縱未家生執戟郎，

也應世出埋輪守。

莫欺老病未歸身，玉局他年第幾人。

會待子猷清興發，

還須雪夜去尋君。

蘇東坡詩集卷二十七

古今體詩

八首

送陳睦知潭州

華清縹緲浮高棟，

上有緬林藏石甕。

一杯此地初識君，

千巖夜上同飛鞚。

君時年少面如玉，

一飲百觚嫌未痛。

白鹿泉頭山月出，

寒光潑眼如流汞。

朝元閣上酒醒時，

臥聽風鑿鳴鐵鳳。

舊遊空在人何處，

二十三年真一夢。

我得生還雪髯滿，

君亦老嫌金帶重。

有如社燕與秋鴻，

相逢未穩還相送。

洞庭青草渺無際，

天柱紫蓋森欲動。

湖南萬古一長嗟，

付與騷人發嘲弄。

用前韻答西掖諸公見和

雙猊蟠礎龍纏棟，

金井轆轤鳴曉甕。

小殿垂簾白玉鉤，

大宛立仗朱絲鞚。

風馭賓天雲雨隔，

孤臣忍淚肝腸痛。

羨君意氣風生座，

落筆縱橫盤走汞。

上尊日日瀉黃封，

賜茗時時開小鳳。

閉門憐我老太元，

給札看君賦雲夢。

金奏不知江海眩，

木瓜屢費瑤瓊重。

豈惟蹇步苦追攀，

已覺侍史疲奔送。

春還宮柳腰支活。水入御溝鱗甲動。

借君妙語發春容。

願我風琴不成弄。

次韻王觀正言喜雪

聖人與天通。有詔寬獄市。好語夜喧街。濕雲朝覆砌。紛然退朝後。色映宮槐媚。欲誇剪刻工。故上朱藍袂。我方執筆侍。未敢書上瑞。君猶伏閣爭。高論亦少慰。罪罪止還作。盜盜風與氣。神龍久潛伏。一怒勢必倍。行當見三白。拜舞謹萬歲。歸來飲君家。酣詠追既醉。

和蔣發運

夜語翻千偈。書來又一言。此身真佛祖。何處不羲軒。船穩江吹坐。樓空月入尊。遙知思我處。醉墨在頽垣。

送表弟程六知楚州

炯炯明珠照雙璧。當年三老蘇程石。里人下道避鳩杖。刺史迎門倒冕烏。我時與子皆兒童。狂走從人覓梨栗。健如黃犢不可恃。隙過白駒那暇惜。醴泉寺古垂橘柚。石頭山高暗松櫟。諸孫相逢萬里外。一笑未解千憂集。子方得郡古山陽。老手生風謝刀筆。我正含毫紫微閣。病眼昏花困書檄。莫教印綬繫餘年。去掃墳墓當有日。功成頭白早歸來。共藉梨花作寒食。

碣石菴戲贈湛菴主

保康橋上夜觀燈。

碣石巖前夏飲冰。

莫把山林笑朝市。

老夫手裏有烏藤。

元祐元年二月八日朝退獨在起居院讀漢書儒林傳感申公故事作小詩一絕

寂寞申公謝客時。

自言已見穆生機。

縮減下吏明堂廢。

又作龍鍾病免歸。

和入假山

上黨擬天碧玉環。絕河千里抱商顏。試觀煙雨三峯外。都在靈仙一掌閒。造物何如童子戲。寫真聊發使君閒。何當挈取西征去。畫作圍牀六曲山。

送王伯敬守虢

華山東麓秦遺民。當時依山來避秦。至今風俗含古意。柔柔綠水招行人。行人掉臂不回首。爭入峒函土囊口。惟有使君千里來。欲飲三堂無事酒。三堂本來一事無。日長睡起聞投壺。牀頭硯石開雲月。湖底松根斲雪腴。山棚盜散人安寢。勸買耕牛發陳廩。歸來只作水衡卿。我欲攜壺就君飲。

道者院池上作

下馬逢佳客。攜壺傍小池。清風亂荷葉。細雨出魚兒。井好能冰齒。茶甘不上眉。歸途更蕭瑟。真個解催詩。

次韻子由送千之姪

二七九〇

江上松楠深復深，滿山風雨作龍吟。
年來老幹都生菌，下有孫枝欲出林。
白髮未成歸隱計，青衫儻有濟時心。
閉門試草三千牘，仄席求人少似今。

書文與可墨竹并敘

亡友文與可有四絕詩一楚辭二草書三畫四與可嘗云世無知我者惟子瞻一見識吾
妙處既沒七年觀其遺跡而作是詩

筆與子皆逝，詩今誰爲新。空遺運斤質，卻弔斷絃人。

次韻錢舍人病起

牀下龜寒且耐支，杯中蛇去未應衰。
殿門明日逢王傅，欄具爭先看不疑。
坐覺香煙攜袖少，獨愁花影上廊遲。
何妨一笑千疴散，絕勝倉公飲上池。

次韻和王鞏

謫仙竄夜郎，子美耕東屯。造物豈不惜，要令工語言。
王郎年少日，文如餅水翻。爭鋒雖劇甚，聞鼓或驚奔。
天欲成就之，使觸羝羊藩。孤光照微陋，耿如月在盆。
歸來千首詩，傾瀉五石尊。卻疑彭澤在，頗覺蘇州煩。
君看騎忌子，廉折配春溫。知音必無人，壞壁挂桐孫。

用定國韻贈二十姪震

衡門老苔蘚，行柏千兵屯。開尊邀落日，未對烏鳥言。
清風舉吹籟，散亂書帙翻。傳呼一何急，人馬從車奔。
貧居少賓客，鄰婦窺籬藩。牆頭過春酒，綠泛田家盆。
比來伏青蒲，坐促白獸尊。王猷修澗色，亦有薄領煩。
朝廷貴二陸，屢聞天語溫。猶能整筆陣，愧我非韓孫。

用王鞏韻送其姪震知蔡州

九門插天開，萬馬先朝屯。舉鞭紅塵中，相見不得言。
夜走清虛宿，扣門驚鵲翻。君家汾陽家，永巷車雷奔。
夕郎方不夕，列戟以自藩。相逢開月閣，畫簷低金盆。
至今夢中語，猶舉燈前尊。阿戎修玉牒，未憚筆削煩。
君歸助獻納，坐繼岑與溫。我客二子閒，不復尋諸孫。

虢國夫人夜游圖

佳人自鞞玉花驄，翩如鸞燕蹋飛龍。
金鞭爭道寶釵落，何人先入明光宮。
宮中羯鼓催花柳，玉奴絃索花奴手。
坐中八姨真貴人，走馬來看不動塵。
明眸皓齒誰復見，只有丹青餘淚痕。
人閒俯仰成今古，吳公臺下雷塘路。
當時亦笑張麗華，不知門外韓擒虎。

用舊韻送魯元翰知洛州

我在東坡下。躬耕三畝園。君爲尚書郎。坐擁百吏繁。鳴蛙與鼓吹。等是俗物喧。
 永謝十年舊。老死三家村。惟君締袍信。到我雀羅門。緬懷故人意。欲使薄夫敦。
 新年對宣室。白首代堯言。相逢問前輩。所見多後昆。道館雖云樂。冷卿嘗復溫。
 還持刺史節。卻駕朱輪軒。黃髮方用事。白須宜少存。嗣聖眞生知。拯民如救燔。
 初因羽淵魄。盡返湘江魂。坐憂東郡決。老守思王尊。北流桑柘沒。故道塵埃翻。
 知君一寸心。可敵千步垣。流亡自棲止。老幼忘崩奔。得閒閉閣坐。勿使道眼渾。
 聊乘應捨筏。直泝無生源。歸來成二老。夜榻當重論。

次韻朱光庭初夏

朝罷人人識。鄉崇。直聲如在履聲中。臥聞疎響梧桐雨。獨詠微涼殿閣風。
 諫苑君方續承業。醉鄉我欲訪無功。陶然一枕誰呼覺。牛蟻初除病後聰。

次韻朱光庭庭喜雨

久苦趙盾日。欣逢傅說霖。坐知千里足。初覺兩河深。破屋常持傘。無薪欲爨琴。
 清詩似庭燎。雖美未忘箴。

奉勅祭西太一和韓川韻四首

聖主新除祕祝。侍臣來乞豐年。壽宮神君欲至。夜半靈風肅然。

【一】

玉璽親題御筆。金童來侍天香。禮罷祝融參乘。前驅已過衡湘。

【三】

解劍獨行殘月。披衣困臥清風。夢蝶猶飛旅枕。粥魚已響枯桐。

【四】

陂水初含曉濼。稻花半作秋香。阜蓋卻迎朝日。紅雲正繞宮牆。

西太一見王荆公舊詩偶次其韻二首

秋早川原淨麗。雨餘風日清酣。從此歸耕劍外。何人送我池南。

【一】

但有尊中若下。何須墓上征西。聞道烏衣巷口。而今煙草萋迷。

次韻子由送陳侗知陝州

誰能如鐵牛。橫身負黃河。滔天不能沒。尺箠未易訶。世俗自無常。徐公故逶迤。
 別來不可說。事與浮雲多。當時無限人。毀譽卽墨阿。虛聲了無實。夜蟲鳴機梭。
 相逢一笑外。奈此白髮何。天驥皆籟雲。長鳴飽芻禾。王庭旅百實。大貝隨弓戈。

君獨一磨去。欲磨五袴歌。甘棠古樂國。白酒金叵羅。知君不久留。治行中新科。過客足嘖喜。東堂記分鵝。此外但坐嘯。後生工揣摩。

送賈訥伴眉二首

當年入蜀歎空回。未見義眉肯再來。童子遙知頭襦袴。使君先已洗尊罍。鹿頭北望應逢雁。人日東郊尚有梅。我老不堪歌樂職。後生試覓子淵才。

【二】

老翁山下玉淵回。手植青松三萬栽。父老得書知我在。小軒臨水爲君開。試看一一龍蛇活。更聽蕭蕭風雨哀。便與甘棠同不翦。蒼髯白甲待歸來。

送程建用

先生本舌耕。文字浩千頃。空倉付公子。坐待發蒼穎。十年困新說。兒女爭捕影。鑿垣種蒿蓬。嘉穀誰復省。空餘南陔意。太息北堂冷。織屨隨方進。採薪教章逞。辛勤守一經。菽水賢五鼎。今年聞起廢。魯史復光景。公子亦改官。三就繁馬頭。歸來一笑粲。素髮颯垂領。會看金花詔。湯沐奉朝請。天公不吾欺。壽與龜鶴永。

次韻李修孺留別二首

十年流落敢言歸。魚鳥江湖只自知。豈意青天掃雲霧。盡呼黃髮寄安危。

風流吾子真前輩。

人物他年記一時。

我欲折繻留此老。

緇衣誰作好賢詩。

【三】

此生別袖幾回磨。夢裏黃州空自疑。何處青山不堪老。當時明月巧相隨。窮通等是思家意。衰病難堪送客悲。好去江魚煮江水。劔南歸路有姜詩。

黃魯直以詩饋雙井茶次韻爲謝

江夏無雙種奇茗。汝陰六一誇新書。磨成不敢付僮僕。自看雪湯生璣珠。列仙之儒瘠不腴。只有病渴同相如。明年我欲東南去。畫舫何妨宿太湖。

次韻黃魯直赤目

誦詩得非子夏學。紬史正作邱明書。天公戲人亦薄相。略遣幻醫生明珠。賴君年來屏鮮腴。百千燈光同一如。書成自寫蠅頭表。端就君王覓鏡湖。

武昌西山并敘

嘉祐中翰林學士承旨鄧公聖求爲武昌令。常游寒溪西山。山中人至今能言之。軾謫居黃岡。與武昌相望。亦常往來溪山間。元祐元年十一月二十九日。考試館職。與聖求會宿玉堂。偶話舊事。聖求嘗作元次山窪尊銘刻之巖石。因爲此詩。請聖求同賦。當以遺邑人。使刻之銘側。

春江漲漲蒲萄醅。西山一上十五里。中原北望在何許。浪翁醉處今尚在。至今好事除草棘。豈知白首同夜直。山人帳空猿鶴怨。

武昌官柳知誰栽。風駕兩腋飛崔嵬。但見落日低黃埃。石臼杯飲無尊疊。常恐野火燒蒼苔。臥看椽燭高花摧。江湖水生鴻雁來。

憶從樊口載春酒。同游困臥九曲嶺。歸來解劍亭前路。爾來古意誰復嗣。當時相望不可見。江邊曉夢忽驚斷。請公作詩寄父老。

步上西山尋野梅。寒衣獨到吳王臺。蒼崖半入雲濤堆。公有妙語畱山隈。玉堂正對金鑾開。銅環玉鎖鳴春雷。往和萬壑松風哀。

西山詩和者三十餘人再用前韻爲謝

朱顏發過如春醅。寒溪本自遠公社。飲泉鑿面得真意。還朝豈獨羞老病。我如廢井久不食。遙知二月春江闊。欲就諸公評此語。

胸中梨棗初未栽。白蓮翠竹依崔嵬。坐視萬物皆浮埃。自嘆才盡傾空甕。古甕缺落生陰苔。雪浪倒卷雲峯摧。要識憂喜何從來。

丹砂未易掃白髮。當時石泉照金像。欲收暮景返田里。諸公渠渠若夏屋。數詩往復相感發。石中無聲水亦靜。願求南宗一勺水。

赤松卻欲參黃梅。神光夜發如五臺。遠泝江水窮離堆。吞吐風月清兩隈。汲新除舊寒光開。云何解轉空山雷。往與屈賈滿餘哀。

狄詠石屏

霏霏點輕素。渺渺開重陰。風花亂紫翠。會有無事人。支頤識此心。

雪林硯屏率魯直同賦

西山無時春。巉巖鎖頑陰。分明倚天壁。窮奇真自蠶。詩句且娛心。

雪外有煙林。雪近勢方壯。林遠意殊深。

點綴無風林。物固爲人出。興誰於此深。

蘇東坡詩集卷二十八

古今體詩 四十一首

和周正孺墜馬傷手

平生學道已神完。豈復兒童私自憐。書空漸覺新詩健。把蟹行看樂事全。

戲周正孺二絕

折臂三公未可知。會當千鎰訪權奇。

醉墜何曾傷內守。色憂當爲念先傳。賣卻老聰爲酒直。大呼鄉友作新年。

勸君鬻路猶閒事。腸斷聞中楊柳枝。

【一】

天廡新頽玉鼻驂，故人共敵亦常情。相如雖老猶能賦，換馬還應繼二生。

題文與可墨竹并敘

故人文與可爲道師王執中作墨竹且謂執中勿使他人書字待蘇子瞻來令題詩其側與可既沒八年而軾始還朝見之乃賦一首

斯人定何人，游戲得自在。詩鳴草聖餘，兼入竹三昧。時時出木石，荒怪軼象外。舉世知珍之，賞會獨予最。知音古難合，奄忽不少待。誰云生死隔，相見如龔隗。

潘推官母氏挽詞

南浦淒涼老逐臣，東坡還往盡幽人。杯棹慣作陶家客，絃誦嘗叨孟母鄰。尚有升堂他日約，豈知負土一阡新。今年我欲江湖去，暮雨連山宰樹春。

玉堂栽花周正孺有詩次韻

故山桃李半荒榛，粗報君恩便乞身。竹簟暑風招我老，玉堂花藥爲誰春。纖纖翠蔓詩催發，皎皎霜葩髮鬪新。只有來禽青李帖，他年畱與學書人。

杜介送魚

新年已賜黃封酒，舊友仍分鱸尾魚。陋巷關門負朝日，小園除雪得春蔬。

病妻起斫銀絲鱸，稚子謹尋尺素書。醉眼朦朧覓歸路，松江煙雨晚疎疎。

送杜介歸揚州

再入都門萬事空，閒看清洛漾東風。當年帷幄幾人在，回首觚稜一夢中。采藥會須逢蒟子，問禪何處識龐翁。歸來隣里應迎笑，新長淮南舊桂叢。

和黃魯直燒香二首

四句燒香偈子，隨香徧滿東南。不是聞思所及，且令鼻觀先參。

【二】

萬卷朋窗小字，眼花只有爛斑。一炷煙消火冷，半生身老心閒。

再和二首

置酒未逢休沐，便同越北燕南。且復歌呼相和，隔牆知是曹參。

【三】

丹青已是前世，竹石時窺一斑。五字當還靖節，數行誰似高閒。

送楊孟容

我家峨眉陰，與子同一邦。相望六十里，共飲玻璃江。江山不違人，徧滿千家窗。但苦窗中人，寸心不自降。子歸治小國，洪鐘噓微撞。我畱侍玉座，弱步敢豐扛。

後生多高才。名與黃童雙。不肯入州府。故人餘老龐。殷勤與問訊。愛惜雙眉龐。何以待我歸。寒醅發春缸。

見子由與孔常父唱和詩。輒次其韻。余昔在館中同舍。出入輒相聚飲酒。賦詩近歲不復講。故終篇及之。庶幾諸公稍復其舊。亦太平盛事也。

君先魯東家。門戶照千古。文章固應爾。須鬢餘似處。雖非蒙供狀。尚肯歷國苦。誦書口瀾翻。布穀雜社宇。十年困奔走。櫛沐飽風雨。吾道其非邪。野處豈兕虎。瀟陵閉老將。柏直口尙乳。自君兄弟還。鼎立知有補。蓬山耆舊散。故事誰刪去。來迎馮翊傳。出餞會稽組。吾猶及前輩。詩酒盛冊府。願君倡此風。揚輝斯杜舉。

趙令晏崔白大圖幅徑三丈

扶桑大瀾如甕盎。天女織綃雲漢上。往來不遺風銜梭。誰能鼓臂投三丈。

人閒刀尺不敢裁。丹青付與濠梁崔。風蒲半折寒雁起。竹閉的皜橫江梅。

畫堂粉壁翻雲幕。十里江天無處著。好臥元龍百尺樓。笑看江水拍天流。

次韻張昌言給事省宿

馮顛久已敲殘雪。戎眼何曾眩落暉。朔野按行猶爵躍。東臺瞑坐覺鳥飛。漫誇年少容吾在。若闔尊前舉世稀。待向嵩陽求水竹。一犁煙雨伴公歸。

次韻三舍人省上

紛紛榮瘁何能久。雲雨從來翻覆手。恍如一夢墮枕中。卻見三賢起江右。

嗟君妙質皆瑚璉。願我虛名俱箕斗。明朝冠蓋蔚相望。共屬翠輦朝宣光。

我皇已老白雲鄉。正與羣帝勝龍翔。獨留杞梓扶明堂。

送錢承制赴廣西路分都監

當年我作表忠碑。坐覺江山氣未衰。舞鳳尙從天目下。收駒時有渥洼姿。踞牀到處堪吹笛。橫槩何人解賦詩。知是丹霞燒佛手。先聲應已懾羣夷。

次韻曾子開從駕二首

槐街綠暗雨初勻。瑞霧香風滿後塵。清廟幸同觀濟濟。豐年喜復接陳陳。雍容已饜天庖賜。俯伏初嘗貢茗新。輦路歸來聞好語。共驚堯顙類高辛。

〔一〕

入仗魂驚魄草萊。一聲清蹕九門開。暉暉日榜金輿轉。習習風從玉宇來。流落生還真一芥。周章危立近三槐。道傍倘有山中舊。問我收身早晚回。

再和二首

眼花錯莫鬢霜勻。病馬羸驂只自塵。奉引拾遺叨侍從。思歸少傅羨朱陳。

衰年壯觀空鷲目。

險韻清詩苦闕新。

最後數篇君莫厭。

搗殘椒桂有餘辛。

【二】

憶觀滄海過東萊。

日照三山迤邐開。

桂觀飛樓凌霧起。

仙幢寶蓋拂天來。

不聞宮漏催晨箭。

但覺蒼陰轉古槐。

供奉清班非老處。

會稽何日乞方回。

次韻劉貢父省上

密雲今日破郊西。

疎雨脩脩未作泥。

要及清閒同笑語。

行看衰病費扶攜。

花前白酒傾雲液。

戶外青驄響月題。

不用臨風苦揮淚。

君家自與竹林齊。

再和

當年曹守我膠西。

共厭餽糈與汨泥。

自古赤丸成習俗。

因公黃犢免提攜。

生還各有青山興。

病起猶能小字題。

莫怪歌呼數相和。

曾將獄市寄全齊。

送顧子敦奉使河朔

我友顧子敦。

軀膽兩俊偉。

便便十圍腹。

不但貯書史。

十年臥江海。

了不見愠喜。

磨刀向豬羊。

醜酒會鄰里。

平生批勅手。

濃墨寫黃紙。

會當勦燕然。

廊廟登劔履。

河來屹不去。

如尊乃勇耳。

翻然向河朔。

坐念東郡水。

次韻子由送家退翁知懷安軍

吾州同年友。

粲若琴上星。

當時功名意。

豈止拾紫青。

今如圖中鶴。

俛仰在一庭。

退翁守清約。

霜菊有餘馨。

西南正春早。

廢沼黏枯萍。

翩然一磨去。

想見靈雨零。

空騎內廐馬。

天仗隨雲輶。

竟無絲毫補。

眷焉誰汝令。

諸公餞子敦賦以病不能往復次前韻

君爲江南英。

而作河朔偉。

人閒一好漢。

誰似張長史。

置之勿復道。

出處俱可喜。

攀輿共六尺。

食肉飛萬里。

遙知送別處。

醉墨爭淋紙。

我以病杜門。

商頤空振屨。

善保千金軀。

前言戲之耳。

後會知何日。

一歡如覆水。

走筆謝呂行甫惠子魚

臥沙細肋吾方厭。

通印長魚誰肯分。

好事東平貴公子。

貴人不與與蘇君。

送呂行甫司門倅河陽

結交不在久。

傾蓋如平生。

識子今幾日。

送別亦有情。

天才既超詣。

世故亦屢更。

譬如追風驥。

豈免羈與縷。

誤出挂世網。舉動俗所驚。歸田雖未果。已覺去就輕。河陽豈云遠。出處恐異程。便當從此別。有酒無徒傾。

和張昌言喜雨

二聖憂勤忘寢食。百神奔走會風雲。禁林夜直鳴江濶。清洛朝回起穀紋。夢覺酒醒聞好句。帳空簾冷發餘薰。秋來定有豐年喜。剩作新詩準備君。

次韻劉貢父西省種竹

要知西掖承平事。記取劉郎種竹初。舊德終呼名字外。後生誰續笑談餘。成陰障日行當見。取筍供庖計已疎。白首林閒望天上。平安時報故人書。

偶與客飲孔常父見訪方設席延請忽上馬馳去已而有詩戲用其韻答之

揚雄他文皆不奇。獨稱觀餅居井眉。酒客法士兩小兒。陳遵張竦何曾知。主人有酒君獨辭。蟹螯何不左手持。豈復見吾衡氣機。遣人追君君絕馳。盡力去花君自癡。醍醐與酒同一卮。請君更問文殊師。

次韻子由書李伯時所藏韓幹馬

潭潭古屋雲幕垂。省中文書如亂絲。忽見伯時畫天馬。朔風胡沙生落錐。天馬西來從西極。勢與落日爭分馳。龍膺豹股頭八尺。奮迅不受人閒羈。

元狩虎脊聊可友。

開元玉花何足奇。

伯時有道真吏隱。

飲啄不羨山梁雌。

丹青弄筆聊爾耳。

意在萬里誰知之。

幹唯畫肉不畫骨。

而況失實空留皮。

煩君巧說腹中事。

妙語欲遣黃泉知。

君不見韓生自言無所學。

廐馬萬匹皆吾師。

次韻劉貢父獨直省中

明窗畏日曉先曠。高柳鳴蜩午更喧。筆老新詩疑有物。心空客疾本無根。隔牆我亦眠風榻。上馬君先銷月軒。共喜早歸三伏近。解衣盤礴亦君恩。

賦以去歲春夏侍立邇英而秋冬之交子由相繼入侍次韻絕句四首各

述所懷

曠曠日脚曉猶清。

細細槐花暖欲零。

坐閱諸公半廊廟。

時看黃色起天庭。

【二】

上尊初破早朝寒。

茗盃仍霑講舌乾。

陛楯諸郎空雨立。

故應慚悔不儒冠。

【三】

兩鶴摧頹病不言。

年來相繼亦乘軒。

誤聞九奏聊飛舞。

可得裴徊爲啄吞。

【四】

微生偶脫風波地。

晚歲猶存鐵石心。

定似香山老居士。

世緣終淺道根深。

送宋構朝散知彭州迎侍二親

東來誰迎使君車。知是丈人屋上烏。
 使君負弩爲前驅。蜀人不復談相如。
 春波如天漲平湖。程紅照坐香生膚。
 諸孫歡笑爭挽鬚。蜀人畫作西湖圖。

郭熙畫秋山平遠

玉堂畫掩春日閒。中有郭熙畫春山。
 離離短幅開平遠。漠漠疎林寄秋晚。
 伊川佚老鬢如霜。臥看秋山思洛陽。
 我從公游如一日。不覺青山映黃髮。

次韻張昌言喜雨

千里黃流失故居。年來赤地到青徐。
 精貫天人一言足。雲興嶽瀆萬靈趨。

章質夫寄惠崔徽真

玉釵半脫雲垂耳。亭亭芙蓉在秋水。
 當時薄命一酸辛。千古華堂奉君子。

水邊何處無麗人。近前試看丞相嗔。
 知君被惱更愁絕。卷贈老夫驚老拙。
 不如丹青不解語。世間言語原非真。
 爲君援筆賦梅花。未害廣平心似鐵。

蘇東坡詩集卷二十九

古今體詩 四十首

和穆父新涼

家居妻兒號。出仕猿鶴怨。未能逐什一。安敢搏九萬。
 受恩如負債。粗報乃焚券。但知眠牛衣。寧免刺虎園。
 紫蟹應已肥。白酒誰能勸。君今擢蔡手。政比趙張健。
 幸推江湖心。適我魚鳥願。三公行可致。一語先自獻。

書晁補之所藏與可畫竹三首

與可畫竹時。見竹不見人。豈獨不見人。嗒然遺其身。
 莊周世無有。誰知此凝神。其身與竹化。無窮出清新。

【一】

若人今已無。此竹寧復有。那將春蚓筆。畫作風中柳。君看斷崖上。瘦節蛟蛇走。何時此霜竿。復入江湖手。

【三】

鬼子拙生事。舉家聞食粥。朝來又絕倒。諛墓得霜竹。可憐先生槃。朝日照首藎。吾詩固云爾。可使食無肉。

戲用晁補之韻

昔我嘗陪醉翁醉。今君但吟詩老詩。清詩咀嚼那得飽。瘦竹瀟灑令人飢。試問鳳凰飢食竹。何如駑馬肥首藎。知君忍飢空誦詩。口頰瀾翻如布穀。

書皇親畫扇

十年江海寄浮沈。夢繞江南黃蘗林。誰謂風流貴公子。筆端還有五湖心。

書李世南所畫秋景二首

野水參差落漲痕。疎林敲倒出霜根。扁舟一櫂歸何處。家在江南黃葉村。

【二】

人閒斤斧日創夷。誰見龍蛇百尺姿。不是溪山成獨往。何人解作挂猿枝。

書鄒陵王主簿所畫折枝二首

論畫以形似。見與兒童鄰。賦詩必此詩。定非知詩人。詩畫本一律。天工與清新。邊鸞雀寫生。趙昌花傳神。何如此兩幅。疎淡含精勻。誰言一點紅。解寄無邊春。

【二】

瘦竹如幽人。幽花如處女。低昂枝上雀。搖蕩花間雨。雙翎決將起。衆葉紛自舉。可憐采花蜂。清蜜寄兩股。若人富天巧。春色入毫楮。懸知君能詩。寄聲求妙語。昨見韓丞相。言王定國今日玉堂獨坐。有懷其人。

畫臥玉堂上。微風舉輕紈。銅餅下碧井。百尺鳴飛瀾。俛仰清夢餘。愛此一掬寒。似予平生友。苦語涼肺肝。秀眉玉兩頰。矯矯如翔鸞。置之江淮交。清詩洗江湍。紅鱗對白酒。信美非所安。丞相功業成。還家酒杯寬。人閒有此客。折簡呼不難。相將扣東閣。起舞盡餘歡。

和張耒高麗松扇

可憐堂堂十八公。老死不入光明宮。萬牛不來難自獻。裁作團團手中扇。屈身蒙垢君一洗。挂名君家詩集裏。猶勝漢宮悲婕妤。網蟲不見乘鸞子。

故李誠之待制六丈挽詞

青青一寸松。中有梁棟姿。天驥墮地走。萬里端可期。世無阿房宮。下建五丈旂。

又無穆天子。西征燕瑤池。才大古難用。老死亦其宜。丈夫恐不免。豈患莫己知。
 公如松與驥。少小稱偉奇。俯仰自廊廟。笑談無羌夷。清朝竟不用。白首仍憂時。
 願斬橫行將。請烹乾沒兒。言雖不見省。坐折姦雄窺。嗟我去公久。江湖生白髭。
 歸來耆舊盡。零落存者誰。比公愁中散。龍性不可羈。擬公李北海。慷慨多雄詞。
 淒涼五君詠。沈痛八哀詩。邪正久乃明。人皆屬公思。九原不可作。千古有餘悲。

次韻孔常父送張天覺河東提刑

送君應典鶴鷗裘。

憑仗千鍾洗別愁。

脫帽風流餘長史。

埋輪家世本留侯。

子河駿馬方爭出。

昭義疲兵得少休。

定向秋山得佳句。

故關黃葉滿行轡。

送張天覺得山字

西登太行嶺。

北望清涼山。

晴空浮五鬢。

庵靄卿雲間。

餘光入巖石。

神草出茅膏。

何人相指似。

稍稍落人寰。

能令墮指兒。

蚪髯茁冰顏。

祝君如此草。

為民已痼瘵。

我亦老且病。

眼花腰脚頑。

念當勤致此。

莫作河東慳。

次韻王定國倅揚州

此身江海寄天游。

一落紅塵不易收。

未許相如還蜀道。

空教何遜在揚州。

又驚白酒催黃菊。

尚喜朱顏映黑頭。

火急著書千古事。

虞卿應未厭窮愁。

贈李道士并敘

駕部員外郎李君宗固景祐中良吏也守漢州有道士尹可元精練善畫以遺火得罪當
 死君緩其獄會赦獲免時可元年八十一自誓且死必為李氏子以報可元既死二十餘
 年而君子世昌之婦夢可元入其室生子曰得柔小名蜀孫幼而善畫既長讀莊老喜之
 遂為道士賜號妙應事母以孝謹聞其寫真蓋妙絕一時云。

世人只數曹將軍。

誰知虎頭非癡人。

腰間大羽何足道。

頰上三毛自有神。

平生狎侮諸公子。

戲著幼輿巖石裏。

故教世世作黃冠。

布襪青鞋弄雲水。

千年鼻祖守關門。

一念還為李耳孫。

香火舊緣何日盡。

丹青餘習至今存。

五十之年初過二。

衰顏記我今如此。

他時要指集賢人。

知是香山老居士。

次韻張舜民自御史出倅虢州留別

玉堂給札氣如雲。

初起湘纍復佩銀。

樊口淒涼已陳迹。

班心突兀見長身。

江湖前日真成夢。

鄂杜他年恐卜鄰。

此去若容陪坐嘯。

故應客主盡詩人。

次韻米叢二王書跋尾二首

三館曝書防蠹毀。

得見來禽與青李。

秋蛇春蚓久相雜。

野鶩家雞定誰美。

玉函金籙天上來。

紫衣勅使親臨啓。

紛綸過眼未易識。

磊落挂壁空雲委。

蘇東坡詩集卷二十九

二八一

歸來妙意獨追求。坐想蓬山二十秋。
巧偷豪奪古來有。一笑何似瘕虎頭。

怪君何處得此本。上有桓元寒具油。
君不見長安永寧里。王家破垣誰復修。

【二】

元章作書日千紙。平生自苦誰與美。
錦囊玉軸來無趾。粲然奪真疑聖智。

畫地爲餅未必似。要令瘕兒出饑水。
忍飢看書淚如洗。至今魯公餘乞米。

次韻宋肇惠澄心紙二首

詩老囊空一不置。百番曾作百金收。

知君也厭雕肝腎。分我江南數斛愁。

【三】

君家家學陋相如。宜與諸儒論石渠。

古紙無多更分我。自應給札奏新書。

郭熙秋山平遠二首

目盡孤鴻落照邊。遙知風雨不同川。

此閒有句無人識。送與襄陽孟浩然。

【四】

木落騷人已怨秋。不堪平遠發詩愁。

要看萬壑爭流處。他日終煩顧虎頭。

獲果莊二十韻

青唐有逋寇。白首已窮妖。竊據臨洮郡。

潛通講渚橋。廟謀周召虎。邊帥漢班超。

堅壘千兵破。連航一炬燒。擒姦從窟穴。奏捷上煙霄。詭異人圖像。歡娛路載謠。

千誅非一事。伐叛自先朝。取道經陵寢。前期告廟祧。西來開幾日。面縛見今朝。

二聖臨雲陛。千官溢海潮。載囚車輹輓。失主馬蕭條。橫拜如蹲犬。胡裝尙衣貂。

理卿辭具服。譯長舌初調。緩死恩殊厚。求生尾屢搖。慈仁逢太母。寬厚戴唐堯。

赤手真擒虎。和羹未賜臯。藁街虛授首。東市偶全腰。因獸何須殺。遺雛或可招。

威聲西振夏。武節北通遼。帝道有強弱。天時或長消。羌情防報復。軍勝忌矜驕。

慎重關西將。奇功勿再要。

送歐陽辯監澶州酒

汗血駕鼓軍。何從致千里。紛紛糟麴閒。欲試賢公子。君家江南英。濯足滄浪水。

卻渡舊黃河。漲沙埋馬耳。由來付造物。倚伏何窮已。當念楚子文。三仕無愠喜。

九月十五日通英講論語終篇賜執政講讀史官燕於東宮又遣中使就賜御

書詩各一首臣軾得紫薇花絕句其詞云絲綸閣下文書靜鐘鼓樓中刻漏長

獨坐黃昏誰是伴紫薇花對紫薇郎翌日各以表謝又進詩一篇臣軾詩云

繡裳畫袞雲垂地。不作成王翦桐戲。日高黃繖下西清。風動槐龍舞交翠。

壁中蠹簡今千年。漆書科斗光射天。諸儒不復憂吻燥。東宮賜酒如流泉。

酒酣復拜千金賜。一紙驚鸞回鳳字。蒼顏白髮便生光。袖有驪珠三十四。
 歸來車馬已喧闐。爭看銀鉤墨色鮮。人閒一日傳萬口。喜見雲章第一篇。
 玉堂畫掩文書靜。鈴索不搖鐘漏永。莫言弄筆數行書。須信時不由主聖。
 犬羊散盡沙漠空。捷烽夜到甘泉宮。似聞指揮築上郡。已覺談笑無西戎。
 文思天子師文母。終閉玉關辭馬武。小臣願對紫薇花。試草尺書招贊普。

和王晉卿并敘

元豐二年予得罪貶黃州而駙馬都尉王誥亦坐累遠謫不相聞者七年予既召用而誥亦還朝相見殿門外感嘆之餘作詩相屬詞雖不甚工然托物悲慨既窮而不怨泰而不驕憐其貴公子有志如此故和其韻欲使誥姓名附見予詩集中然亦不以示誥也誥字晉卿功臣全斌之後云。

先生飲東坡。獨舞無所屬。當時挹明月。對影三人足。醉眠草棘閒。蟲虺莫予毒。
 醒來送歸雁。一寄千里目。悵然懷公子。旅食久不玉。欲書加餐字。遠託西飛鶴。
 謂言相濡沫。未足救溝瀆。吾生如寄耳。何者為禍福。不如兩相忘。昨夢那可逐。
 上書得自便。歸老湖山曲。躬耕二頃田。自種十年木。豈知垂老眼。對此金蓮燭。
 公子亦生還。仍分刺史竹。賢愚有定分。尊俎守尸祝。文章何足云。執技等醫卜。

朝廷方西顧。羌虜驕未伏。遙知重陽酒。白羽落黃菊。羨君真將家。浮面氣可掬。
 何當請長纓。一戰河湟復。

謝王澤州寄長松兼簡張天覺二首

莫道長松浪得名。能教覆額兩眉青。便將經寸同千尺。知有奇功似茯苓。

【二】

憑君說與埋輪使。速寄長松作解嘲。無復青黏和漆葉。枉將鐘乳敵僊茅。

次韻劉貢父所和韓康公憶持國二首

夢覺真同鹿覆蕉。相君脫屣自參寥。顏紅底事髮先白。室邇何妨人自遙。
 狂似次公應未怪。醉推東閣不須招。援毫欲作衣冠表。盛事終當繼八蕭。

【三】

閉戶端居念獨深。小軒朱檻憶同臨。燎鬚誰識英公意。黃髮聊知子建心。
 已托西風傳絕唱。且邀明月伴孤斟。他時內集應呼我。下客先判醉墮簪。

上韓持國

韓氏三虎秉樞極。中有一虎似偉節。端居隱几學無心。夙駕入朝常正色。
 犯時獨行太暇端。回天不忌真藥石。輦致歸來荷二聖。推排使至有衆力。

吾儕小人但飽飯。不有君子何能國。

西湖醉臥春水船。

如何爲人作豐年。

次韻劉貢父叔姪扈駕

玉堂孤坐不勝清。長羨鄒枚接長卿。
機雲似我多遺俗。廣受如君不治生。

只許隔船聞置酒。共託屬車塵土後。

時因議事得聯名。鈞天一餉夢中榮。

次韻韓康公置酒見留

庭下黃花一醉同。重來雪嶽已穹窿。
鍾乳金釵人似玉。鷓鴣絃鐵撥坐生風。

不應屢費譏安石。少卿尚有車茵在。

但使無多酌次公。頗覺寬容勝弱翁。

韓康公坐上侍兒求書扇上二首

窗搖細浪魚吹日。手弄黃花蝶透衣。

不覺春風吹酒醒。

空教明月照人歸。

【二】

一一窗扇面水開。更於何處覓蓬萊。

天香滿袖人知否。

曾到旂檀小殿來。

雜詩

昔日雙鴉照淺眉。如今婀娜綠雲垂。

蓬萊老守明朝去。

腸斷簾閒蟋蟀悲。

次韻王都尉偶得耳疾

君知六鑿皆爲贅。我有一言能決疣。

病客巧聞牀下蟻。

癡人強覷棘端猴。

聰明不在根塵裏。

藥餌空爲婢僕憂。

但試周郎看聾否。

曲音小誤已回頭。

送喬全寄賀君六首并敘

舊聞靖長官。賀水部。皆唐末五代人。得道不死。章聖皇帝東封。有謁於道左者。其謁云。晉水部員外郎賀充。再拜而去。上不知也。已而閱謁。見之大驚。物色求之。不可得。天聖初。又使其弟子喻澄者。詣闕進佛道像。直數千萬。張公安道與澄游。具得其事。又有喬全者。少得大風疾。幾死。賀使學道。今年八十。益壯盛。人無復見賀者。而全數見之。元祐二年十二月。全來京師。十許日。余留之。不可曰。賀以上元期。我於蒙山。又曰。吾師嘗游密州。識君於常山道上。意若喜君者。作是詩以送之。且作五絕句以寄賀。

君年二十美且都。

初得惡疾墮眉鬚。

紅顏白髮驚妻孥。

覽鏡自嫌欲棄軀。

結茅窮山啖松腴。

路逢逃秦博士盧。

方瞳照野清而癯。

再拜未起頰一呼。

覺知此身了非吾。

炯然蓮花出泥塗。

隨師東游渡濰邦。

山頭見我兩輪朱。

豈知仙人混屠沽。

爾來八十胸垂胡。

上山如飛噴人扶。

東歸有約不敢渝。

新年當參老僊儒。

秋風西來下雙鳧。

得棗如瓜分我無。

【三】

生長兵閒早脫身。

晚爲元祐太平人。

不驚渤海桑田變。

來看龜蒙滿澤春。

【三】

曾謁東封玉輅塵。

幅巾短褐亦逡巡。

行宮夜奏空名姓。

悵望雲霞縹緲人。

【四】

垂老區區豈爲身。

微言一發重千鈞。

始知不見高皇帝。

正似商山四老人。

【五】

舊聞父老晉郎官。

已作飛騰變化看。

聞道東蒙有居處。

願供薪水看燒丹。

【六】

千古風流賀季真。

最憐嗜酒謫仙人。

狂吟醉舞知無益。

粟飯藜羹問養神。

送家安國教授歸成都

別君二十載。

坐失兩鬢青。

吾道雖艱難。

斯文終典刑。

一落戎馬閒。

五見霜葉零。

夜談空說劍。

春夢猶橫經。

須煩凌雲手。

去作入蜀星。

蒼苔高殿室。

古柏文翁庭。

岷峨有雛鳳。

梧竹養修翎。

嗚呼應解律。

飛舞集虞廷。

和吳安持使者迎駕

小雪疎煙雜瑞光。

清波寒引御溝長。

曠曠日色籠丹禁。

歸來喜氣傾新句。

滿座疑聞錦繡香。

和子由除夜元日省宿致齋三首

江湖流落豈關天。

禁省相望亦偶然。

等是新年未相見。

白髮蒼頭五十三。

家人強遣試春衫。

朝回兩袖天香滿。

頭上銀幡笑阿咸。

當年踏月走東風。

坐看春闈鎖醉翁。

白髮門生幾人在。

卻將新句調兒童。

次韻答張天覺二首

車輕馬穩善銜堅。

但有蚊蟲喜撲緣。

截斷口前君莫問。

【二】

馭風騎氣我何勞。

且要長松作土毛。

亦如訶佛丹霞老。

蘇東坡詩集卷三十

古今體詩

七十首

蘇東坡詩集卷三十

鷓鴣偶叨陪下列

天闊聊啓望中央

歸來喜氣傾新句

滿座疑聞錦繡香

蘇東坡詩集卷三十

古今體詩

七十首

和子由除夜元日省宿致齋三首

江湖流落豈關天。

禁省相望亦偶然。

等是新年未相見。

此身應坐不歸田。

【二】

白髮蒼頭五十三。

家人強遣試春衫。

朝回兩袖天香滿。

頭上銀幡笑阿咸。

【三】

當年踏月走東風。

坐看春闈鎖醉翁。

白髮門生幾人在。

卻將新句調兒童。

次韻答張天覺二首

車輕馬穩善銜堅。

但有蚊蟲喜撲緣。

截斷口前君莫問。

人閒差樂勝巢僊。

【二】

馭風騎氣我何勞。

且要長松作土毛。

亦如訶佛丹霞老。

卻向清涼禮白毫。

蘇東坡詩集卷三十

二八一九

次韻黃魯直畫馬試院中作

少年鞍馬勤遠行。臥聞乾草風雨聲。見此忽思短策橫。十年髀肉磨欲透。
那更陪君作詩瘦。不如芋魁歸飯豆。門前欲嘶御史驄。詔恩三日休老翁。
羨君懷中雙橘紅。

余與李鷹方叔相知久矣。領貢舉事。而李不得第。愧甚。作詩送之。

與君相從非一日。筆勢翩翩疑可識。平生謾說古戰場。過眼終迷日五色。
我慚不出君大笑。行止皆天子何責。青袍白紵五千人。知子無怨亦無德。
買羊酤酒謝玉川。爲我醉倒春風前。歸家但草凌雲賦。我相夫子非癡仙。

和宋肇遊西池次韻

漢皇慈儉不開邊。尙教千艘下瀨船。貪看艤艫飛鬪艦。不知最屬舞鈞天。
故山西望三千里。往事回思二十年。自笑區區足官府。不如公子散神仙。

僕領貢舉未出錢。穆父雪中作詩見及。三月二十日同遊金明池。始見其

詩。次韻爲答

雪知我出已全消。花待君來未敢飄。行避門生時小飲。忽逢騎吏有嘉招。
魚龍絕技來千里。斑白遺民數四朝。知有黃公酒壚在。蒼顏華髮自相遙。

書艾宣畫四首

竹 鶴

此君何處不相宜。況有能言老令威。誰識長身古君子。猶將縞布緣深衣。

黃精鹿

太華西南第幾峰。落花流水自重重。幽人只采黃精去。不見春山鹿養茸。

杏花白鷗

天公剪刻爲誰妍。抱藥游蜂自作團。把酒惜春都是夢。不如閒客此閒看。

蓮 龜

半脫蓮房露壓敲。綠荷深處有游龜。只應裴翠蘭苕上。獨見元夫曝日時。

次韻子由五月一日同轉對

跪奉新書笏在腰。談王正欲伴耕樵。晉陽豈爲一門事。宣政聊同五月朝。
憂患半生聯出處。歸休上策早招要。後生可畏吾衰矣。刀筆從來錯料堯。

韓康公挽詞三首

故國非喬木。與王有世臣。嗟余後死者。猶及老成人。德業經文武。風流表搢紳。
空餘行樂地。處處泣遺民。

再世忠清德。三朝翊贊勳。功成不歸國。就訪敢忘君。舊學嚴詩律。餘威靖塞氛。何當繼韓奕。故吏總能文。

【三】

西第開東閣。初筵點後塵。笙歌邀白髮。燈火樂青春。扶路三更罷。回頭一夢新。賦詩猶墨溼。把卷獨沾巾。

次韻子由題懋寂圖後

東坡雖是湖州派。竹石風流各一時。前世畫師今姓李。不妨還作朝川詩。

慶源宣義王丈。以累舉得官。為洪雅主簿。雅州戶掾。遇吏民如家人。人安。

樂之既謝事。居眉之青神瑞草橋。放懷自得。有書來求紅帶。既以遺之。且

作詩為戲。請黃魯直秦少游各為賦一首。為老人光華。

青衫半作霜葉枯。遇民如兒吏如奴。吏民莫作官長看。我是識字耕田夫。

妻啼兒號刺史怒。時有野人來挽鬚。拂衣自注下下考。芋魁飯豆吾豈無。

歸來瑞草橋邊路。獨游還佩平生壺。慈姥巖前自喚渡。青衣江畔人爭扶。

今年蠶市數州集。中有遺民懷袴襦。邑中之黔相指似。白髯紅帶老不癯。

我欲西歸卜鄰舍。隔牆拊掌容歌呼。不學山王乘駟馬。回頭空指黃公墟。

次韻許冲元送成都高士敦鈴轄

移中老監本虛名。懶作燕山萬里行。坐看飛鴻迎使節。歸來駿馬換傾城。

高才本不緣動閥。餘力還思治蜀兵。西望雪山烽火盡。不妨尊酒寄平生。

次前韻送程六表弟

君家兄弟真連璧。門十朱輪家萬石。竹使猶分刺史符。上方行賜尚書鳥。

前年持節發倉廩。到處賣刀收繭粟。歸來閉口不論功。卻走渡江誰復惜。

君才不用如湖松。我老得全猶社櫟。青衫莫厭百僚底。白首上有千薪積。

憶昔江湖一釣舟。無數雲山供點筆。未應便障西風扇。只恐先移北山檄。

憑君寄謝江南叟。念我空見長安日。浮江沂蜀有成言。江水在此吾不食。

虛飄飄

虛飄飄。畫檐蛛結網。銀漢鵲成橋。塵漬雨桐葉。霜飛風柳條。露凝殘點見紅日。

星曳餘光橫碧霄。虛飄飄。比浮名利猶堅牢。

題李伯時淵明東籬圖

彼哉嵇阮曹。終以明白膏。靖節固昭曠。歸來侶蓬蒿。新霜著疎柳。大風起江濤。

東籬理黃菊。意不在芳醪。白衣掣壺至。徑醉還游遨。悠然見南山。意與秋氣高。

次韻黃魯直書伯時畫王摩詰
前身陶彭澤。後身韋蘇州。欲覓王右丞。還向五字求。詩人與畫手。蘭菊芳春秋。又恐兩皆是。分身來入流。

和王晉卿題李伯時畫馬

督郵有良馬。不爲君所奇。願收紙上影。駿骨何由歸。一朝見繁策。蟻封鷲肉飛。豈唯馬不遇。人已半生癡。

送錢穆父出守趣州二首

簿書常苦百憂集。尊酒今應一笑開。京兆從教思廣漢。會稽聊喜得方回。

【二】

若耶溪水雲門寺。賀監荷花空自開。我恨今猶在泥滓。勸君莫棹酒船回。

戲書李伯時畫御馬好頭赤

山西戰馬飢無肉。夜嚼長秸如嚼竹。蹄閉三丈是徐行。不信天山有坑谷。

豈如廐馬好頭赤。立仗歸來臥斜日。莫教優孟卜葬地。厚衣薪樵入銅歷。

送程七表弟知泗州

江湖不在眼。塵土坐滿顏。繫舟清洛尾。初見淮南山。淮山相媚好。曉鏡開煙鬟。持此娛使君。一笑簿領閒。使君如天馬。朝燕暮荆蠻。時無王良手。空老十二閑。聊當出毫末。化服狡與頑。勿謂無人知。古佛臨清灣。赤子視萬類。流萍閱人寰。但使可此人。餘事真茅菅。

送曹輔赴閩漕

曹子本儒俠。筆勢翻濤濶。往來戎馬閒。邊風裂儒冠。詩成橫槊裏。楯墨何曾乾。一旦事遠遊。紅塵隔巖灘。平生羊炙口。竝海搜鹽酸。一從荔支食。豈念苜蓿槃。我亦江海人。市朝非所安。常恐青霞志。坐隨白髮闌。淵明賦歸去。談笑便解官。我今何爲者。索身良獨難。憑君問清淮。秋水今幾竿。我舟何時發。霜露日已寒。

次韻王郎子立風雨有感

百年一俯仰。寒暑相主客。稍增裘褐氣。已覺團扇厄。不煩計榮辱。此喪彼有獲。我琴終不敗。無攬亦無解。後生不自牧。呻吟空挾策。振苗不待長。賣菜苦求益。此郎獨靜退。門外無行迹。但恐陶淵明。每爲飢所迫。淒風弄衣結。小雪穿門席。願君付一笑。造物亦戲劇。朝來賦雲夢。筆落風雨疾。爲君裁春衫。高會開桂籍。

次韻黃魯直嘲小德小德魯直子其母微故其詩云解著潛夫論不妨無

外家

進儼客爭起。小兒那可涯。莫欺東方星。三五自橫斜。名駒已汗血。老蚌空泥沙。但使伯仁長。還與絡秀家。

書黃庭內景經尾并敘

余既書黃庭內景經。以贈葆光道師。而龍眠居士復爲作經相其前。而畫余二人像其後。筆勢雋妙。遂爲希世之寶。嗟歎不足。故復贊之曰。

太上虛皇出靈篇。黃庭真人舞胎僊。髯者兩卿相後前。卯妙夾侍清且妍。十有二神服銳堅。巍巍堂堂入中天。問我何修果此緣。是心朝空夕了然。恐非其人世莫傳。殿以二士蒼鶴齋。南隨道師歷山澗。山人迎笑喜我還。問誰遣化老龍眠。

送蹇道士歸廬山

物之有知蓋恃息。孰居無事使出入。心無天游室不空。六鑿相攘婦爭席。法師逃入廬山。山中無人自往還。往者一空還者失。此身正在無還閒。緜緜不絕微風裏。內外丹成一彈指。人閒俛仰三千秋。騎鶴歸來與子游。

次韻黃魯直戲贈

昨夜試微涼。汗衾初退紅。我願借秋風。隨身入房櫳。君王不好事。只作好鶯鴻。細看卷蠶尾。我家真栗蓬。

書林次中所得李伯時歸去來陽關二圖後

不見何戡唱渭城。舊人空數米嘉榮。龍眠獨識殷勤處。畫出陽關意外聲。

〔一〕

兩本新圖寶墨香。尊前獨唱小秦王。爲君翻作歸來引。不學陽關空斷腸。

次韻王夷仲茶磨

前人初用茗飲時。煮之無問葉與骨。寢窮厥味白始用。復計其初碾方出。計盡功極至子磨。信哉智者能創物。破槽折杵向牆角。亦其遭遇有仲屈。歲久講求知處所。佳者出自衡山窟。巴蜀石江強鑄鑿。理疎性軟良可咄。予家江陵遠莫致。塵土何人爲披拂。

臥病逾月請郡不許復直玉堂十一月一日鎖院是日苦寒詔賜宮燭法

酒書呈同院

微霰疎疎點玉堂。詞頭夜下攬衣忙。分光御燭星辰爛。拜賜宮壺雨露香。醉眼有花書字大。老人無睡漏聲長。何時卻逐桑榆暖。社酒寒燈樂未央。

送周朝議守漢州

茶爲西南病。岷俗記二李。何人折其鋒。矯矯六君子。君家尤出力。流落初坐此。謂當收桑榆。華髮看劍履。胡爲犯風雪。歲晚行未已。念歸誠得計。願自爲謀耳。吾聞江漢閒。瘡痍有未起。莫輕襲遂老。君王付尺箠。召還當有詔。挽袖謝隣里。猶堪作水衡。供張園林美。

木山井敘

吾先君子嘗蓄木山三峯。且爲之記。與詩詩人梅二丈聖俞見而賦之。今三十年矣。而猶子千乘又得五峯益奇。因次聖俞韻。使并刻之其側。

木生不願回萬牛。願終天年仆沙洲。時來幸逢河伯秋。掀然見怪推不流。蓬婆雪嶺巧彫鏤。蟄蟲行蟻爲豪食。阿咸大膽忽持去。河伯好事不汝尤。城中古沼浸坤軸。一林瘦竹吾菟裘。二頃良田不難買。三年椹木行可樵。會將白髮對蒼巖。魯人不厭東家邱。

送千乘子能兩姪還鄉

治生不求富。讀書不求官。譬如飲不醉。陶然有餘歡。君看龐德公。白首終泥蟠。豈無子孫念。願獨貽以安。鹿門上冢回。牀下拜龍鸞。躬耕竟不起。耆舊節獨完。

念汝少多難。冰雪落綺紈。五子如一人。奉養真色難。烹雞獨饋母。自饗首宿餐。口腹恐累人。寧我食無肝。西來四千里。敝袍不言寒。秀眉似我兄。亦復心閒寬。忽然舍我去。歲晚留餘酸。我豈軒冕人。青雲意先闌。汝歸蒔松菊。環以青琅玕。橙陰三年成。可以挂我冠。清江入城郭。小圃生微瀾。相從結茅舍。曝背談金鑿。

送周正孺知東川

得郡書生榮。還家昔人重。而況東西川。千騎許上冢。里門下車入。父老自驚聳。端如何武賢。不事長卿寵。清時養材傑。杞梓方培擁。未應遺合抱。取用及把拱。如君尙出麾。願我宜耕蠶。告歸謝先手。求去悔不勇。豈云慕廉退。實自知衰冗。爲君掃棠陰。畫像或相踵。

題李伯時畫趙景仁琴鶴圖二首

清獻先生無一錢。故應琴鶴是家傳。誰知默鼓無絃曲。時向珠宮舞幻僊。

【二】

醜石寒松未易親。聊將短曲調長人。乘軒故自非明眼。終日傲傲舞嬰薪。

次前韻再送周正孺

東川得望郎。坐與西爭重。高風傾石室。舊學鄙文冢。蜀人安使君。所至野不聳。

竹馬迎細侯。大錢送劉寵。遙知句溪路。老稚相扶擁。看畫古叢祠。百怪朝幽拱。牛頭與兜率。雲木蔚堆壘。醉鄉追舊游。筆陣賈餘勇。聊將詩酒樂。一掃簿書冗。西風吹好句。珠玉本無踵。

書王定國所藏煙江疊嶂圖

江上愁心千疊山。浮空積翠如雲煙。山耶雲耶遠莫知。煙空雲散山依然。但見兩崖蒼蒼暗絕谷。中有百道飛來泉。縈林絡石隱復見。下赴谷口爲奔川。川平山開林麓斷。小橋野店依山前。行人稍度喬木外。漁舟一葉江吞天。使君何從得此本。點綴毫末分清妍。不知人閒何處有此境。徑欲往買二頃田。君不見武昌樊口幽絕處。東坡先生留五年。春風搖江天漠漠。暮雲卷雨山娟娟。丹楓翻鴉伴水宿。長松落雪驚畫眠。桃花流水在人世。武陵豈必皆神僊。江山清空我塵土。雖有去路尋無緣。還君此畫三嘆息。山中故人應有招我歸來篇。王晉卿作煙江疊嶂圖。僕賦詩十四韻。晉卿和之詩。特奇麗。因復次韻。不獨紀其詩畫之美。亦爲道其出處契闊之故而終之以不忘在莒之戒。亦朋友忠愛之義也。

山中學頭望日邊

長安不見空雲煙

歸來長安望山上

時移事改應潯然

管絃去盡賓客散。惟有馬埒編金泉。濕注故自千里足。要飽風雪輕山川。屈居華屋啗棗脯。十年僂仰龍旂前。卻因瘦病出奇骨。鹽車之厄寧非天。風流文采磨不盡。水墨自與詩爭妍。畫山何必山中人。田歌自古非知田。鄭虔三絕君有二。筆勢挽回三百年。欲將巖谷亂窈窕。眉峰修嫵誇連娟。人閒何有春一夢。此身將老蠶三眠。山中幽絕不可久。要作平地家居仙。能令水石長在眼。非君好我當誰緣。願君終不忘在莒。樂時更賦因山篇。

次韻王定國會飲清虛堂

何遜揚州又幾年。官梅詩興故依然。何人可復問季孟。與子不妨中聖賢。卜築君方淮上郡。歸心我已劍南川。此身正似蠶將老。更盡春光一再眠。與龍節侍宴前一日微雪與子由同訪王定國小飲清虛堂定國出數詩皆佳而五言尤奇子由又言昔與孫巨源同過定國感念存歿悲嘆久之夜歸稍醒各賦一篇明日朝中以示定國也

天風浙浙飛玉沙。詔恩歸沐休早衙。遙知清虛堂裏雪。正似濔菊林中花。出門自笑無所詣。呼酒持勸惟君家。踏冰凌兢戰疲馬。扣門剝啄驚寒鴉。羨君五字入詩律。欲與六出爭天葩。頭風已倩檄手愈。背癢卻得仙爪爬。

銀瓶瀉油浮蠟酒 紫盃鋪粟盤龍茶
幅巾起作鸚鵡舞 疊鼓誰摻漁陽搥
九衢燈火雜夢寐 十年聚散空咨嗟
明朝握手殿門外 共看銀闕瞰朝霞

王晉卿所藏著色山二首

縹緲營邱水墨仙 浮空出沒無閒
爾來一變風流盡 誰見將軍著色山

【二】

拳礪何人似退之 意行無路欲從誰
宿雲解駁晨光漏 獨見山紅澗碧時

次韻黃魯直效進士作二首

歲寒知松柏

龍蟄雖高臥 雞鳴不廢時 炎涼徒自變 茂悅兩相知
已負棟梁質 肯爲兒女姿 那憂霜質質 未喜日遲遲
難與夏蟲語 永無秋實悲 誰知此植物 亦解乘天彝

款塞來亭

蠢爾氏羌國 天誅亦久稽 既能知而內 不復議征西
斥堠銷兵火 邊城息鼓鼙 輸忠修貢職 棄過爲黔黎
雪滿流沙靜 雲沈太白低 巍巍二聖治 盛德古難齊

夜直玉堂攜李之儀端叔詩百餘首讀至夜半書其後

玉堂清冷不成眠 伴直難呼孟浩然 暫借好詩消永夜 每逢佳處輒參禪

愁侵硯滴初含凍 喜入燈花欲闌妍 寄語君家小兒子 他時此句一時編

次韻王定國得晉卿酒相留夜飲

短衫壓手氣橫秋 更著仙人紫綺裘 使我有名全是酒 從他作病且忘憂
詩無定律君應將 醉有真鄉我可侯 且倒餘尊盡今夕 睡蛇已死不須鉤

范景仁和賜酒燭詩復次韻謝之

笙磬分均上下堂 游魚舞獸自奔忙 朱絃初識孤桐韻 玉瑄猶聞秬黍香
萬事今方杏伯始 一斑我亦愧真長 此生會見三雍就 無復寥寥嘆未央

蘇東坡詩集卷三十一

古今體詩 四十首

次韻劉貢父春日賜幡勝

寬詔隨春出內朝 三軍喜氣挾狐貂 鏤銀錯落翻斜月 翦綵繽紛舞慶霄
臘雪強飛纔到地 曉風偷轉不驚條 脫冠徑醉應歸臥 便腹從人笑老詔

再和

與君流落偶還朝，過眼紛綸七葉貂。莫笑華顛羞采勝，幾人黃壤隔青霄。

行吟未計窮騷雅，坐嘯猶能出教條。記取明年江上郡，五更春枕夢春韶。

葉公乘王仲至見和次韻答之
衫絺方著亦堪朝，歲晚淒風憶阜貂。共喜鷓鴣歸禁籞，心知日月在重霄。

君如老驥初遭絡，我似枯桑不受條。強鑿霜須簪彩勝，蒼顏得酒尚能韶。

再和
衰遲何幸得同朝，溫勁如君合珥貂。誰惜異才蒙徑寸，自慚枯枿借凌霄。

光風泛泛初浮水，紅糝離離欲綴條。後日一尊何處共，奉常端冕作咸韶。

和王晉卿送梅花次韻
東坡先生未歸時，自種來禽與青李。五年不踏江頭路，夢逐東風泛蘋芷。

江梅山杏爲誰容，獨笑依依臨野水。此閒風物君未識，花浪翻天雪相激。

明年我復在江湖，知君對花三歎息。次韻王晉卿惠花栽栽所寓張退傅第中
坐來念念失前人，共向空中寓一塵。若問此花誰是主，天教閒客管青春。

次韻王晉卿上元侍宴端門

月上九門開，星河繞露臺。君方枕中夢，我亦化人來。光動仙毳綈，香餘步輦回。

王鄭州挽詞

羨君華髮起琳宮，右輔初還鼓角雄。千里農桑歌子產，一時冠蓋慕蕭嵩。

那知聚散春糧外，便有悲歡過隙中。京兆同僚幾人在，猶思對案筆生風。

書王定國所藏王晉卿畫著色山二首

白髮四老人，何曾在商顏。煩君紙上影，照我胸中山。山中亦何有，木老土石頑。

正賴天日光，澗谷紛爛斑。我心空無物，斯文定何閒。君看古井水，萬象自往還。

〔117〕

君歸嶺北初逢雪，我亦江南五見春。寄語風流王武子，三人俱是識山人。

呈定國

舊病應逢醫口藥，新妝漸畫入時眉。信知詩是窮人物，近覺王郎不作詩。

寄傲軒

先生英妙年，一掃千兔禿。仕進固有餘，不肯踐場屋。通闢何所做，傲名非傲俗。

定知軒冕中，享榮不償辱。豈無自安計，得失猶轉轂。先生獨揚揚，憂患莫能潰。

得如虎挾乙。失若龜藏六。茅簷聊寄寓。俯仰亦自足。東坡無邊春。方寸盡藏蓄。醉哦旁若無。獨侑一尊醪。牀頭車馬道。殘月挂疎木。朝客紛擾時。先生睡方熟。

送呂昌朝知嘉州

不羨三刀夢蜀都。聊將八詠繼東吳。臥看古佛凌雲閣。敕賜詩人明月湖。得句會應緣竹鶴。思歸寧復爲蓴鱸。橫空好在修眉色。頭白猶堪乞左符。

次韻黃魯直寄題郭明父府推穎州西齋二首

樹頭啄木常疑客。客去而嗔定不然。脫轄已應生井沫。解衣聊復起庖煙。平生詩酒真相污。此去文書恐獨賢。早晚西湖映華髮。小舟翻動水中天。

【二】

寂寞東京月旦州。德星無復綴珠旒。莫嗟平輿空神物。尚有西齋接勝流。

春夢屢尋湖十頃。家書新報橘千頭。雪堂亦有思歸曲。爲謝平生馬少游。

次韻秦少章和錢蒙仲

碧畦黃隴稻如京。歲美人和易得情。鑑裏移舟天外思。地中鳴角古來聲。

山圍故國城空在。潮打西陵意未平。二子有如雙白鷺。隔江相照雪衣明。

次韻錢越州

聳尹超然定逸羣。南遊端爲訪雲門。謫仙歸侍玉皇案。老鶴來乘刺史轡。

已覺簿書哀老子。故知筵豆有司存。年來齒頰生荆棘。習氣因君又一言。

同秦仲二子雨中遊寶山

平明已報百吏散。半日來陪二子閒。立鵠低昂煙雨裏。行人出沒樹林閒。

去杭州十五年復游西湖用歐陽察判韻

我識南屏金鯽魚。重來拊檻散齋餘。還從舊社得心印。似省前生覓手書。

藟合平湖久蕪沒。人經豐歲尙凋疎。誰憐寂寞高常侍。老去狂歌憶孟諸。

與莫同年雨中飲湖上

到處相逢是偶然。夢中相對各華顛。還來一醉西湖雨。不見跳珠十五年。

送子由使契丹

雲海相望寄此身。那因遠適更沾巾。不辭驛騎凌風雪。要使天驕識鳳麟。

沙漠回看清禁月。湖山應夢武林春。單于若問君家世。莫道中朝第一人。

次韻答劉景文左藏

我老詩壇仆鼓旂。借君佳句發良時。但空賀監杯中物。莫示孫郎帳下兒。

夜燭催詩金燼落。秋芳壓帽露華滋。故應好語如爬癢。有味難名只自知。

坐上復借韻送奇嵐軍通判葉朝奉

雲開踏白看繚旂

莫忘西湖把酒時

夢裏吳山連越嶠

尊前羌婦雜胡兒

夕烽過後人初醉

春雁來時雪未滋

為問從軍真樂不

書來粗遣故人知

始於文登海上得白石數升如芙蓉可作枕聞梅丈嗜石故以遺其子子

明學士子明有詩次其韻

海隅荒怪有誰珍

零落珊瑚泣季倫

法供坐令微物重

色難歸致孝心純

只疑蕙政來交趾

未信蠟珠出酒濱

願子聚為江夏枕

不勞揮扇自寧親

次韻越州見寄

莫將牛弩射羊羣

臥治何妨畫掩門

稍喜使君無疾病

時因送客見車轡

搔頭白髮秋無數

閉眼丹田夜自存

欲息波瀾須引去

吾儕豈獨坐多言

文登蓬萊閣下石壁千丈為海浪所戰時有碎裂洶灑歲久皆圓熟可愛

土人謂此彈子渦也取數百枚以養石菖蒲且作詩遺垂慈堂老人

蓬萊海上峯

玉立色不改

孤根捍滔天

雲骨有破碎

榮榮彈丸閒

瑣細成珠球

閻浮一酒耳

真妄果安在

垂慈老人眼

俯仰了大塊

置之盆盎中

日與山海對

明年菖蒲根連絡不可解

倘有蟠桃生且暮猶可待

次韻毛滂法曹感雨

江南佳公子

遺我錦繡端

攬之溫如春

公子焉得寒

斂藏以自潤

牛斗何足干

空庭月與影

強結三友歡

欲歡在一醉

常恐尊中乾

捨酒尙可樂

明珠如彈丸

道子閒暇時

種子田中丹

一朝涉世故

空腹容欺謾

永媿坡閒人

布褐為我完

雪堂初覆瓦

上簾無下莞

一笑便傾倒

五年得輕安

公子豈我徒

衣鉢傳一箠

悲吟古寺中

穿帷雪漫漫

他年記此味

芋火對嬾殘

送鄧宗古還鄉

廣漢有姜子

孝弟行里閭

赤眉雖豺虎

弛兵過其墟

南鄭有李邵

妙得甘公書

夜坐指流星

驚倒兩使車

西南固多士

君得二子餘

凜凜忠文公

搜士及樵漁

歲晚終不食

心惻當何如

參寥上人初得智果院會者十六人分韻賦詩賦得心字

漲水返舊壑。飛雲思故岑。念君忘家客。亦有懷歸心。三閒得幽寂。數步藏清深。攢金盧橘塢。散火楊梅林。茶筍盡禪味。松杉真法音。雲崖有淺井。玉醴常半尋。遂名參寥泉。可濯幽人襟。相攜橫嶺上。未覺衰年侵。一眼吞江湖。萬象涵古今。願君更小築。歲晚解我簪。

哭王子立次兒子迨韻三首

彭城初識子。照眼白而長。異夢成先兆。清言得未嘗。豈唯知禮意。遂欲補詩亡。咄咄真相逼。諸生敢雁行。

【二】

非無伯鸞志。獨有子雲悲。恨子非天合。猶能使我思。兒曹莫悽慟。老眼欲枯萎。會哭皆豪傑。誰爲感舊詩。

【三】

龍困管魚服。羊儂或虎蒙。息息成鬼錄。憤憤到天公。偶落藩牆上。同游羿設中。回看十年事。黃葉卷秋風。

異 鵲 井 敘

熙寧中柯侯仲常通守漳州。以救饑得民有二鵲棲其廳事。訖侯之去鵲亦送之。漳人異

焉。爲賦此詩。

昔我先君子。仁孝行於家。家有五畝園。玄鳳集桐花。是時烏與鵲。巢穀可俯拏。憶我與諸兒。飼食觀羣呀。里人驚瑞異。野老笑而嗟。云此方乳哺。甚畏鷲與蛇。手足之所及。二物不敢加。主人若可信。衆鳥不我遐。故知中孚化。可及魚與蝦。柯侯古循吏。惻惻真無華。臨漳所全活。數等江干沙。仁心格異族。兩鵲棲其衙。但恨不能言。相對空梳梳。善惡以類應。古語良非夸。君看彼酷吏。所至號鬼車。

次韻詹適宣德小飲巽亭

君方夢謫仙。我亦弔文園。江上同三黜。天涯共一尊。濤雷殷白晝。梅雪耿黃昏。歸去多情雨。應隨御史軒。

東川清絲寄魯冀州戲贈

鵝溪清絲清如冰。上有千歲交枝藤。藤生谷底飽風雪。歲晚忽作龍蛇升。嗟我雖爲老侍從。骨寒只受布與綰。牀頭錦衾未還客。坐覺芒刺在背膺。豈如髯卿晚乃貴。福祿正似川方增。醉中倒著紫綺裘。下有半臂出縹綾。封題不敢妄裁翦。刀尺自有佳人能。遙知千騎出清曉。積雪未放浮塵興。白須紅帶柳絲下。老弱空巷人相登。但放奇紋出領袖。吾髯雖老無人憎。

怡然以垂雲新茶見餉報以大龍團仍戲作小詩
妙供來香積。珍烹具大官。揀芽分雀舌。賜茗出龍團。曉日雲菴暖。春風浴殿寒。
聊將試道眼。莫作兩般看。

次韻王忠玉游虎邱三首

當年大白此相浮。老守娛賓得二邱。白髮重來故人盡。空餘叢桂小山幽。

【二】

青蓋紅旂映玉山。新詩小草落元泉。風流使者人爭看。知有真娘立道邊。

【三】

舞衫歌扇轉頭空。只在青山杳靄中。若共吳王鬪百草。使君未敢借驚鴻。

寄蔡子華

故人送我東來時。手栽荔子待我歸。荔子已丹吾髮白。猶作江南未歸客。

江南春盡水如天。腸斷西湖春水船。想見青衣江畔路。白魚紫筍不論錢。

霜髯三老如霜檜。舊交零落今誰輩。莫從唐舉問封侯。但遣麻姑更爬背。

和錢四寄其弟蘇

再見濤頭湧玉輪。煩君久駐浙江春。年來總作維摩病。堪笑東西二老人。

【一】

老來日月似車輪。此去知逢幾箇春。昨夜冰花猶作柱。曉來梅子已生人。

故周茂叔先生濂溪

世俗眩名實。至人疑有無。怒移水中蟻。愛及屋上烏。坐令此溪水。名與先生俱。

先生本全德。廉退乃一隅。因拋彭澤米。偶似西山夫。遂即世所知。以為溪之呼。

先生豈我輩。造物乃其徒。應同柳州柳。聊使愚溪愚。

次周濂韻并敘

周濂游天竺觀激水作詩云。拳石蒼婆色兩青。竹龍驅水轉山鳴。夜深不見跳珠碎。疑是

簷間滴雨聲。東坡和之

道眼轉丹青。常於寂處鳴。早知雨是水。不作兩般聲。

送南屏謙師并引

南屏謙師妙於茶事。自云得之於心。應之於手。非可以言傳。學到者十二月二十七日聞。

軾游落星遠來設茶作此詩贈之。

道人曉出南屏山。來試點茶三昧手。忽驚午盞兔毛斑。打作春糴鵝兒酒。

天台乳花世不見。玉川風腋今安有。先生有意續茶經。會使老謙名不朽。

次韻子由使契丹至涿州見寄四首

老人癡鈍已逃寒。子復辭行理亦難。

要到盧龍看古塞。

投文易水弔燕丹。

【二】

胡羊代馬得安眠。

窮髮之南共一天。

又見子卿持漢節。

遙知遺老泣山前。

【三】

氈毳年來亦甚都。

時時鳩舌問三蘇。

那知老病渾無用。

欲向君王乞鏡湖。

【四】

始憶庚寅降屈原。

旋看蠟鳳戲僧虔。

隨翁萬里心如鐵。

此子何勞爲買田。

蘇東坡詩集卷三十二

古今體詩

二十七首

臥病彌月。聞垂雲花開。順閣黎以詩見招。次韻答之。

道人心似水。

不礙照花妍。

宴坐春強半。

清陰月屢遷。

平生無起滅。

一念有陳鮮。

嫋嫋風枝舉。

離離日萼薦。

病吟終少味。

老醉不成顛。

何必遨頭出。

湖中有散仙。

雪後便欲與同僚尋春。一病彌月。雜花都盡。獨牡丹在爾。劉景文左藏和。

順閣黎詩見贈。次韻答之。

殘花怨久病。

剩雨泣餘妍。

不見雙旌出。

空令九陌遷。

知君苦寂寞。

妙語嚼芳鮮。

淺紫從爭發。

浮紅任蚤蕪。

天葩尙青萼。

國色待華顛。

載酒邀詩將。

臞儒不是仙。

病後醉中

病爲兀兀安身物。

酒作逢逢入腦聲。

堪笑錢塘十萬戶。

官家付與老書生。

次韻劉景文周次元寒食同游西湖

絮飛春減不成年。

老境同乘下瀨船。

藍尾忽驚新火後。

山西老將詩無敵。

洛下書生語更妍。

共向北山尋二士。

畫橈鼙鼓聒清眠。

連日與王忠玉張金翁游西湖。訪北山清順道潛二詩僧。登垂雲亭。飲參寥泉。最後過唐州陳使君夜飲。忠玉有詩。次韻答之。

北山非自高。

千仞付我足。

西湖亦何有。

萬象生我目。

雲深人在塢。

風靜響應谷。

與君皆無心。

信步行看竹。

竹閒逢詩鳴。

眼色奪湖淥。

百篇成俯仰。

二老相追逐。

故應千頃池。

養此一雙鶴。

山高路已斷。

亭小膝更促。

夜尋三尺井。

渴飲半甌玉。

明朝闌絲管。

寒食雜歌哭。

使君坐無聊。

狂客來不速。

載酒有鴟夷。

扣門非啄木。

浮蛆澆金盃。翠羽出華屋。須臾便陳迹。覺夢那可續。及君未渡江。過我動秉燭。一笑換人爵。百年終鬼錄。

謝曹子方惠新茶

陳植文華斗石高。景宗詩句復稱豪。數奇不得封龍領。祿仕何妨似馬曹。囊簡久藏科斗字。劍鋒新瑩鸞鶻膏。南州山水能為助。更有英辭勝廣騷。

新茶送發判程朝奉以餽其母有詩相謝次韻答之

縫衣付與灑陽尉。舍肉懷歸潁谷封。聞道平反供一笑。會須難老待千鍾。火前試焙分新胯。雪裏頭綱輟賜龍。從此升堂是兄弟。一甌林下記相逢。

次韻送張山人歸彭城

羨君飄蕩一虛舟。來作錢塘十日游。水洗禪心都眼淨。山供詩筆總眉愁。雪中乘興真聊爾。春盡思歸卻罷休。何日五湖從范蠡。種魚萬尾橘千頭。

次韻林子中王彥祖唱酬

蚤知身寄一漚中。晚節尤驚落木風。昨夢已論三世事。歲寒猶喜五人同。雨餘北固山圍座。春盡西湖水映空。差勝四明狂監在。更將老眼犯塵紅。

壽星院寒碧軒

清風肅肅搖窗扉。窗前修竹一尺圍。紛紛蒼雪落夏簟。冉冉綠露沾人衣。

日高山蟬抱葉響。人靜翠羽穿林飛。道人絕粒對寒碧。為問鶴骨何緣肥。

書劉景文左藏所藏王子敬帖

家雞野鶩同登俎。春蚓秋蛇總入奩。君家兩行十二字。氣壓鄴侯三萬籤。

書劉景文所藏宗少文一筆畫

宛轉回文錦。綵盈連理花。何須郭忠恕。匹素畫縑車。

真覺院有洛花花時不暇往四月十八日與劉景文同往賞枇杷

綠暗初迎夏。紅殘不及春。魏花非老伴。盧橘是鄉人。井落依山盡。巖崖發興新。歲寒君記取。松雪看蒼鱗。

又和景文韻

牡丹松檜一時栽。付與春風自在開。試問壁閒題字客。幾人不為看花來。

西湖壽星院此君軒

臥聽謾謾碎龍鱗。俯看蒼蒼立玉身。一舸鴟夷江海去。尙餘君子六千人。

此君軒

雲幢煙節十洲人。犀甲檀槍百萬軍。翳蒼叢生何足道。此君真是此君君。

觀臺

三界無所住。一臺聊自寧。塵勞付白骨。寂照起黃庭。殘磬風中嫺。孤燈雪後青。須防童子戲。投瓦犯清冷。

遊中峯杯泉

石眼杯泉舉世無。要知杯渡是凡夫。可憐狡獪維摩老。戲取江湖入鉢盂。

仲天睨王元直自眉山來見余錢塘留半歲既行作絕句五首送之

仲君豈弟多學。王子清修寡言。病後空驚鶴瘦。時來或作鵬鶩。

【二】

海角頰君遠訪。江源與我同來。剩作數詩相送。莫教萬里空回。

【三】

三人一旦同行。留下高齋月明。遙想扁舟京口。尙餘孤枕潮聲。

【四】

更欲留君久住。念君去國彌年。空使犀顛玉頰。長懷髯舅淒然。

【五】

爲余遠致殷勤。瑞草橋邊老人。紅帶雅宜華髮。白膠光泛新春。

贈善相程傑

心傳異學不謀身。自要清時閱指紳。火色上騰雖有數。急流勇退豈無人。

書中苦覓原非訣。醉裏微言卻近真。我似樂天君記取。華顛賞徧洛陽春。

參寥惠楊梅

新居未換一根椽。只有楊梅不直錢。莫共金家鬪甘苦。參寥不是老婆禪。

次韻林子中蒜山亭見寄

奇逸多聞老敬通。何人慷慨解憐翁。十年簿領催衰白。一笑江山發醉紅。

聞道賦詩臨北固。未應舉扇向西風。叩頭莫喚無家客。歸掃岷峨一畝宮。

再和并答楊次公

崑盧海上妙高峯。二老遙知說此翁。聊復艤舟尋紫翠。不妨持節散陳紅。

高懷卻有雲門興。好句真傳雪竇風。唱我三人無譜曲。馮夷亦合舞幽宮。

次韻劉景文送錢蒙仲三首

誰識天閑老驥。不爭日暮長途。送盡青雲九子。歸去扁舟五湖。

【二】

寄語竹林社友。同書桂籍天倫。王郎獨爲鬼錄。世閒無此玉人。

【三】

五字古原春草。千金漢殿長門。經緯尙餘三策。典刑爾與諸孫。善提寺南漪堂杜鵑花。

南漪杜鵑天下無。披香殿上紅氍毹。鶴林兵火真一夢。不歸閩苑歸西湖。

寒具

纖手搓來玉數尋。碧油輕蘸嫩黃深。夜來春睡濃於酒。壓扁佳人纏臂金。

題楊次公春蘭

春蘭如美人。不采羞自獻。時聞風露香。蓬艾深不見。丹青寫真色。欲補離騷傳。對之如靈均。冠佩不敢燕。

題次公蕙

蕙本蘭之族。依然臭味同。曾爲水仙佩。相識楚辭中。幻色雖非實。真香亦竟空。云何起微馥。鼻觀已先通。

次韻曹輔寄壑源試焙新芽

仙山靈雨濕行雲。洗徧香肌粉未勻。明月來投玉川子。清風吹破武林春。要知冰雪心腸好。不是膏油首面新。戲作小詩君勿笑。從來佳茗似佳人。

次韻袁公濟謝苧袍

燥吻時時著酒濡。要令臥室致文殊。河魚潰腹空號楚。汗水流骸始信吳。自笑方求三歲艾。不如長作獨眠夫。羨君清瘦真仙骨。更助飄飄鶴背軀。

次韻楊次公惠徑山龍井水

漏盡雞號厭夜行。年來小器溢餅罌。棄官縱未歸東海。罷郡猶堪作水衡。幻色將空眼先暗。勝遊無礙脚殊輕。空煩遠致龍淵水。寧復臨池似伯英。

次韻劉景文登介亭

澤國梅雨餘。衰年困蒸溽。高堂磨新磚。頗覺利腰足。松根百尺井。兩綆飛淨淥。流觴聚兒童。一笑爲捧腹。清風信可御。剛氣在巖麓。始知共此世。物外無三伏。長歌入雲去。不待絃管逐。西湖真西子。煙樹點眉目。濤江少醞藉。高浪翻雪屋。俛仰拊四海。百世飛鳥速。遠追錢氏餘。近弔祖侯躅。吾生如寄耳。寸晷輕尺玉。誰似劉將軍。逸韻謝邊幅。千言一揮手。五車不再讀。春當彩雞舞。月峽哀猿哭。朝先啼鳩起。暮與寒蠶續。我老廢吟哦。賴君時擊觸。從今事遠覽。發初此幽谷。清游得三昧。至樂謝五欲。莫作狂道士。氣壓劉師服。

袁公濟和劉景文登介亭詩復次韻答之

昏昏墮醉夢。奈此六月溽。君詩如清風。吹我朝睡足。登臨得佳句。江白照湖綠。袖手獨不言。默藁已在腹。是時風雨過。靄靄雲歸麓。疏星帶微月。金火爭見伏。惜哉此清景。變滅不可逐。歸來讀君詩。耿耿猶在目。卻思少年日。聲價爭場屋。文如翻水成。賦作叉手速。秋風起鴻雁。我亦繼華躅。那知君蹭蹬。獨泣荆山玉。相見南新道。青衫垂破幅。蚤知事大謬。恨不十年讀。莫嫌馮唐老。終勝賈誼哭。今年復爲僚。舊好許重續。升沈何足道。等是蠻與觸。共爲湖山主。出入窮澗谷。衆馳君不爭。人棄我所欲。何時神武門。相約挂冠服。

介亭餞楊傑次公

籃輿西出登山門。嘉興我友尋仙村。丹青明滅風篁嶺。環珮空響桃花源。前朝欲上已蠟履。黑雲白雨如傾盆。今晨積霧卷千里。豈畏觸熱生病根。在家頭陀無爲子。久與青山爲弟昆。孤峯盡處亦何有。西湖鏡天江抹坤。臨高揮手謝好住。清風萬壑傳其言。風迴響答君聽取。我亦到處隨君軒。次京師韻送表弟程懿叔赴夔州運判。與子甥舅氏。摧頽各蒼顏。竝爲東諸侯。長此佳江山。寒松無時花。安得插鬢鬢。惟將老不死。一笑榮枯閒。我甚似樂天。但無素與蠻。挂冠及未老。當獲一紀閒。

子亦拙進取。才高命堅頑。譬如萬斛舟。行此九折灣。仲氏新得道。一漚目塵寰。歲晚家鄉路。莫遣生榛菅。

葉教授和淨字韻詩復次韻爲戲記龍井之遊

先生魯諸儒。飲食清不溽。空腸出秀句。吟嚼五味足。華堂鬧絲管。眸子漲春濼。先生疾走避。面冷毒在腹。歸來煮瓠葉。弟子歌旱麓。聲淫及靈臺。中有鹿鹿伏。功名一走兔。何用千人逐。故應容我輩。清坐時閉目。高亭石排衙。木杪挂飛屋。我來無時節。客亦不待速。似聞雪髯叟。西嶺訪遺躅。朝陽入潭洞。金碧涵水玉。泉扉夜不扃。雲袂本無幅。慈皇付寶榻。神侶得幽讀。訥菴有老人。宴坐天魔哭。時來獻瓊瑤。法供燈相續。吾儕詩酒污。欲往無乃觸。齋厨費晨炊。車騎滿山谷。願聞第一義。鉢飯非所欲。便投切雲冠。予幼好奇服。

次韻林子中見寄

飄零洛社數遺民。詩酒當年困惡賓。元亮本無適俗韻。孝章要是有名人。蒜山小隱雖爲客。江水西來亦帶岷。卷卻西湖千頃葑。笑看魚尾更莘莘。

安州老人食蜜歌

安州老人心似鐵。老人心肝小兒舌。不食五穀惟食蜜。笑指密蜂作檀越。

蜜中有詩人不知，
 小兒得詩如得蜜。
 東坡先生取入塵，
 因君寄與雙龍餅。

次韻錢穆父紫薇花二首

虛白堂前合抱花，
 折得芳莖兩眼花。

【二】

少年不願萬戶侯，
 虛名無用今白首。

送張嘉州

峨眉山月半輪秋，
 笑談萬事真何有。

亦不願識韓荆州，
 夢中卻到龍泓口。

影入平羌江水流，
 一時付與東巖酒。

絕句
 春來濯濯江邊柳，
 秋後離離湖上花。

不羨千金買歌舞，
 一篇珠玉是生涯。

還引世閒癡小兒，
 一笑看詩百憂失。

恰似飲茶甘苦雜，
 三吳六月水如湯。

老人心似雙龍井，
 物化無涯生有涯。

次韻蘇伯固主簿重九

雲閉朱袖拂雲和，
 墨翻衫袖吾方醉。

紙落雲煙子思多，
 九日袁公濟有詩次其韻。

九日袁公濟有詩次其韻

古來靜治得清閒，
 平生傾蓋悲歡裏。

我愧真長也一斑，
 蚤晚抽身簿領閒。

和公濟飲湖上

昨夜醉歸還獨寢，
 須知老人興不淺。

曉來宿雨鳴孤枕，
 莫學公榮不共飲。

次韻景文山堂聽箏三首

忽憶韓公二妙姝，
 琵琶箏韻落空無。

【二】

馬上胡琴塞上姝，
 鄭中丞後有人無。

【三】

荻花楓葉憶秦姝，
 切切玄絃細欲無。

莫把胡琴挑醉客，
 回看霜戟褚公須。

秋晚客興

草滿池塘霜送梅，客夢冷隨楓葉斷。

秋興三首

野鳥游魚信往還，可憫摧頹仍健食。

【一】

故里依然一夢前，報國無成空白首。

【二】

鳳池邊星斗光，去國何年雙鬢雪。

贈劉景文

荷盡已無擎雨蓋，菊殘猶有傲霜枝。

送李陶通直赴清溪

疎林野色近樓臺，愁心低逐雁行來。

天圍故越侵雲盡，流年又喜經重九。

湖上孤城帶月回，可意黃花是處開。

此身同寄水雲間，此身通脫屢酡顏。

誰家晚吹殘紅葉，年華豈是催人老。

一夜歸心滿舊山，雙鬢無端只自斑。

相攜重上釣魚船，退耕何處有名田。

嘗陪大幘全陳迹，黃雞白酒雲山約。

謬忝承明愧昔年，此計當時已浩然。

宴餘香滿上書囊。

樓前夜月低韋曲。

雲裏車聲出未央。

黃花重見一枝霜。

傷心無限厭厭夢。

長似秋霄一倍長。

菊殘猶有傲霜枝。

一年好景君須記。

正是橙黃橘綠時。

忠文文正二大老，從來勢利關心薄。

蘇李廣平三舍人，此去溪山琢句新。

喜見通家賢子弟，肯向西湖畱數月。

自言得邑少風塵，錢塘初識小麒麟。

辯才老師退居龍井，不復出入。余往見之，嘗出至風篁嶺。左右驚曰：遠公復過虎溪矣。辯才笑曰：杜子美不云乎，與子成二老，來往亦風流。因作亭

嶺上，名曰過溪，亦曰二老。謹次辯才韻。

日月轉雙轂，今古同一邱。惟此鶴骨老，凜然不知秋。去往兩無礙，人天爭挽輿。去如龍出山，雷雨卷潭湫。來如珠還浦，魚鼈爭駢頭。此生暫寄寓，常恐名實浮。我比陶令愧，師爲遠公優。送我還過溪，溪水當逆流。聊使此山人，永記二老游。大千在掌握，寧有離別憂。

問淵明

子知神非形，何復異人天。豈惟三中才，所在靡不然。我引而高之，則爲星斗懸。我散而卑之，寧非山與川。三皇雖云沒，至今在我前。八百要有終，彭祖非永年。皇皇謀一醉，發此露樞妍。有酒不辭醉，無酒斯飲泉。立善求我譽，飢人食饑涎。委運憂傷生，憂去生亦還。縱浪大化中，正爲化所纏。應盡便須盡，寧復事此言。偶於龍井辯才處得款硯甚奇作小詩

羅細無紋角浪平。半丸犀壁浦雲泓。

午窗睡起人初靜。

時聽西風拉瑟聲。

書辯才白雲堂壁。

不辭清曉扣松扉。卻值支公久不歸。

山鳥不鳴天欲雪。

卷簾惟見白雲飛。

送程之邵簽判赴闕

夜光不自獻。天驥良難知。從來一狐腋。或出五羖皮。賢哉江東守。收此幕中奇。無華豈易識。既得不自隨。留君望此府。助我憐其衰。二年促膝語。一旦長揖辭。林深伏猛在。岸改潛珍移。去此當安從。失君徒自悲。念君瑚璉質。當今臺閣宜。去矣會有合。豈當懷其私。

寄題梅宣義園亭

仙人子真後。還隱吳市門。不惜十年力。治此五畝園。初期橘爲奴。漸見桐有孫。清池壓邱虎。異石來湖黿。敲門無貴賤。遂性各琴尊。我本放浪人。家寄西南坤。數廬雖尙在。小圃誰當樊。羨君欲歸去。奈此未報恩。愛子幸僚友。久要疑弟昆。明年過君西。飲我空餅盆。

觀湖二首

乘槎遠引神仙客。

萬里清風上海濤。

回首不知沙界小。

飄衣猶覺色塵高。

須彌有頂低垂日。

兜率無根下戴鼈。

釋梵茫然齊劫火。

飛雲不覺醉陶陶。

【二】

朝陽照水紅光開。玉濤銀浪相徘徊。山分宿霧儘寬遠。雲駕高風馳送來。昇霞影色鼓殘火。及物氣餒明纖埃。可憐極大不知己。浮生野馬悠悠哉。

醉題信夫方丈

鶴作精神松作筋。

塔庭蘭玉一時春。

願君且住三千歲。

長與東坡作主人。

元祐五年十二月十二日。同景文義伯聖途次元伯固仲蒙游七寶寺題。

竹上

結根豈殊衆。修柯獨出林。孤高不可恃。歲晚霜風侵。

熙寧中。軾通守此郡。除夜直都廳。因繫皆滿。日暮不得返舍。因題一詩於壁。今二十年矣。衰病之餘。復忝郡寄。再經除夜。庭事蕭然。三園皆空。蓋同僚之力。非拙朽所致。因和前篇呈公濟。子伴二通守。

前詩

除日常早歸。官事乃見留。執筆對之泣。哀此繫中囚。小人營儼糧。墮網不知羞。我亦戀薄祿。因循失歸休。不須論賢愚。均是爲食謀。誰能暫縱遣。閔默愧前修。

山川不改舊，歲月逝不謂。百年一俯仰，五勝更王囚。同僚比岑范，德業前人羞。坐令老鈍守，嘯諾獲少休。卻思二十年，出處非人謀。齒髮付天公，缺壞不可修。

蘇東坡詩集卷三十三

古今體詩

六十四首

次韻楊公濟奉議梅花十首

梅梢春色弄微和。

作意南枝翦刻多。

月黑林閒逢綺袂。

霜陵醉尉誤誰何。

【一】

相逢月下是瑤臺。

藉草清尊連夜開。

明日酒醒應滿地。

空令飢鶴啄莓苔。

【二】

綠髮尋春湖畔回。

萬松嶺上一枝開。

而今縱老霜根在。

得見劉郎又獨來。

【三】

月地雲階漫一尊。

玉兒終不負東昏。

臨春結綺荒荆棘。

誰信幽香是返魂。

【四】

日出冰漸散水花。

野梅官柳漸敲斜。

西郊欲就詩人飲。

黃四孃東子美家。

【五】

君知早落坐先開。

莫著新詩句句催。

嶺北霜枝最多思。

忍寒畱待使君來。

【六】

冰盤未薦含酸子。

雪嶺先看耐凍枝。

應笑春風木芍藥。

豐肌弱骨要人醫。

【七】

寒雀喧喧凍不飛。

逸林空暍未開枝。

多情好與風流伴。

不到雙雙燕子時。

【八】

皎綃翦碎玉管輕。

檀暈妝成雪月明。

肯伴老人春一醉。

懸知欲落更多情。

【九】

縞裙練帨玉川家。

肝膽清新冷不邪。

穠李爭春猶辦此。

更教踏雪看梅花。

【十】

謝關景仁送紅梅栽二首

年年芳信負紅梅。

江畔垂垂又欲開。

珍重多情關令尹。

【一】

爲君裁向南堂下。記取他年著子時。

酸醜不堪調衆口。

使君風味好攢眉。

次韻劉景文路分上元

華燈闕艱歲。冷月挂空府。三吳重時節。九陌自歌舞。云從月幾望。遂至一百五。嘉辰可屈指。樂事相繼武。今宵掃雲陣。極目淨天宇。嬉游各忘歸。闌咽頃未睹。飛毬互明滅。激水相吞吐。老去反兒童。歸來尙鑼鼓。新年消暗雪。舊歲添絲縷。何時九江城。相對兩漁父。

游寶雲寺得唐彥猷爲杭州日送客舟中手書一絕句云山雨霏微不滿空。

畫船來往疾輕鴻。誰知獨臥朱籬裏。一榻無塵四面風。明日送彥猷之子垞。

赴鄂州舟中遇微雨感嘆前事因和其韻作兩首送之且歸其書唐氏

二妙凋零筆法空。

忽驚雲海戲羣鴻。

清詩不敢私囊篋。

人道黃門有父風。

【二】

出處榮枯一笑空。

十年社燕與秋鴻。

誰知白首長河路。

還臥當時送客風。

送江公著知吉州

三吳行盡千山水。

猶道桐廬更清美。

豈惟濁世隱狂奴。

時平亦出佳公子。

初冠惠文讀城旦。

晚入奉常陪劍履。

方將華省起彈冠。

忽憶釣臺歸洗耳。

未應良木棄大匠。

要使名駒試千里。

奉親官舍當有擇。

得郡江南差可喜。

白粲連檣一萬艘。

紅妝執樂三千指。

簿書期會得餘閒。

亦念人生行樂耳。

聞錢道士與越守穆父飲酒送一壺

龍根爲脯玉爲漿。

下界寒醅亦漫嘗。

一紙鸞經逸少醉。

他年鵬賦謫仙狂。

金丹自足留衰鬢。

苦淚何須點別腸。

吳郡舊邦遺澤在。

定應符竹付諸郎。

再和楊公濟梅花十絕

一枝風物便清和。

看盡千林未覺多。

結習已空從著袂。

不須天女問云何。

【二】

天教桃李作輿臺。

故遣寒梅第一開。

憑仗幽人收艾納。

國香和雨入青苔。

【三】

白髮思家萬里回。

小軒臨水爲花開。

故應剩作詩千首。

知是多情得得來。

【四】

人去殘英滿酒尊。

不堪細雨濕黃昏。

夜寒那得穿花蝶。

知是風流楚客魂。

【五】

春入西湖到處花。

裙腰芳草抱山斜。

盈盈解佩臨煙浦。

脈脈當墟傍酒家。

【六】

莫向霜晨怨未開。白頭朝夕自相催。斬新一朶含風露。恰似西廂待月來。

【七】

洗盡鉛華見雪肌。要將真色鬪生枝。檀心已作龍涎吐。玉頰何煩獺髓醫。

【八】

湖面初驚片片飛。尊前吹折最繁枝。何人會得春風意。怕見梅黃雨細時。

【九】

長恨漫天柳絮輕。只將飛舞占清明。寒梅似與春相避。未解無私造物情。

【十】

北客南來豈是家。醉看參月半橫斜。他年欲識吳姬面。秉燭三更對此花。

次韻曹子方運判雪中同游西湖

詞源灑灑波頭展。清唱一聲巖谷滿。未容雪積句先高。豈獨湖開心自遠。

雲山已作歌眉淺。山下碧流清似眼。尊前侑酒只新詩。何異書魚餐蠶簡。

次韻仲殊雪中遊西湖二首

夜半幽夢覺。稍聞竹葦聲。起續凍折絃。爲鼓一再行。曲終天自明。玉樓已嵒嶮。

有懷二三子。落筆先飛爨。共爲竹林會。身與孤鴻輕。秀語出寒餓。身窮詩乃亨。

禪老復何爲。笑指孤煙生。我獨念祭者。誰與予目成。

【一】

寶雲樓閣闌千門。林靜初無一馬喧。閉戶莫教風掃地。卷簾疑有月臨軒。

水光激澗猶浮碧。山色空濛已斂昏。乞得湯休奇絕句。始知鹽絮是陳言。

次韻參寥同前

朝來處處白氍毹。樓閣山川盡一如。總是爛銀併白玉。不知奇貨有誰居。

與葉淳老侯敦夫張秉道同相視新河秉道有詩次韻二首

君不見元帥府前羅萬戟。濤頭未順千弩射。至今鳳皇山下路。長借一箭開兩翼。

我鑿西湖還舊觀。一眼已盡西南碧。又將回奪浮山險。千艘夜下無南北。

坐陳三策本人謀。惟留一諾待我畫。老病思歸真暫寓。功名如幻終何得。

從來自笑畫蛇足。此事何殊食雞肋。憐君嗜好更迂闊。得我新詩喜折屐。

江湖聽了我竟歸。餘事後來當潤色。一卷閒臥洞霄宮。井有丹砂水長赤。

【二】

荆溪父老愁三害。下斬長蛟本無賴。平生倔強韓退之。文字猶爲鱸魚戒。

石門之役萬金耳，首鼠不爲吾已隘。江關開塞古有數，兩鶴飛來告成壞。
勸農使者非常人，一言已破秦民駭。上饒使君更超軼，坐脫浮山如果塊。
犇張乃我結機生，詩酒淋漓出狂怪。我作水衡君作丞，他日歸朝同此拜。

樓筍并敘

樓筍狀如魚剖之得魚子。味如苦筍而加甘芳。蜀人以饌佛僧甚貴之。而南方不知也。筍
生膚蠶中。蓋花之方孕者。正二月間可剝取。過此苦澀不可食矣。取之無害於木。而宜于
飲食。法當蒸熟。所施略與筍同。蜜煮酢浸。可致千里外。今以餉殊長老。

贈君木魚三百尾，中有鷺黃子魚子。夜叉割瘦欲分甘，籙龍藏頭敢言美。
願隨蔬果得自用，勿使山林空老死。問君何事食木魚，烹不能鳴固其理。

次韻曹子方龍山真覺院瑞香花

幽香結淺紫，來自孤雲岑。骨香不自知，色淺意殊深。移栽青蓮宇，遂冠薜蘿林。
初爲楚臣佩，散落天女襟。君持風霜節，耳冷歌笑音。一逢蘭蕙質，稍回鐵石心。
置酒要妍暖，養花須晏陰。及此陰晴閒，恐致慳吝霖。彩雲知易散，鷓鴣憂先吟。
明朝便陳迹，試著丹青臨。

送小本禪師赴法雲

寓形天宇內，出處會有役。澹然都無營，百年何由畢。山林等憂患，軒冕亦戲劇。
我未卽歸休，師寧要安逸。王城滿豪傑，議論紛黑白。聖諦第一義，對面誰不識。
師來亦何事，孤月挂空碧。是身如浮雲，安得限南北。出岫本無心，既雨歸亦得。
珠泉有舊約，何年挂餅錫。

書渾令公燕魚朝恩圖

咸寧英氣似汾陽，夜飲軍容出紅妝。不須纏頭萬匹錦，知君未辦作呂強。

龐公

襄陽龐公少檢束，白髮不髡亦不俗。世所奔趨我獨棄，我已有餘彼不足。
鹿門有月樹下行，虎溪無風舟上宿。不識當時捕魚客，但愛長康畫金粟。
杜口如今不復言，龐公爲人不曲局。東西有人問老翁，爲道明燈照華屋。

戲書

五言七言正兒戲，三行兩行亦偶爾。我性不飲只解醉，正如春風弄羣卉。
四十年來同幻事，老去何須別愚智。古人不住亦不滅，我今不作亦不止。
寄語悠悠世上人，浪生浪死一埃塵。洗墨無池筆無冢，聊爾作戲悅我神。

次韻劉景文西湖席上

二老長身屹兩峯。常撞大呂應黃鍾。將辭鄴下劉公幹。卻見雲間陸士龍。白髮憐君略相似。青山許我定相從。我今官已六百石。慙愧當年邴曼容。

次韻答馬忠玉

坡陀巨麓起連峯。積累當年慶自鍾。靈運子孫俱得鳳。慈明兄弟孰非龍。河梁會作看雲別。詩社何妨載酒從。祇有西湖似西子。故應宛轉爲君容。

三夢牡丹

風雨何年別。畱真向此邦。至今遺恨在。巧過不成雙。

予去杭十六年而復來。畱二年而去。平日自覺出處老少。雖似樂天。雖才名相遠。而安分寡求。亦庶幾焉。三月六日。來別南北山諸道人。而下天竺。惠淨師以醜石贈行。作三絕句。

當年衫鬢兩青青。強說重臨慰別情。衰髮祇今無可白。故應相對話來生。

【二】

出處依稀似樂天。敢將衰老較前賢。便從洛社休官去。猶有閒居二十年。

【三】

在郡依前六百日。山中不記幾回來。還將天竺一峯去。欲把雲根到處栽。

和林子中待制

兩翁畱滯各皤然。人笑迂疎老更堅。共把鷺兒一尊酒。相逢卯色五湖天。江邊遺愛啼斑白。海上先聲入管絃。早晚淵明賦歸去。浩歌長嘯老斜川。

次韻答黃安中兼簡林子中

老去心灰不復然。一麾江海意方堅。那堪黃散付子度。空羨蘇杭養樂天。病肺一春難白酒。別腸三夜繞朱絃。羣仙正欲吾歸去。共把清風借玉川。

畱別塞道士拱辰

黑月在濁水。何曾不清明。寸田滿荆棘。黎棗無從生。何時返吾真。歲月今崢嶸。屢接方外士。早知俗緣輕。庚桑託雞鶴。未肯化南榮。晚識此道師。似有宿世情。笑指北山雲。訶我不歸耕。仙人漢陰馬。微服方地行。咫尺不往見。煩子通姓名。願持空手去。獨控橫江鯨。

次韻子由書王晉卿畫山水一首而晉卿和二首

誤點故教同子敬。雜篇真欲擬湯休。隴雲寄我山中信。雪月追君溪上舟。會看飛仙虎頭篋。卻來顛倒拾遺裘。王孫辦作元真子。細雨斜風不濕鷗。

【一】

此境眼前聊妄想。 幾人林下是真休。 我今心似一潭月。 君已身如萬斛舟。
 看畫題詩雙鶴鬢。 歸田送老一羊裘。 明年兼與士龍去。 萬頃滄波沒兩鷗。
 次韻子由書王晉卿畫山水二首。
 老去君空見畫。 夢中我亦曾遊。 桃花縱落誰見。 水到人閒伏流。

【二】

山人昔與雲俱出。 俗駕今隨水不回。 賴我胸中有佳處。 一樽時對畫圖開。
 又書王晉卿畫四首

山陰陳迹

當年不識此清真。 強把先生擬季倫。 等是人閒一陳迹。 聚蚊金谷本何人。

雪溪乘興

溪山雪月兩佳哉。 賓主談鋒夜轉雷。 猶言不見戴安道。 爲問適從何處來。

四明狂客

毫端偶集一微塵。 何處溪山非此身。 狂客思歸便歸去。 更求勅賜柱天真。

西塞風雨

斜風細雨到來時。 我本無家何處歸。 仰看雲天真若笠。 旋收江海入蓑衣。

破琴詩并引

舊說房瑄開元中嘗宰盧氏與道士邢和璞出遊過夏口村入廢佛寺坐古松下和璞使人擊地得囊中所藏婁師德與永禪師書笑謂瑄曰頗憶此耶瑄因悵然悟前生之爲永師也故人柳子玉寶此畫云是唐本宋復古所臨者元祐六年三月十九日子自杭州還朝宿吳淞江夢長老仲殊挾琴過余彈之有異聲熟視琴頗損而有十三絃子方嘆息不已殊曰雖損尚可修曰奈十三絃何殊不答誦詩云度數形名本偶然破琴今有十三絃此生若遇邢和璞方信秦箏是響泉予夢中了然識其所謂既覺而忘之明日晝寢復夢殊來理前語再誦其詩方驚覺而殊適至意其非夢也問之殊蓋不知是歲六月見子玉之子子文京師求得其畫乃作詩并書所夢其上子玉名瑾善作詩及行草書復古名迥畫山水草木蓋妙絕一時仲殊本書生棄家學佛通脫無所著皆奇士也

破琴雖未修。 中有琴意足。 誰云十三絃。 音節如佩玉。 新琴空高張。 絲聲不附木。

宛然七絃箏。 動與世好逐。 陋矣房次律。 因循墮流俗。 懸知董庭蘭。 不識無絃曲。

書破琴詩後并引

余作破琴詩求得宋復古畫邢和璞於柳仲遠仲遠以此本託王晉卿臨寫爲短軸名爲邢房悟前生圖作詩題其上。

此身何物不堪爲，

逆旅浮雲自不知。

偶見一張閒故紙，

便疑身是永禪師。

醜石半蹲山下虎，

長松倒臥水中龍。

試君眼力看多少，

數到雲淞第幾重。

聽武道士彈賀若。

清風終日自開簾。

涼月今宵肯挂簾。

琴裏若能知賀若。

詩中定合愛陶潛。

元祐六年六月自杭州召還汝公館我於東堂閱舊詩卷次諸公韻三首

半熟黃梁日未斜。

玉堂陰合手栽花。

卻思三十年前味。

未飯鐘時已飯茶。

夢覺還驚屣響廊。

故人來炷影前香。

鬢須白盡成何事。

一帖空存老遂良。

尺一束來喚我歸。

衰年已迫故山期。

文章曹植今堪笑。

卻卷波瀾入小詩。

感舊詩并引

嘉祐中予與子由同舉制策寓居懷遠驛時年二十六而子由二十三耳一日秋風起雨作中夜偷然始有感離合之意自爾宦遊四方不相見者十嘗七八每夏秋之交風雨作木落草衰輒悽然有此感蓋三十年矣元豐中謫居黃岡而子由亦貶筠州嘗作詩以

紀其事元祐六年予自杭州召還寓居子由東府數月復出領汝陰時予年五十六矣乃作詩畱別子由而去。

牀頭枕_{馳道}雙闕夜未央。車轂鳴_{枕中}客夢安得長。新秋入_{梧葉}風雨驚_{洞房}。獨行殘_{月影}悵焉感_{初涼}。篋仕記_{懷遠}謫居念_{黃岡}一往三十年。此懷未_{始忘}扣門呼_{阿同}安寢已_{太康}。青山映_{華髮}歸計三月糧。我欲自_{汝陰}徑上_{滄江章}。想見冰_{盤中}石蜜與_{柿霜}。憐子遇_{明主}憂患時_{再嘗}。報國何_{時畢}我心久_{已降}。

蘇東坡詩集卷三十四

古今體詩

七十首

西湖秋澗東池魚窟甚。因會客呼網師遷之西池爲一笑之樂。夜歸被酒不能寐戲作放魚一首。

東池浮萍半黏塊。裂碧跳青出魚背。西池秋水尚涵空。舞澗搖深吹荇帶。吾僚有意爲遷居。老守縱饒那忍膾。縱橫爭看銀刀出。澆澗初驚玉花碎。但愁數罟損鱗鱉。未信長堤隔濤瀨。濃澁發發須臾閒。圍圍洋洋尋丈外。

安知中無蛟龍種。或恐尙有風雲會。

明年春水漲西湖。

好去相忘渺淮海。

復次放魚韻答趙承議陳教授

擾擾萬生同大塊。搶榆不羨培風背。

青邱已吞雲夢芥。

黃河復繚天門帶。

長譏韓子隘且陋。一飽鯨鯢何足脍。

東坡也是可憐人。

披扶泥沙收細碎。

逝將歸休八節灘。又欲往釣七里瀨。

正似此魚逃網中。

未與造物游數外。

且將新句調二子。湖上秋高風月會。

爲君更喚木腸兒。

脚扣兩舷歌小海。

九月十五日觀月聽琴西湖視坐客

白露下衆草。碧空卷微雲。孤光爲誰來。

似爲我與君。

水天浮四座。河漢落酒尊。

使我冰雪腸。不受麴蘖醺。尙恨琴有絃。

出魚亂湖紋。

哀彈奏舊曲。妙耳非昔聞。

良時失俯仰。此見寧朝昏。懸知一生中。道眼無由渾。

復次韻謝趙景貺陳履常見和兼簡歐陽叔弼兄弟

能詩李長吉。識字揚子雲。端能望此府。

坐嘯獲兩君。

逝將江湖去。浮我五石尊。

眷焉復少畱。尙爲世所醜。或勸莫作詩。

兒輩工織紋。

朱絃寄三款。未害俗耳聞。

共尋兩歐陽。伐薪照黃昏。是家有甘井。

汲多終不渾。

送歐陽主簿赴官韋城四首

鳳雛驥子日相高。白髮蒼顏笑我曹。

讀徧牙籤三萬軸。

卻來小邑試牛刀。

【二】

出處年來恨不齊。

一尊臨水記分攜。

江湖咫尺吾將老。

汝穎東流子卻西。

【三】

白馬津頭春水來。

白魚猶喜似江淮。

使君已復冰堂酒。

更望重新畫舫齋。

【四】

道旁垂白定沾巾。

正似當年綠髮新。

故國依然喬木在。

典刑復見老成人。

美哉一首送韋城主簿歐陽君

美哉水洋洋乎。我懷先生送之子于城隅。洋洋乎美哉水。我送之子至於新渡。念

彼嵩雒。眷焉西顧。之子于邁。至于白馬。白馬舊邦。其構維新。邦人流涕。畫

舫之孫。相其口髯。尙克似之。先生遺民。之子往字。

泛穎

我性喜臨水。得穎意甚奇。到官十日來。九日何之湄。吏民笑相語。使君老而癡。

使君實不癡。流水有令姿。遠郡十餘里。不駛亦不遲。上流直而清。下流曲而漪。

畫船俯明鏡。笑問汝爲誰。忽然生鱗甲。亂我須與眉。散爲百東坡。頃刻復在茲。

此豈水薄相。與我相娛嬉。聲色與臭味。顛倒眩小兒。等是兒戲物。水中少鱗鱖。

趙陳兩歐陽。同參天人師。觀妙各有得。共賦泛穎詩。

六觀堂老人草書

物生有象象乃滋，夢幻無根成斯須。方其夢時了非無，泡影一失俯仰殊。
 清露未晞電已徂，此滅滅盡乃真吾。云如死灰實不枯，逢場作戲三昧俱。
 化身爲醫忘其軀，草書非學聊自娛。落筆已喚周越奴，蒼鼠奮髯飲松腴。
 剡藤玉版開雪膚，游龍天飛萬人呼。莫作羞澀羊氏姝。

次韻劉景文見寄

淮上東來雙鯉魚，巧將詩信渡江湖。細看落墨皆松瘦，想見掀髯正鶴孤。
 烈士家風安用此，書生習氣未能無。莫因老驥思千里，醉後哀歌缺唾壺。

贈朱遜之并引

元祐六年九月與朱遜之會議於穎，或言洛人善接花，歲出新枝，而菊品尤多，遜之曰：菊當以黃爲正，餘可鄙也。昔叔向聞驪蔑一言，知其爲人，予於遜之亦云。

黃花候秋節，遠自夏小正。坤裳有正色，鞠衣亦令名。一從人僞勝，遂與天力爭。
 易姓寓非族，改顏隨所令。新奇既易售，粹駁宜相傾。疾惡逢伯厚，識真似淵明。
 君言我所印，世論誰敢評。願君爲霜風，一掃紫與纈。
 次韻趙景旼督兩歐陽詩破陳酒戒。一掃紫與纈。
 商也哀未忘，歲月忽已秋。祥琴雖未調，餘悲不敢留。矧此乃韻語，未入金石流。

羲之生五子，總角出銀鈎。吾家有二許，下筆兩不休。君言不能詩，此語人信不。
 千鍾斯爲堯，百榼斯爲邱。陋矣陶士衡，當以大白浮。酒中那有失，醉則不驚鷗。
 明當罰二子，已洗兩玉舟。

叔弼云履常不飲故不作詩勸履常飲

我本畏酒人，臨觴未嘗訴。平生坐詩窮，得句忍不吐。吐酒茹好詩，肝胃生滓汚。
 用此較得喪，天豈不足付。吾儕非二物，歲月誰與度。悄然得長愁，爲計已大誤。
 二歐非無詩，恨子不飲故。強爲釀一酌，將非作愁具。成言如皎日，援筆當自賦。
 他年五君詠，山王一時數。

臂痛謁告作三絕句示四君子

公退清閒如致仕，酒餘歡適似還鄉。不妨更有安心病，臥看繁簾一炷香。

【二】

心有何求遣病安，年來古井不生瀾。祇愁戲瓦閒童子，卻作泠泠一水看。

【三】

小閣低窗臥宴溫，了然非默亦非言。維摩示病吾真病，誰識東坡不二門。

到穎未幾公帑已竭齋廚索然戲作

我昔在東武，吏方謹新書。齋空不知春，客至先愁予。采杞聊自誑，食菊不敢餘。

歲月今幾何。齒髮日向疎。幸此一郡老。依然十年初。夢飲本來空。真飽竟亦虛。尚有赤脚婢。能烹鱖尾魚。心知皆夢耳。慎勿歌歸歎。

景貺履常屢有詩。督叔弼季默倡和。已許諾矣。復以此句挑之。

君家文律冠西京。旋築詩壇按酒兵。袖手莫輕真將種。致師須得老門生。

明朝鄭伯降誰受。昨夜條侯壁已驚。從此醉翁天下樂。還應一舉百觴傾。

贈月長老

天形倚一笠。地水轉兩輪。五伯之所運。毫端棲一塵。功名半幅紙。兒女浪苦辛。子有折足鐺。中容五合陳。十年此中過。卻是英特人。延我地爐坐。語軟意甚真。白灰如積雪。中有紅麒麟。勿觸紅麒麟。作灰維那瞋。拱手但默坐。墻壁徒諄諄。今宵恨客多。汚子白氈巾。後夜當獨來。不須主與賓。蒲團坐紙帳。自要觀我身。

次韻答錢穆父。穆父以僕得汝陰。用杭越酬唱韻。作詩見寄。

大耿疲勞已離羣。小馮慈愛且當門。玉堂不著扶犁手。霜鬢偏宜畫鹿羈。

豪傑雖無兩王繼。風流猶有二歐存。清詩已入新歌舞。要使邦人識雅言。

韓退之孟郊墓銘云。以昌其詩。舉此問王定國。當昌其身耶。抑昌其詩也。

來詩下語未契。作此答之。

昌身如飽腹。飽盡還當飢。昌詩如膏面。為人作容姿。不如昌其氣。鬱鬱老不衰。雖云老不衰。劫壞安所之。不如昌其志。志壹氣自隨。養之塞天地。孟軻不吾欺。人言魏勃勇。股栗向小兒。何如魯連子。談笑卻秦師。慎勿怨謗讒。乃我得道資。淤泥生蓮花。糞壤出菌芝。賴此善知識。使我枯生莖。吾言豈須多。冷暖子自知。

送歐陽推官赴華州監酒

我觀文忠公。四子皆超越。仲也珠徑寸。照夜光如月。好詩真脫兔。下筆先落鵝。知音如周郎。議論亦英發。文章乃餘事。學道探元窟。死為長自主。名字書絳闕。傷心清穎尾。已伴白鷗沒。喜見三少年。俱有千里骨。千里不難到。莫遣歷塊蹶。臨分出苦語。願子書之笏。

十月十四日。以病在告。獨酌

翠柏不知秋。空庭失搖落。幽人得嘉蔭。露坐方獨酌。月華稍澄穆。霧氣尤清薄。小兒亦何知。相語翁正樂。銅爐燒柏子。石鼎煮山藥。一杯賞月露。萬象紛酬酢。此生獨何幸。風纒欣初泊。誓逃顏跖網。行赴松喬約。莫嫌風有待。漫欲戲寥廓。冷然心境空。彷彿來笙鶴。

獨酌試藥玉滑盞。有懷諸君子。明日望夜。月庭佳景不可失。作詩招之。

鎔鉛煮白石。作玉真自欺。琢削爲酒杯。規摹定州瓷。荷心雖淺狹。鏡面良渺瀾。持此壽佳客。到手不容辭。曹侯天下平。定國豈其師。一飲至數石。溫克頗似之。風流越王孫。詩酒屢出奇。喜我有此客。玉杯不徒施。請君詰歐陳。問疾來何遲。呼兒掃月榭。扶病良及時。

歐陽李默以油煙墨二丸見餉各長寸許戲作小詩

書窗拾輕煤。佛帳掃餘馥。辛勤破千夜。收此一寸玉。癡人畏老死。腐朽同草木。欲將東山松。涅盡南山竹。墨堅人苦脆。未用歎不足。且當注蟲魚。莫草三千牘。

明日復以大鱼爲饋重二十斤且求詩故復戲之

漢廷九尺人。誰似老方朔。那將一寸金。令足三冬學。餉魚欲自洗。鱗尾光卓犖。我是騎鯨手。聊堪充鹿角。

和趙景貺栽楡

汝陰多老楡。處處屯蒼雲。地連丹砂井。物化青牛君。時有再生枝。還作左紐紋。王孫有古意。書室延清芬。應憐四孺子。不墮凡木羣。體備松柏姿。氣含芝朮薰。初扶鶴立骨。未出龍纏筋。巢根白蟻亂。網葉秋蟲紛。乃知蔽芾初。甚要封殖勤。他年皮三寸。狐鼠了不聞。

葉待制求先墳永慕亭詩

靈區有異產。化國無潛珍。承平百年閒。管纓半齊民。建溪富奇偉。葉氏初隱淪。森然見喬木。其下維德人。佳哉鬱葱葱。氣若鳳與麟。聯翩出儒將。豈惟十朱輪。新松無鹿觸。舊柏有烏馴。待公歸上冢。淚葉乃肯春。

與趙陳同過歐陽叔弼新治小齋戲作

江湖渺故國。風雨傾舊廬。東來三十年。愧此一束書。尺椽亦何有。而我常客居。羨君開此室。容膝真有餘。拊牀琴動搖。弄筆窗明虛。後夜龍作雨。天明雪填渠。夢回聞剝啄。誰呼趙陳予。添丁走沽酒。通德起挽蔬。主孟當啗我。玉鱗金尾魚。一醉忘其家。此身自蘧條。

聚星堂雪并引

元祐六年十一月一日。晴雨張龍公。得小雪。與客會飲聚星堂。忽憶歐陽文忠公作守時。雪中約客賦詩。禁體物語。于艱難中。特出奇麗。爾來四十餘年。莫有繼者。僕以老門生。繼公後。雖不足。追配先生。而賓客之美。殆不減當時。公之二子。又適在郡。故輒舉前令。各賦一篇。

窗前暗響鳴枯葉。龍公試手行初雪。映空先集疑有無。作態斜飛正愁絕。

衆賓起舞風竹亂。老守先醉霜松折。
 歸來尙喜更鼓永。晨起不待鈴索掣。
 欲浮大白追餘賞。幸有回鸞驚落屑。
 汝南先賢有故事。醉翁詩話誰續說。
 歐陽叔弼見訪。誦陶淵明事。嘆其絕識。既去。感慨不已。而賦此詩。
 淵明求縣令。本緣食不足。東帶向督郵。小屈未爲辱。翻然賦歸去。豈不念窮獨。
 重以五斗米。折腰營口腹。云何元相國。萬鍾不滿欲。胡椒銖兩多。安用八百斛。
 以此殺其身。何啻鵠抵玉。往者不可悔。吾其反自燭。

喜劉景文至

天明小兒更傳呼。髯劉已到城南隅。
 今人不作古人事。今世有此古丈夫。
 江淮旱久塵土惡。朝來清雨濯鬢須。
 平生所樂在吳會。老死欲葬杭與蘇。
 新隄舊井各無恙。參寥六一豈念吾。
 麟雨張龍公既應。劉景文有詩。次韻。
 尺書真是髯手跡。起坐髮眼知有無。
 我聞其來喜欲舞。病自能起不用扶。
 相看握手了無事。千里一笑毋乃迂。
 過江西來二百日。冷落山水愁吳姝。
 別後新詩巧摹寫。袖中知有錢塘湖。

張公晚爲龍。抑自龍中來。伊昔風雲會。咄嗟潭洞開。精誠苟可貫。賓主真相陪。
 洞簫振羽舞。白酒浮雲疊。言從關州妃。遠去焦氏臺。傾倒餅中雨。一洗麥上埃。
 破早不論功。乘雲卻空回。嗟龍與我輩。用意豈遠哉。使君今子義。英氣冠東萊。
 笑說龍爲友。幽明莫相猜。

劉景文家藏樂天身心問答三首。戲書一絕其後

淵明形神自我。樂天身心相物。而今月下三人。他日當成幾佛。

西湖戲作

一士千金未易償。我從陳趙兩歐陽。舉鞭拍手笑山簡。祇有并州一葛強。

送歐陽季默赴闕

先生豈止一懷祖。郎君不減王文度。膝上幾日今白須。今我眼中見此父。
 汝南相從三晦朔。君去苦早我來暮。霜風淒緊正脫木。潁水清淺可立鷺。
 莫辭白酒瀉香泉。已覺扁舟掠新渡。坐看士衡執別手。更遣夢得出奇句。
 郎君可是筦庫人。乃使駸驥隨蹇步。置之行矣無足道。賢愚豈在遇不遇。

用前韻作雪詩。留景文

萬松嶺上黃千葉。載酒年年踏松雪。劉郎去後誰復來。花下有人心斷絕。